


# Akitab Padoe



The New Testament in the Padoe language of Indonesia: Akitab

Padoe (New Testament+)

## **Akitab Padoe The New Testament in the Padoe language of Indonesia: Akitab Padoe (New Testament+)**

copyright © 2025 Yayasan Kartidayu Sahabat Indonesia and The Seed Company

Language: (Padoe)

Contributor: Yayasan Kartidayu Sahabat Indonesia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-20

---

PDF generated using Haiola and XeLaTeX on 20 May 2025 from source files dated 20 May 2025

4f63776d-3afb-5b1b-ae2f-ef0b8de4bc72

## Contents

LUKASI . . . . .	1
------------------	---

## Sura Kareba Moiko Lukasi

### *Pu'umpau*

Surano ai Lukasi nie pau'o i Yesu ooto Datu Pongkadudui henu ginantiRo Ue Ala tiaro to Israaeli ka tiano lowono mia tolino. Ai laro surano nie i Lukasi umukio motae i Yesu oto pinowea angga'a umbu penaoRo Ue Ala, minggi palele'o Kareba Moiko umbu ndi Ue Ala tiaro mia karampini. Ihino sura nie kumonoo pompehowawaRo Ue Ala ndi lowono mia henu manggerupa pinaraluno. Ai laro sura nie nio aso manga'ua henu poli tobata'o ai pompu'ano kumonoo nio'aRo i Yesu, ka mbo'u i pokotampula'ano kumonoo te'engkano i Yesu ai suruga. Umana mongkono tuwuno umarino i Yesu te'engka ai suruga nopau'akeo mbo'u mpo'uki sura nie ai laro sura Tinenaro.

Tiano ko'oru ka ko'onono (kiteo ihino sura totono nie) me'ihi orao umana henu tohaw'e' butu ai laro sura nie. Tuduano umana mongkono naniro mala'eka ka melekoro tempokambi mengkiteo niioro i Yesu, i Yesu ai Raha Mempori tempono da ana-ana, ka mbo'u sirime mongkono mia Samaria henu moiko aroa ka Ana henu tetadi. Sura nie takau mesu'uo mongkono kakai, Penao Mempori, pontulungiro irowai ai laro po'angga'ano i Yesu, ka po'oninia hala umbu ndi Ue Ala.

### *Ihi*

#### *Pamula'an* 1:1-4

Nio'aro ka tempo dedeikiro i Yohane Mpupodolo ka i Yesu 1:5—2:52

Po'angga'ano i Yohane Mpupodolo 3:1-20

I Yesu dinolo ka inara'arahako 3:21—4:13

Pomparakaino i Yesu ai tongano palili Galilea 4:14—9:50

Umbu ai Galilea lumeko ai Yerusale 9:51—19:27

Pokotomba'ano minggu ai Yerusale ka petengi-tengino 19:28—23:56

Mule'ano i Yesu umbu ai matea hawe ka te'engkano ai suruga 24:1-53

### *Pompamula'ano sura*

<sup>1</sup> Teopilu henu takau pinelangkai,

Orao mia henuto mperokuhi me'uki'o lele kumonoo henu umarito tegagi ai olondo.

<sup>2</sup> Rome'uki'o lele menggena henu romerongoio umbu ai orao mia henu sumue'o lowono henu tegagi umbu ai pamula'ano, karo'amba palele'o ka pau'akito.

<sup>3</sup> Gagi kupesu'uo wusu'o lowono umbu ai pamula'ano kano'amba kuputuio umuki'o lowono nie gagi lele henu te'atora moiko tiamiu.

<sup>4</sup> Kupowowau menggena unie kau to'orio motae mbio henu pinaguru'ako ndi ikomiuka su'u mentee.

### *Pompoto'ori nio'ano i Yohane*

<sup>5</sup> Tempono i Datu Herode gagitatu ai wute Yudea, nio aso mia Petewawo Pesomba ai Sakaria neeno, umbu ai tobuno i Abia, neeno somborino i Elisabe, umono mbo'u inuleno i Haruni.

<sup>6</sup> Tinuwuro sombori nie mentee ai aroRo Ue Ala. Oruo irono mpihe montonda parenta ka songkaRo Ue ka lalau winowauro henu lano mentee.

<sup>7</sup> Kanggo lalau anaro akono i Elisabe biita ka iroto mosu'o.

<sup>8</sup> Ai aso olo, hawe tempono tobuno i Abia mo'angga ai Raha Mempori, i Sakaria palaku'o angga'ano mompoweaa pesomba ai aroRo Ue Ala.

<sup>9</sup> Montonda loterei, henu mondee romewowauo Petewawo Pesomba, i Sakaria tiniso mendamo mosunu dupa ai Bolongko Mempori ai laro Raha Mempori. <sup>10</sup> Tekonaino i Sakaria mosunu dupa ai laro Bolongko Mempori, mia orao mpekkai ai arono Raha Mempori.

<sup>11</sup> Tempo la'a mala'ekaRo Ue Ala mesabahako ndi Sakaria. Mala'eka la'a menggoti ai koana posunua dupa.

<sup>12</sup> Tempono i Sakaria sumue'o mala'eka la'a, kano tekangga ka momee.

<sup>13</sup> Kanggo nopoatae mala'eka, "Indo momee, Sakaria! Ue Ala rumongoio kakaimu. Somborimu i Elisabe minggi me'ana'akeo aso ana ntama. Aineengakeokaa i Yohane.

<sup>14</sup> Ikomiu olo manga'u ka manangai ka orao mia minggi memanga'u tempono ana la'a pine'ana'ako!

<sup>15</sup> Akono umono minggi gagi mia langkai ai aroRo Ue Ala ka indono po'inu anggoro ka inunga mesueno henu mompokomolang. Umono minggi buke ako Penao Mempori umbu ai laro kompono ineno.

<sup>16</sup> Umono olo mowawo orao mia Israeli mepokule mororongoi ndi Ue, Ue Alaro.

<sup>17</sup> Umono minggi pasadia'o bawaaRo i Ue ambono i Ue hawe ai laro tolino nie. Penao Mempori minggi mowee'akeo pabawa kano poli mo'angga menggena nabi Elia. Umbu mbio henu inanggano, mia mosu'o olo mehohawa'o euno ana-anaro. Ka umono minggi waeiro mia henu lano impororongoi gagi mpororongoi euno ndi Ue. Ka pompewowoloro gagi lalompande euno. Gagi umboro mebehe tuwu mentee."

<sup>18</sup> Kano'amba i Sakaria mesikeno ndi mala'eka la'a, "Helinde kaku to'orio motae pinau miu sie olo gagi? Akono iaku ka somboringgu oto mosu'o."

<sup>19</sup> Sumangki i mala'eka, "Iaku nie i Gabaraeli. Iaku ataRo Ue Ala kaa iaku tinena hawe palele'o kareba henu moiko tiamu.

<sup>20</sup> Mente'ano, mbio henu kupau'akomu nie olo tegagi bano haweto tempono. Kanggo akono lau pe'ale-aleo pinaunggu, lau bisa mepau, hawe kano tegagi henu kupau'o nie."

<sup>21</sup> Tempo sie, mia orao me'e'mango i Sakaria bano peluarako. Mia orao mengkohali-hali akombio kano epie ngako umono ai laro Bolongko Mempori.

<sup>22</sup> Tempono meluarako, andono bisa mepau ndi umboro. Butukaa megambara ako kaeno kaa kolekono lano bisa mepau. Pokotomba'ano romento'orio mia orao motae Ue Ala umari mokokiteoakeo aso kegagia ai laro Bolongko Mempori.

<sup>23</sup> Towono umari angga'ano ai Raha Mempori, i Sakariamekule ai rahano.

<sup>24</sup> Lanolaa epie, i Elisabe somborino momeni, ka umono me'uko ai laro raha olimo wule epieno.

<sup>25</sup> Nopotae i Elisabe, "Pokotomba'ano Ue Ala tumulungiaku ka umoninio kokohe-nunggu."

#### *Pompoto'ori nio'ano i Yesu*

<sup>26</sup> Tempono i Elisabe tekonai momeni onoo wuleno, Ue Ala tumena'o mala'eka Gabaraeli lumeko ai inie Nasare ai Galilea.

<sup>27</sup> Ue Ala tumena'o mala'eka Gabaraeli lumeko ndi Maria moluale henu taipo huru me'aso poturi saru tama. I Maria sie oto mesambora ka aso tama meneengako i Yusupu umbu inuleno i Daudi.

<sup>28</sup> Mala'eka la'a hewe ndi Maria nopotae, "Tabea, iko henu nopehohawako i Ue, Ue Ala rumoronganiko." <sup>29</sup> Rumongoio pau sie, i Maria tekangga kano kosike-sikeno ai laro arano mbio pengkonoano tabea la'a.

<sup>30</sup> Nopotae mala'eka ndi Maria, "Indo momee Maria, ako iiko takau Ropehohawa'o Ue Ala.

<sup>31</sup> Mente'ano iko minggi momeni kaa me'ana'akeo aso ana ntama kaa neengakeo i Yesu.

<sup>32</sup> I Yesu minggi gagi maramba kaa minggi ninee AnaRo Ue Ala Henu Laloako Pabawa. Ue Ala mokogagijo i Yesu datu menggena datu Daudi, ue mpu'uNo,

<sup>33</sup> kaa Umono minggi gagi datu henu parenta'o inuleno i Yako\* henu lalau tampula'ano kaa pomparenta'aNo lano huru tampula."

<sup>34</sup> Nopotae i Maria ndi mala'eka la'a, "Helinde kano masa gagi akono amboku pesombori?"

<sup>35</sup> Sumangki i mala'eka, "Penao Mempori minggi metii ndi iko, kaa pabawaRo Ue Ala Henu Laloako Pabawa olo rumoronganiko. Ooto usie iiko minggi me'ana'akeo ana henu mempori, ninee anaRo Ue Ala.

<sup>36</sup> Kupau'akomu motae i Elisabe petiamu henu rompotae biita kaa ooto mosu'o la'a, oto momeni aso ana ntama kaa unie wule ko'onoono.

<sup>37</sup> Ako ndi Ue Ala lalau henu tai gagi."

<sup>38</sup> Nopotae i Maria, "Mente'ano iaku nie ataRo Ue Ala, nogagito menggena nineemu sie." Umari la'a mala'eka lumeko bintango ai Maria.

#### *I Maria tepotowo'akeo i Elisabe*

<sup>39</sup> Towono lumeko mala'eka la'a, lumekoto i Maria ai inie langkai ai wute tamungku Yudea.

<sup>40</sup> Tempono hawe lehea, i Maria lumeko ai rahano i Sakaria, ka pendamono, i Maria metabeaa ndi Elisabe.

<sup>41</sup> Tempono i Elisabe rumongoio petabeano i Maria, ana henu ai laro kompono i Elisabe meleluako manga'u. Kaa i Elisabe nororonganio Penao Mempori,

\* <sup>1:33</sup> Yako: Yako umbu inuleno i Yako nio pau to Israeli.

<sup>42</sup> kano kumora, "Ikoto mia binarakati ai olono lowono irowai! Nobarakati'o ana henu minggi pine'ana'akomu la'a!

<sup>43</sup> Ainei iaku nie kano ineNo Uenggu hawe ndi iaku?

<sup>44</sup> Mente'ano tempono kurongoio petabeamu la'a, ana henu ai laro komponggu meleluako manga'u.

<sup>45</sup> Me'urakoto akono pompe'alo-alو motae mbio henu pinauRo Ue Ala ndi iiko olo gag!"

*Po'undeno i Maria*

<sup>46</sup> Kano'amba nopoetae i Maria,

"Aroanggu umunde'iRo i Ue,

<sup>47</sup> ka sumanganggu manga'u akono Ue Ala tumolosiaku.

<sup>48</sup> No'o'aroanganggu maupono iaku nie ataRo henu tetotoako!  
Perorongoi! Mompamula hilinie lowono mia  
motae iaku manga'u.

<sup>49</sup> Akono Ue Ala Henu Laloako Pabawa  
mowowau kegagia langkai ndi iaku.  
Mempori neeRo.

<sup>50</sup> Ai sombo-sombo amapano tempo

Ue Ala konggo mompehohawo lowono inuleno mia henu momee ka melangkai iRo.

<sup>51</sup> Ako kaeRo henu takau moroso

Rosia-sia'o mia mompelangka-langkai

<sup>52</sup> Datu-datu Ropenaohaked umbu ai potorono  
kaa mia karampini inengka gagi mia henu pinelangkai.

<sup>53</sup> Mia mokoninggo olo pinoko mowoto ako moiko'a.  
Mia suugi tinamba ai laro kae molie.

<sup>54</sup> Rotulungiro to Isaraeli ataRo,  
akono laRo kumuluepo ginantiRo mehohawakito,

<sup>55</sup> ka Ue Ala lano huru kuluepo mbio henu ginantiRo ndi ue mpu'undo,  
Ropehohawa'o ai Burahima ka inuleno hawe laalau tampula'ano."

<sup>56</sup> Ai Maria mo'ia i rahano i Elisabe, bara'ura otolu wule epieno, kano'amba mekule ai  
rahano i Nasare.

*Nio'ano i Yohane Mpupodolo*

<sup>57</sup> Haweto wuleno i Elisabe me'ana. Nope'ana'akeo aso ana ntama.

<sup>58</sup> Towono petengi-tengi rahano kaa petiano rumongoio motae i Elisabe takau Ropehohawa'o Ue Ala, umboro memanga'u mperongangakeo.

<sup>59</sup> Tempono rewu-rewu la'a tinuwuno oalu olo, umboro mehawé minggi mengkiteo  
rewu-rewu la'a tinindi. Kaa minggi menengakeo i Sakaria menggena neeno umano,

<sup>60</sup> kanggo ineno motae, "Indo! Umono olo nineengako i Yohane."

<sup>61</sup> Rompotae, "Lalau umbu ai petiamu nie henu meneengako i Yohane."

<sup>62</sup> Ka umboro megambara aka kaero mpesikeno ndi Sakaria ainei neeno rewu-rewu  
sie.

<sup>63</sup> I Sakaria mo'ema wasu po'uki'a kano uki'o, "Neeno i Yohane." Lowono mia  
mengkohali-hali.

<sup>64</sup> Tempo la'a bingkosako telipa pongu elono i Sakaria kano pepau ka mo'unde ndi Ue  
Ala.

<sup>65</sup> Memomeeto petengi-tengi rahano kaa kareba la'a telele hawe ai lowono tamungku  
ai Yudea.

<sup>66</sup> Lowono mia henu rumongoio kegagia la'a kosike-sikeno ai laro aroaro, "Gagi mbio  
soongka rewu-rewu la'a!" Akono Ue Ala rumoronganjo.

*Po'undeno i Sakaria tempono i Yohane pine'ana'ako*

<sup>67</sup> I Sakaria, umano i Yohane, nororonganjo Penao Mempori kano pomphawé pau  
umbu ndi Umboro Ue Ala. Nopotae,

<sup>68</sup> "Memaito kato unde-unde'iRo i Ue,  
Alaro to Isaraeli!

Umboro oto hawe mosakoi bawaaRo  
ka mokolipahiro.

<sup>69</sup> Ue Ala mowee'akito pongkadudui henu takau moroso,  
umbu ai inuleno i Daudi ataRo.

<sup>70</sup> Tempo isa'a telalo umbu ndi umboro nabi-nabi bininikiRo,  
Oto Rowee'akito i Ue ginantiRo.

<sup>71</sup> Olo Ropokolipakito umbu ai uwelindo

- kaa umbu ai pabawaro mia henu memkokatongakito.
- <sup>72</sup> Ka Nopoko'enaho pompehohawaRo tiano ue mpu'undo,  
ginantiRo henu mempori la'a olo Ropokosangka'o.
- <sup>73</sup> Ue Ala metando ndi Burahima umando.
- <sup>74</sup> Ka meganti minggi kumaduduikitumbu ai uwelindo,  
gagi andoto lei memomee tumonda'iRo Ue Ala.
- <sup>75</sup> Bano menggena usie ikito mentuwu mempori ka mentee i aroRo tempono ikito da  
mentuwu.
- <sup>76</sup> Kaa kumonoo iiko, ananggu, iiko minggi ninee nabiRo Ue Ala Henu Laloako Pabawa.  
Ka iiko olo tinena se'elu pasadia'o sala hawe'aRo i Ue.
- <sup>77</sup> Iiko olo palele'o ndi bawaa kato mempoli kinadudui,  
bano i Ue tumulosio halaro.
- <sup>78</sup> Moiko aroaRo Ue Alando mehohawakito.  
Umono hawe kumaduduikitumbu.
- Menggena mata'olo henu saba eri-erio,
- <sup>79</sup> Hila'ato nopolopowea wantaRo tiano mia  
henu tuwu ai laro wongi-wongi'a ka momee'a.  
Ue Ala wawokito ai sala manangai'a."
- <sup>80</sup> Anano i Sakaria la'a kolangka-langkai ka tetambai moroso pompe'alo-alono. Umono  
mo'ia ai konde one, hawe tempono moko'enaho koroino ndi to Israeli.

## 2

*Nio'ano i Yesu*

- <sup>1</sup> Tempo la'a i Datu Langkai Agutusi tumena'o lowono mia henu mo'ia ai Roma mepe'uki  
nee karo dinoa.
- <sup>2</sup> Ooto unie podoa'a mia henu amba-ambano kaa tempo sie i Kireniu io gubenuru ai  
Siria.
- <sup>3</sup> Tempo sie lowono mia lumeko mepe'uki neeno ai inie ue mpu'uro.
- <sup>4</sup> I Yusupu mbo'u mewunggoako umbu ai inie Nasare ai Galilea lumeko ai inie Beteleme  
wute Yudea inie nio'ano i datu Daudi, akono i Yusupu inuleno i Datu Daudi.
- <sup>5</sup> I Yusupu mepe'uki nee meronga i Maria samborano henu tekonai momeni.
- <sup>6</sup> Tekonairo ai Beteleme, hawe tempono i Maria me'ana.
- <sup>7</sup> I Maria me'ana'akeo aso ana ntama, henu amba-ambano. Notongoho rewu-rewu sie  
ako aso mpole bana, kano'amba mokoturio ai laro dula bimba me'ihi range, akono ando  
lalau po'iangga ai raha perato'a

*Pompakambi bimba kaa Mala'eka*

- <sup>8</sup> Ai wongi la'a nio pompakambi tekonai mogagai bimba ai tonga konde.
- <sup>9</sup> Bingkosako mala'eka mesabahako ndi umboro, karo memomee ako nio wanta umbu  
ndi Ue henu wantahiro.
- <sup>10</sup> Nopotae mala'eka, "Indo momee! Ako iaku mowawo kareba moiko tiamiu, ooto  
kareba manga'ua tiano lowono mia.
- <sup>11</sup> Olo nie ai Beteleme oto pine'ana'ako Datu Pongkadudui ooto i Kerisitu, Ue.
- <sup>12</sup> Tinieto tondonino, ikomiu minggi mehaweo io rewu-rewu hinawu ako tahu beri kaa  
pinolero ai dula bimba me'ihi range."
- <sup>13</sup> Bingkosako mala'eka la'a meronga orao mala'eka mesueno umunde'iRo Ue Ala,  
karompotae,
- <sup>14</sup> "Maramba Ue Ala henu ai wawo langi!  
Kaa roodo ndi mia tolino henu mokomanga'uo i Ue!"
- <sup>15</sup> Towono mala'eka impekule ai suruga, ropotae pompakambi la'a aso mia kaa aso mia,  
"Maito kato kiteo mbio henu gagai ai Beteleme menggena pinauRo i Ue ndi ikito."
- <sup>16</sup> Pompari-pari umboro meleko karo mehaweo i Maria kaa i Yusupu saru rewu-rewu  
la'a henu tekonai pinolero ai laro dula bimba. <sup>17</sup> Towono pompakambi mesue'o rewu-  
rewu la'a, romempau'o mbio pauno mala'eka mongkono rewu-rewu la'a.
- <sup>18</sup> Kaa lowono mia mengkohali-hali rumongoio pauro pompakambi la'a.
- <sup>19</sup> Kanggo ai Maria numaa'o ai laro aroano kano penonoho'o.
- <sup>20</sup> Pompakambi la'ira impekule ai konde kaa ai laro koleko-lekoaro, rome'unde-unde'iRo  
Ue Ala rompotae, "Maramba Ue Ala" akono lowono henu romerongoio kaa kinitoro, gagii  
menggena pauro mala'eka.

*I Yesu pinoweaa nee kaa pineweangako ndi Ue*

21 Towono sangka oalu olo tinuwuno, rewu-rewu la'a tinindi ka pinowea nee i Yesu, nee pinauro mala'eka ambono nomomeni'akeo ineno.

22 Hawe tempono i Yusupu ka ai Maria mowowau hada powohoki koroi umarino me'ana montonda songkaro i Musa. Gagi romewaweo mbo'u rewu-rewu la'a meleko ai Yerusal meweangakeo ndi Ue Ala.

23 Ako nio te'uki ai songkaRo i Ue, "Lowono ana ntama henu amba-ambano olo pineweangako ndi Ue Ala."

24 Ka umboro mbo'u mowawo pesomba ooto aso ntimba kou-kou ba oruo anano marapati, menggena henu te'uki ai songkaRo i Ue.

25 Tempo la'a ai Yerusal nio aso mia neeno i Simeo, umono mentee tuwuno ka metenunu ndi Ue Ala, ka mete'ema tempono Ue Ala kumaduduio Israeli. Umono noronganio Penao Mempori.

26 Ka otonopau'akeo Penao Mempori ndi umono lanolei maate bano taipo nosue'o Datu Pongkadudui henu ginantiRo Ue Ala.

27 Penao Mempori waweo ai Simeo mendamo ai Raha Mempori. Tempo la'a i Yusupu kaa i Maria mewaweo i Yesu mendamo ai Raha Mempori minggi meweangakeo anaro ndi Ue Ala montonda Songkaro i Musa.

28 Kano aleo i Simeo rewu-rewu la'a nopapasio kaa mo'unde ndi Ue Ala, nopoetae,

29 "Hilinie Ue, aroanoto ataMiu nie maate momoiko,  
akono oto pokosangka'o gantiMiu.

30 Akono kusue'oto ako matanggu

Mpupongkadudui umbu ndi Ikomiu,

31 henuto Ikomiu palena'o  
tianowono tongku.

32 Mpupongkadudui la'a menggena wanta henu wantahio sala tianowono tongku henu mesue mehawo ndi aroMiu,  
wanta la'a minggi mokogagi'o to Israeli bawaa Miu  
pinelangkai."

33 Umono ka ineno rewu-rewu la'a kohali-hali rumongoio mbio henu pinauno i Simeo kumonan anaro.

34 I Simeo barakati'iro ka motae ndi Maria ineNo, "Rewu-rewu nie ooto bininikiRo Ue Ala, minggi modontai ka mowue'ako orao mia to Israeli. Umono gagi petondongino umbu ndi Ue Ala henu laro tarima'o mia orao.

35 Ako helinie minggi sinue mbio henu nio ai laro aroaro. Kaa iiko Maria, minggi masusa ngako aroamu menggena kono sale ponai."

36 Nio mbo'u aso nabi irowai henuto mosu'o neeno i Hana, anano Panueli, inuleno i Asere. Butukaa opitu nta'u nopebawaa'akeo somborino,

37 akono somborino oto maate. Kaa umono andono mesombori mbo'u ka hilinie tinuwuno ooto halopulu ka opaa nta'u. Sombo meene ka sombo wongi umono nio ai Raha Mempori,mekakai saru mepuasa, mesomba ndi Ue Ala.

38 Tempono i Yusupu ka i Maria tekonai lehea, ai Hana lumeko umbedahiyo kano unde'iRo Ue Ala ka nopau'o mongkono rewu-rewu la'a ndi lowono mia henu ume'emango tempono Ue Ala mokolipaho Yerusal.

39 Umarino i Yusupu ka i Maria wowau hada powohoki koroi kaa meweangakeo anaro ndi Ue montonda songkaRo i Ue, iro mpukule ai Nasare inie po'iangaro ai Galilea.

40 Rewu-rewu la'a kolangka-langkai ka moroso, umono pande takau ka Nopehohawa'o Ue Ala.

### *I Yesu ai Raha Mempori*

41 Sombo-sombo nta'u mia mosu'ono i Yesu lumeko ai Yerusal montonda perame-rame'a Pasa mewowolo'o tepokolipaharo to Israeli umbu ai wute Masiri.

42 Tempono tinuwuno i Yesu hopulo ka oruo nta'u, umboro meleko mperame-rame menggena mondeeno.

43 Umari mperame-rame'a iro mpukule, kanggo i Yesu, Ana-ana la'a da mo'ia ai Yerusal, kanggo lano to'orio mia mosu'oNo.

44 Rokoara'araa tumonda'iro mia orao mperonga-rongaro. Towono aso olo mengkoleko-leko amba romewusu'O ai olono petia kaa tepoto'orio.

45 Kanggo laro hawe'O, gagi umboro mepukule euno ai Yerusal wusu'o i Yesu.

46 Towono ko'otoluno olo rompetewusu amba rohawe'O ai Raha Mempori, i Yesu tekonai mentoro rumongoio pauro Guru Agama ka mesikeno ndi umboro.

47 Lowono mia lehea mengkohali-hali rumongoio pandeNo i Yesu sumangki'o pe-sikenoro Guru Agama.

<sup>48</sup> Mia mosu'oNo mbo'u kohali-hali kumiteo. Nopotae ineno, "Ana, mbiokee kau powowau menggena unie ndi ikami? UmaMu ka iaku masusa aroa mami mewusuKo."

<sup>49</sup> Sumangki i Yesu, "Mombiokee ikomiu wusu Aku? Lai to'oriokee Iaku matantu nio ai rahaRo UmaNggu?"

<sup>50</sup> Kanggo laro to'orio mbio henu nineeno i Yesu.

<sup>51</sup> Umari la'a i Yesu kaa mia mosu'oNo impekule ai Nasare, kaa Umono mpihe mororongoi ndi mia mosu'oNo. Lowono henu tegagi nie nonaa'o ineNo ai laro aroano.

<sup>52</sup> I Yesu kolangka-langkai ka pande saru nopehohawa'iRo Ue Ala ka romemanga'u'akeo mia.

### 3

#### *I Yohane Mpupodolo*

<sup>1</sup> Ai ta'u hopulo ka olimo tendamo pomparentano i Datu Langkai Tiberiu, tempono i Gubenuru Pontiu Pilatu gagipala daera ai Yudea, i Datu Herode momparenta ai wute Galilea. I Pilipu petiano i Datu Herode momparenta ai wute Iturea ka Tarakoniti, ka i Lisania momparenta ai Abilene.

<sup>2</sup> Henu gagipala Langkai ooto i Hanasi ka i Kayapa. Ai ta'u la'a Ue Ala mepau ndi Yohane anano i Sakaria ai konde one.

<sup>3</sup> Lumeko i Yohane tumonda'o wute wiwi korono Yarade ka pau'o oliwiRo Ue Ala. I Yohane kokora-kora, "Mentesisito umbu ai winowaumi henu mosa'a ka peweangakeoto koroimiu dinolo, ka Ue Ala minggi umoninio halamiu."

<sup>4</sup> Mbio henu winowauno i Yohane menggena henu te'uki ai surano nabi Yesaya, "Nio mia kokora-kora ai konde one,

Palena'oto sala tiaRo i Ue, pokomomoli'o sala tiaRo.

<sup>5</sup> Lowono bangkano minggi hinowui,  
lowono tamungku ka mungku pinoko melemblo.

Sala henu monggedo-ngegedo pinokomomoli,  
ka sala henu mebingkoso hinowui.

<sup>6</sup> Lowono mia aso wawontolino minggi sumue'o  
Mpupongkadudui umbu ndi Ue Ala!"

<sup>7</sup> Orao mia hawe mo'ema karo dinolo. I Yohane mepau'akero, "Ikomiu mia henu mosa'a gaumi menggena ule me'eto! Ainei motae ikomiu telipahako umbu podosaRo Ue Ala henu amba ramai?

<sup>8</sup> Poko'enaho ai laro tinuwumi bano ikomiuto tesisi umbu winowaumi henu mosa'a. Indo koara'ara, ikomiu lano dinosa akono ikomiu inuleno i Burahima. Pewowolo'o, umbu ai wasu-wasu nie Ue Ala poli mowowau mia gagipala tiano i Burahima.

<sup>9</sup> PodosaRo Ue Ala menggena ndamu henuto tepalena minggi pontuehi kau hawe ai haka-hakano. Lowono kau henu lano moiko wueno minggi tinuehi ka sinunu."

<sup>10</sup> Mia orao mpesikeno ndi Yohane, "Gagi mbiokee kimpowowau?"

<sup>11</sup> Sumangki i Yohane, "Mia mompe'ue oruo kalambino, wee'akeo aso mia henu tainio kalambini, ka mia henu orao kaanganan tia-tia'o ndi mia henu tainio kaanganan."

<sup>12</sup> Toposima mbo'u hawe ndi Yohane mo'ema dinolo, rompesikeno "Guru, mbiokee kimpowowau?"

<sup>13</sup> Sumangki i Yohane, "Indo po'ema toreua umbu henu pinatantu."

<sup>14</sup> Nio mbo'u sorodadu mesikeno, "Helinde menggena ikami? Mbio henu kiwowaau?" Sumangki i Yohane, "Indo rukuhio baineitokaa, indo porukuhi ako pau lano mentee. Sangka oto umbu ai gadimu!"

<sup>15</sup> Tempo la'a orao mia momperorohi kaa kosike-sikeno menteekoo i Yohane Datu Pongkadudui henu rome'e'emango.

<sup>16</sup> Oto kano potae i Yohane ndi umboro, "Iaku dumolo komiu ako uwori, kanggo minggi hewe mia henu takau langkai pabawano kaseko iaku. Sekonopo mowowo onggono sipatuNo mbo'u iaku lano koono. Umono minggi dumolo komiu ako Penao Mempori ka apui. <sup>17</sup> Ai kaeNo nio duku minggi dumuko'o pae hewe meroa. Pae henuto meroa minggi nonaa'o ai tu'ora, kanggo ota olo sinunu ai apui henu lano huru maate!"

<sup>18</sup> I Yohane mompowea orao oliwi mesueno, kaa palele'o Kareba Moiko ndi mia orao.

<sup>19</sup> I Yohane tumeguru'o i Datu Herode akono norampasio i Herodia somborino petiano ka mbo'u akono mowowau gau mosa'a henu mesue.

<sup>20</sup> Kanggo i Datu Herode notambai mbo'u halano, nopondamoho i Yohane ai laro tarungku.

#### *I Yesu dinolo*

<sup>21</sup> Masano lowono mia siire umari medinolo, i Yesu mbo'u hawe kano dinolo. Ka tekonaiNo mekakai langi tewungge,

<sup>22</sup> ka Penao Mempori metii ai wawoNo menggena manu-manu marapati. Ka terongoi pauRo Ue Ala motae, "Ikoto AnaNggu henu Kupehohawa'o. Ikoto henu mokomanga'uo aroaNggu."

*Petondano ue mpu'u i Yesu*

<sup>23</sup> Tempono i Yesu pamula'o angga'ano, bara'ura tolupulu nta'uno. Motonda pohawero mia, Umono anano i Yusupu. Yusupu anano i Eli,

<sup>24</sup> anano i Matati, anano i Lewi, anano i Malaki, anano i Yanai, anano i Yusupu,

<sup>25</sup> anano i Matika, anano i Amosi, anano i Nahumi, anano i Heseli, anano i Nagai,

<sup>26</sup> anano i Maati, anano i Matika, anano i Simei, anano i Yoseki, anano i Yoda,

<sup>27</sup> anano i Yohana, anano i Resa, anano i Serubabe, anano i Sealitie, anano i Neri,

<sup>28</sup> anano i Malaki, anano i Adi, anano i Kosami, anano i Elimada, anano i Ere,

<sup>29</sup> anano i Yesua, anano i Eliese, anano i Yorimi, anano i Matati, anano i Lewi,

<sup>30</sup> anano i Simeo, anano i Yahuda, anano i Yusupu, anano i Yonami, anano i Eliaki,

<sup>31</sup> anano i Melea, anano i Mina, anano i Matata, anano i Nata, anano i Daudi,

<sup>32</sup> anano i Isai, anano i Obe, anano i Boasi, anano i Salamo, anano i Nahaso,

<sup>33</sup> anano i Abinada, anano i Adimini, anano i Arini, anano i Heseroni, anano i Peresi, anano i Yahuda,

<sup>34</sup> anano i Yako, anano i Isaki, anano i Burahima, anano i Tera, anano i Nahori,

<sup>35</sup> anano i Serugi, anano i Rehu, anano i Pelegi, anano i Ebere, anano i Salamo,

<sup>36</sup> anano i Kenani, anano i Arapasa, anano i Semu, anano i Noha, anano i Lameki,

<sup>37</sup> anano i Metusala, anano i Heno, anano i Yaredi, anano i Mahaleli, anano i Kenani,

<sup>38</sup> anano i Enosi, anano i Seti, anano i Adamo, anaRo Ue Ala.

## 4

*Ueno onisu umara'arahakeo i Yesu*

<sup>1</sup> I Yesu buke aka Penao Mempori pekuleNo umbu ai korono Yarade. Penao Mempori wawe'iRo leko ai konde one.

<sup>2</sup> Patopulu olo epieno Nopo'ia ai konde one, lehea i Yesu no'ara'arahakeo Ueno onisu. Aso tempo la'a i Yesu lano huru monggaa mbio-mbio, ooto kaNo mokoninggo.

<sup>3</sup> Kano potae Ueno onisu ndi Yesu, "Iiko anaRo Ue Ala, tena'oto wasu nie kano gagi roti."

<sup>4</sup> Nopotae i Yesu, "Nio ai laro Sura Tutulu, mia tuwu lano butu umbu ai roti."

<sup>5</sup> Umari la'a Ueno onisu waweo i Yesu ai po'ianga henu medongke, butu aso pebiro'akaa popokokiteo'akeo pomparenta'a ai wawontolino.

<sup>6</sup> Nopotae Ueno Onisu ndi Yesu, "Lowono pabawa kaa sugi'a minggi kuwee'akoMu, akono lowono nie akuto winea'ako kaa iaku minggi meweangakeo ndi baineitokaa henu inehenggu.

<sup>7</sup> Bau penggoluto mesomba ndi iaku, lowono sie minggi gagi tiaMu."

<sup>8</sup> Nopotae i Yesu, "Nio ai laro Sura Tutulu, pesombaio Ue Alamu ka butu ndi Umboro au petenunu."

<sup>9</sup> Umari la'a Ueno onisu waweo i Yesu ai mumunge Raha Mempori ai Yerusele, kano potae, "Iiko anaRo Ue Ala, pedontaihakoto umbu endea,<sup>10</sup> akono nio ai laro Sura Tutulu, Ue Ala minggi tumena'o mala'ekaRo gumagaiKo.

<sup>11</sup> Kaa mala'eka minggi sumakaKo, kau tai telano ai wasu."

<sup>12</sup> Nopotae i Yesu, "Nio ai laro Sura Tutulu, indo ara'arahakeo Ue Alamu!"

<sup>13</sup> Towono Ueno onisu umari mo'ara'arahakeo i Yesu aka manggerupa sie Ueno onisu bintango i Yesu kaa mowusu tempo henu moiko.

*I Yesu pamula'o po'angga'aNo ai Galilea*

<sup>14</sup> Kano'amba i Yesu buke aka pabawaRo Penao Mempori tekonaiNo mekule ai Galilea kaa teleto kareba mongkono winowauNo ai po'ianga sie.

<sup>15</sup> I Yesu mompaguru ai lowono Raha Pesomba'a kaa lowono mia umunde'iRo.

*I Yesu lano tinarima ai inie Nasare*

<sup>16</sup> I Yesu hawe ai Nasare, ai inie Nopinokolangkai. Ai olo penao-nao'a to Yahudi, menggena mondeeno i Yesu leko ai Raha Pesomba'a. I Yesu menggoti minggi mobata Sura Tutulu.

<sup>17</sup> Kaa mia henu mo'angga ai Raha Pesomba'a mowee'akeO sura henu inukino ai Yesaya. Nowunggeho paluluno sura la'a, Nohawe'o laino nie kaa Nobata'o,

<sup>18</sup> "PenaoRo i Ue nio ndi Iaku,

Ue Ala rumosongaNggu mowawo Kareba Moiko tiaro mia karampini,

Iaku tinena mompalele motae Ue Ala minggi  
 mokolipahiro mia tinarungku, mokomosue'iro mia memorawu  
 kaa mokolipahiro mia binobarasa,

<sup>19</sup> kaa Iaku palele'o haweRo i Ue kumaduduio bawaarO."

<sup>20</sup> I Yesu palulungo euno Sura Tutulu kano wee'o ndi mia henu mo'angga ai Raha Pesomba'a kano'amba mentoro. Lowono mia ai laro Raha Pesomba'amekokoongo mbio pinauno i Yesu.

<sup>21</sup> Kaa i Yesu mompamula mepau ndi umboro, "Laino Sura Tutulu henu kubata'o hieno oto Kupokosangka'o tempono ikomiu merongoio."

<sup>22</sup> Mbio henu pinauno i Yesu takau moiko ooto karo mokomentee'o pauNo kanggo lo'oka romento'orio i Yesu nie anano i Yusupu gagi umboro mengkohali-hali'akeo.

<sup>23</sup> Kanggo i Yesu tumo'orio mbio henu rompewowolo'o ooto kaNo potae, "Kuto'orio ikomiu minggi motae ndi Iaku menggena unie, 'Datoro pokotomba'o koroiMu. Mbio tandangkohali-hali henu kimerongoio umari tegagi ai Kapenau wowau mbo'u ai inieMu.'"

<sup>24</sup> Ka Nopotae mbo'u, "Pewowolo'o, lalau nabi tinarima ai inieno."

<sup>25</sup> Kanggo Iaku mompau'akomu pau henu mentee, tempono i Elia tuwu, ai lowono wute to Israeli tegagi abalaa mokoninggo'a akono otolu nta'u kaa entonga lano huru use. Tempo la'a orao irowai waalu ai Israeli.

<sup>26</sup> Ue Ala lano tena'o i Elia lumeko ndi irowai waalu to Israeli, kanggo lumeko ndi aso irowai waalu ai Sarapa ai wute Sidoni.

<sup>27</sup> Helila'a mbo'u tempono i nabi Elisa masa orao to Israeli memelowe, kanggo lalau napono te'aso mia henu pinokotomba sangarino i Naama to Siria.

<sup>28</sup> Lowono mia ai laro Raha Pesomba'a mentekuda takau rumongoio pauno i Yesu.

<sup>29</sup> Karo mpenggoti kaa mentamba'o i Yesu meluarako umbu ai inie langkai kano'amba wawe'O leko ai tamungku mewingke henu umbedano inie langkai la'a karo minggi medontaio lehea.

<sup>30</sup> Kanggo i Yesu me'o'ako ai oloro mia orao kano polao.

### *Mia pinendamohino penao mosa'a*

<sup>31</sup> Umbu ai Nasare i Yesu mine'i ai inie langkai Kapenau ai wute Galilea kaa ai olo penao-nao'a to Yahudi i Yesu mompaguru orao mia ai laro Raha Pesomba'a.

<sup>32</sup> I Yesu mompaguru kaa mebitara buke ako pabawa ooto karo mentengiri.

<sup>33</sup> Ai laro Raha Pesomba'a la'a nio aso mia nopendamohio penao mosa'a kumora mekora ngako,

<sup>34</sup> "Hei Yesu mia Nasare, minggi mbio kami? Minggi hawe bobarasa kami? Kuto'orio ikomiu henu Memperi umbu ndi Ue Ala."

<sup>35</sup> Kanggo i Yesu rumambasio, Nopotae, "Indo pogero! Peluarakoto umbu ai mia sie!" Penao mosa'a mepasi'akeo mia la'a ai arono mia orao kano'amba meluarako kanggo lano belaio mia la'a.

<sup>36</sup> Lowono mia henu mesue'o mengkohali-hali kaa mengkopau-pau aso mia ka aso mia, "Indokaa iko ako pabawa ka pepauNo, i Yesu parenta'o penao mosa'a mpeluarako kaa umboro mpeluarako!"

<sup>37</sup> Gagi kareba mongkono mbio henu nopowowau ka pinauno i Yesu telele ai lowono inie henu umbeda umbu ai po'ianga la'a.

### *I Yesu mompokotomba orao mia*

<sup>38</sup> Kano'amba i Yesu bintango Raha Pesomba'a kaa meleko ai rahano i Simo. Ineno somborino i Simo tekonai mokokoseo, rompo'ema ndi Yesu kano tulungio.

<sup>39</sup> I Yesu menggoti ai aso hileno poturiano kano tamba'o mokokoseono. Masa toomba hakino ineno somborino i Simo ka mompari-pari mewangu parakai'iro.

<sup>40</sup> Towono soo mata'olo, lowono mia ai inie langkai la'a mehawe mewaweo petiaro henu manggerupa hakiro kano pinokotomba. I Yesu dumanggiho uluro aso mia ka aso mia karo tomba.

<sup>41</sup> Penao mosa'a mpeluarako mbo'u umbu ai orao mia karo kokora-kora, "Ikomiu AnaRo Ue Ala!" Kanggo i Yesu rumambasi'iro penao mosa'a la'ira karo indoro mpepau, akono romento'orio Umonoto Datu Pongkadudui.

### *I Yesu montutulu ai orao Raha Pesomba'a*

<sup>42</sup> Eri-erio i Yesu bintango inie la'a lumeko ai po'ianga henu molimbo. Orao mia mewusu'o i Yesu kaa tempono rohawe'o, romerokuhio indoNo bintangiro.

<sup>43</sup> Kanggo i Yesu motae'akero, "Iaku nie minggi mowawo Kareba Moiko mongkono Pomparenta'aRo Ue Ala ai inie-inie langkai mesueno, akono usieto Iaku tinena hawe ai tolino nie."

<sup>44</sup> Akono usie i Yesu lumeko montutulu umbu ai aso Raha Pesomba'a melimba-limba ai Raha Pesomba'a mesueno ai wute Yudea.

## 5

### *I Yesu mobiniki otolu iro anaguruNo henu amba-ambano*

<sup>1</sup> Ai aso tempo, i Yesu menggoti ai wiwi Towa Genesare. Lehea orao mia mpeburo-buroso minggi merorongoio pauRo Ue Ala.

<sup>2</sup> I Yesu sumue'o oruo bangka ai wiwi towa, ueno bangka la'ira iroti mpetii kaa tekonai mompowohoki jalaro.

<sup>3</sup> I Yesu mewue'ako ai aso bangka, ooto bangkano i Simo, kaa Notena'o i Simo dumada'o bangkano la'a olai tedei umbu ai wiwino. I Yesu mentoro ai wawo bangka la'a kaa mompaguru mia orao.

<sup>4</sup> UmariNo mompaguru, I Yesu motae ndi Simo, "Bose'o bangkamu leko ai onalongan, kaa petadiakeo jala porakomu bou." <sup>5</sup> Sumangki i Simo, "Guru, aso wongito nie kimpojala laalau napo te'aso bou kimpohawé, kanggo akono Ikomiu tumena'aku, humbee ta'alú, iakuto metadiakeo mbo'u jala nie!"

<sup>6</sup> Towono rowowau menggena pinauno i Yesu, orao ngako rompohawé bou hawe-hawe minggi teberi jalaro.

<sup>7</sup> Ooto karo mpekaresi ndi wali-waliro ai bangka mesueno. Kaa umboro mehawé karo mperonga-ronga umihio oruono bangka la'ira buke ako bou hawe minggi toondu.

<sup>8</sup> Towono i Simo Peturu sumue'o mbio henu tegagi, umono menggolutu ai arono i Yesu, kano potae, "Ue, bintangangguto! Ako iaku nie mia tehala."

<sup>9</sup> Akono i Simo kaa lowono mia peronga-rongano mengkohali-hali ako oraono bou henu rompohawé.

<sup>10</sup> Hila'ato mbo'u wali-waliro ooto i Yakobu kaa i Yohane, oruo irono anano i Sebedeu. Kano'amba i Yesu motae ndi Simo, "Indo momee! Momparamula olo nie Aku mokogagiko topojala mia."

<sup>11</sup> Kano i Simo kaa wali-walino, medii'o bangkaro hawe ai wiwino towa, karo'amba mebintango lowo-lowono kaa tumonda'o i Yesu.

### *I Yesu mokotomba'o mia melowe*

<sup>12</sup> Aso olo, i Yesu ai aso inie. Lehea nio aso tama henu melowe ai lowono koroino. Towono nosue'o i Yesu, kano penggolutu ai arono i Yesu kaa mo'ema, "Uma, bau buuku Ikomiu poli'o mokotomba'o hakinggu!"

<sup>13</sup> I Yesu tumeteakeo kaeNo ka umini'o mia mahaki la'a kaa motae, "Iaku buuku, tombato!" Tempono i Yesu motae menggena ula'a, oto tomba hakino mia melowe la'a.

<sup>14</sup> Kanggo i Yesu lano behe'akeo mia melowe la'a pau'o ndi aineitokaa, kaNo potae, "Lekoto pokokiteo koroiwu ndi Petewawo Pesomba. Pompowea pesomba akono ikoto tomba menggena henu tinenanano i Musa, gagi tondonino motae ikoto tomba."

<sup>15</sup> Kanggo mbio henu winowauNo oto telele ndi mia orao, kaa orao mia mehawé minggi merorongoio pinauNo kaa kano pinokotomba umbu ai hakiro.

<sup>16</sup> Umari la'a i Yesu lumekomekakai ai aso po'ianga henu molimbo.

### *I Yesu mompokotomba mia luuka*

<sup>17</sup> Nio aso olo, i Yesu tekonai mompaguru kaa nio mbo'u to Parisi kaa Guru Agama pentoro perorongoi, umboro mehawé umbu ai Yerusele, umbu ai lowono inie langkai ai wute Galilea kaa umbu ai wute Yudea. PabawaRo i Ue nio ndi i Yesu tiano mompokotomba mia mahaki.

<sup>18</sup> Kano nio ba'opio'iro mia hawe mewaweo aso mia luuka pinokoturi ai ompeo dali. Kaa umboro powusu sala minggi mewaweo mia luuka la'a ai laro raha karo mena'o ai arono i Yesu.

<sup>19</sup> Kanggo akono oraono mia lehea, umboro laro mentepondamo. Ooto karo mewue'akeo ai wawono ato. Kano'amba romelompaho ato, kaa rome'uluiho merongga saru ompeo dalino ai arono i Yesu ai olono mia orao. <sup>20</sup> Towono Nosue'o i Yesu langkai pompe'alo-aloro, Nopotae, "Petia, halamu oto tinolosi."

<sup>21</sup> Guru agama kaa to Parisi momparamula mpepau-pau aso mia kaa aso mia, "Aineiokee mia nie mokodedeiki'o Ue Ala? Aineiokee henu bisa montolosi hala banu taibutu Umboro Ue Ala?"

<sup>22</sup> Noto'orio i Yesu mbio henu pinewowoloro. Gagi Ropotae, "Akombio ikomiu kosike-sikeno ai laro aroamii?

<sup>23</sup> Undee henu moruana, motae, 'Halamu oto tetolosi', ba motae, 'Pewanguto kau koleko-leko!' <sup>24</sup> Kanggo hilinie Iaku moko'enaho ndi ikomiu, kai mento'orio kaa motae ai wawontolino nie Ana Manusia makuasa montolosi hala." Kano'amba i Yesu mepau'akeo mia henu luuka la'a, "Pewanguto, engkaho ompeo dali poturiamu kau pekule!"

<sup>25</sup> Masa menggoti mia la'a ai arono mia orao, no'engkaho ompeo dalino kaa mekule, ai koleko-lekoano no'unde-unde'iRo Ue Ala.

<sup>26</sup> Lowono mia mentengiri karo unde'iRo Ue Ala. Umboro memomee kaa mpotae, "Mbio henu kinitondo olo nie takau mompoko kohali-hali!"

### *I Yesu meboio i Lewi*

<sup>27</sup> Towono i Yesu meluarako umbu ai raha la'a Nosue'o toposima meneengako i Lewi tekonai mentorai ai raha toposima. Nopotae i Yesu ndi umono, "Tonda Akuto."

<sup>28</sup> Menggoti i Lewi kaa nobintango lowo-lowono, kaa tumonda'o i Yesu.

<sup>29</sup> Umari la'a i Lewi mowowau perame-rame'a tiano i Yesu ai rahano. Orao toposima kaa mia mesueno mehaweha mponggaa meronga'akero.

<sup>30</sup> Kanggo ba'opio'iro to Parisi kaa Guru Agama ko'ise-ise ndi anaguruno i Yesu karompotae, "Akombio ikomiu mponggaa kaa mpo'inu mperonga-ronga saru toposima kaa mia ntehala?"

<sup>31</sup> I Yesu sumangki'iro, "Lano'o mia moroso henu momparalu datoro, kanggo mia mahaki.

<sup>32</sup> Iaku nie hawe lano'o minggi mompeboi mia mentee, kanggo mia ntehala karo mentesisi."

### *Mongkono mepuasa*

<sup>33</sup> Kano nio mia motae ndi Yesu, "Anaguruno i Yohane kaa anaguruno to Parisi hora mepuasa kaamekakai, kanggo anaguruMu monggaa kaa mo'inu."

<sup>34</sup> I Yesu sumangki'iro ako sirime, "Bisakee ikomiu tumena'o totokamu mepuasa ai perame-rame'a, tekonai umbuwoke tama dakonggo mperonga-ronga'akero? Matantu uuhu!"

<sup>35</sup> Kanggo amba hawe tempono umbuwoke tama la'a inalo umbu ndi umboro. Tempo la'a karo'amba mpepuasa."

<sup>36</sup> Umari la'a i Yesu mompau'akero mbo'u sirime henu mesue, "Lalau mia mo'alo bana umbu ai kalambi henu wo'u kano'amba notombili'akeo ai kalambi henu mosu'o, akono kalambi henu wo'u la'a olo teberi. Kaa mbo'u bana umbu ai kalambi mosu'o kaa bana umbu ai kalambi henu wo'u la'a lano tepokono.

<sup>37</sup> Hila'aka mbo'u lalau mia molingi anggoro henu wo'u ai kandu kuli henu mosu'o, akono anggoro wo'u la'a minggi noberihon kandu kuli la'a, olo tesolo anggorono kaa kandu kulino masola.

<sup>38</sup> Anggoro henu wo'u olo liningi ai kandu kuli henu wo'u.

<sup>39</sup> Hila'aka mbo'u lalau mia henu behe mo'inu anggoro henu wo'u umari mo'inu henu epie. Akono umono minggi motae, 'Anggoro epie sie takau mo'ahi.' "

## 6

### *Pesikeno'a mongkono olo Penao-nao'a To Yahudi*

<sup>1</sup> Ai aso olo penao-nao'a to Yahudi, tekonai i Yesu telalo ai lere batari, anaguruNo mo'opu batari. Ropomonggu'o batari la'a karo mengkaango. <sup>2</sup> Ba'opio'iro to Parisi motae, "Akombio ikomiu mpowowau menggena ula'a henu lano bineheako ai laro songka agama ai olo penao-nao'a to Yahudi?"

<sup>3</sup> Sumangki i Yesu, "Ambo hurukee ai mebata'o mongkono henu winowauno i Daudi tempono umono ka miano memokoninggo?"

<sup>4</sup> I Daudi mendamo ai laro RahaRo Ue Ala kano aleo roti henu pinesomba'ako ndi Ue Ala, kano kaango. Kano'amba nowee'akero mbo'u ndi wali-walino. Sekonopo montonda songka agamando butukaa Petewawo Pesomba henu bisa monggaa roti la'a."

<sup>5</sup> Umari la'a i Yesu motae mbo'u ndi umboro, "Ana Manusia pabawa ai wawono olo penao-nao'a to Yahudi!"

### *I Yesu mompokotomba ai olo penao-nao'a to Yahudi*

<sup>6</sup> Ai aso tempo ai olo penao-nao'a to Yahudi henu mesueno, i Yesu lumeko mompaguru ai Raha Pesomba'a. Lehea nio aso mia henu luuka kae koanano.

<sup>7</sup> Guru agama kaa to Parisi mempoporo'o i Yesu bano komba mompokotomba ai olo penao-nao'a to Yahudi kano niokaa sala pasala'o i Yesu.

<sup>8</sup> Kanggo Noto'orio i Yesu pinewowoloro. Okaa i Yesu kano potae'akeo mia henu luuka kaeno aso hile la'a, "Penggito kau mai endea ai aroNgg!" Mia la'a menggoti kano leko ai arono i Yesu.

<sup>9</sup> Kano'amba nopoatae i Yesu ndi umboro, "Iaku mesikeno ndi ikomiu, mbiokee henu moiko topowowau ai olo penao-nao'a to Yahudi, mowau henu moikokee ba mowau henu mos'akee? Mongkaduduukee ba mobobarasakee?"

<sup>10</sup> I Yesu menggito mebolili ndi lowono mia kano'amba motae'akeo mia luuka kae koanano, "Teteakeo kaemul!" Kano teteakeo kaeno kaa kaeno masa toomba.

<sup>11</sup> Kanggo Guru Agama kaa to Parisi mentekuda ngako karo pepatudu ba helinde romingga membiongo i Yesu.

*I Yesu mobiniki hopulo ka oruo mia tinena*

<sup>12</sup> Tempo la'a i Yesu lumekomekakai ai torukuno. Lehea i Yesu mekakai ndi Ue Ala aso ngkau wongi.

<sup>13</sup> Towono eri-erio, i Yesu meboio lowono anaguruNo, kaNo binikio hopulo ka oruo mia umbu ndi umboro, Noneengakero mia tinena. Umboroto,

<sup>14</sup> I Simo (henu ninee i Peturu), kaa i Andaria haeno, i Yakobu kaa i Yohane, i Pilipu kaa i Barotolomeu,

<sup>15</sup> i Matiu kaa i Toma, i Yakobu anano Alapeu, kaa i Simo (henu ninee mia Seloti),

<sup>16</sup> i Yudasi anano i Yakobu kaa i Yudasi Isikario henu amba minggi umasa'o i Yesu.

*I Yesu mompaguru kaa mompokotomba orao mia*

<sup>17</sup> Kano'amba i Yesu meronga-ronga hopulo ka oruo anaguruNo la'a mpine'i umbu ai torukuno meleko ai lembono. Lehea oto menterombu orao anaguruNo i Yesu henu mesuено kaa orao mbo'u mia mehawe umbu ai lowono inie ai wute Yudea, umbu ai inie langkai Yerusale, kaa umbu ai inie langkai Tirusu kaa Sidoni oruo inie langkai ai wiwintahi.

<sup>18</sup> Umboro memai minggi merongoio pompaguruno i Yesu kaa pinokotomba umbu ai hakiro. Kaa i Yesu mbo'u mompokotomba mia henu marasai, akono nopendamohiro penao mosa'a.

<sup>19</sup> Lowono mia merokuhi umini'o i Yesu, akono nio pabawa henu meluarako umbu ai koroiNo henu mompokotomba lowono mia lehea.

*Pau manga'ua kaa masusa'a*

<sup>20</sup> I Yesu kumikiteiro anaguruNo kaa Nopotae,

"Memanga'uto ikomiu mia mekarampini, ako ikomiu miano Pomparenta'aRo Ue Ala!

<sup>21</sup> Memanga'uto ikomiu henu hilinie memokoninggo, ako ikomiu minggi memowoto!

Memanga'uto ikomiu henu hilinie mpe'awi, ako ikomiu amba mpo'awa!

<sup>22</sup> Memanga'uto ikomiu ta'alu nomokotangakomiu mia, tinadi, pinepaukiako kaa pinokomosa'a neemiu hangano Ana Manusia!

<sup>23</sup> Tempone ikomiu pinokomarasai menggena ula'a, aimemanga'uto kaimpenari-nari akono langkai saromiu ai suruga.

Pewowolo'o, menggena ula'a mbo'u nabi-nabi tempo isa'a nobobarasa'o ue mpu'uro mia henu hilinie mokomarasaikomiu.

<sup>24</sup> Kanggo memasolato ikomiu henu hilinie mesugi, ako ikomiu umari mpohaweh manangaia!

<sup>25</sup> Memasola komiuto henu hilinie mowoto, ako ikomiu minggi memokoninggo!

Memasola komiuto henu hilinie mpo'awa, ako ikomiu minggi memasusa aroa kaa mpe'awi!

<sup>26</sup> Memasola komiuto, bano lowono mia me'unde-unde komiu, ako helila'a mbo'u ue mpu'uro isa'a mpo'unde nabi-nabi lano mentee."

*Peöhawao' uwelimu*

<sup>27</sup> "Kanggo ndi ikomiu henu rumorongoi Aku tempo nie, Aku pau'akomiu oliwi nie, pehohawa'o io uwelimu, kaa powowauto henu moiko ndi mia henu mokokatongakomu.

<sup>28</sup> Rosongiroto mia henu tumandoko kaa pekakai'akeroto mia henu mepaukiakomu.

<sup>29</sup> Bano mia tumampeleko ai kombisimu henu aso hileno, po'inengoto mbo'u kano tampele'o kombisimu henu aso hileno. Kaa bano mia rumontungo hawumu po'ineengo kano aleo mbo'u kalambimu.

<sup>30</sup> Bano nio mia mo'ema bambiotokaa ndi iiko, powee'akeoto kaa ta'alu rome'aleo henumu, indoto emango mbo'u.

<sup>31</sup> Powowauto ndi mia mesue menggena inehemiu rowowau'akomiu.

<sup>32</sup> Bano ikomiu butu mehohawa'o mia henu mehohawakomiu mbiokee saromiu? Sekolopo mia ntehala mbo'u nopehohawa'o mia henu mehohawa'iro!

<sup>33</sup> Kaa baimpowowau henu moiko ndi mia henu mowowau moiko ndi ikomiu, mbiokee saromiu? Sekolopo mia ntehala lo'okaa mowowau menggena ula'a!

<sup>34</sup> Kaa baimpo'utangakeo doi ndi mia henu bisa mokule'o, mbiokee saromiu? Sekolopo mia ntehala lo'okaa mo'uta ndi mia tehala, karo'amba umemango euno menggena oraono ropo'utangakeo!

<sup>35</sup> Mente'ano lanolaahila'a! Kanggo ikomiu pehohawa'iroto uwelimi kau powowau henu moiko ndi umboro. Ai po'utangakeroto kaa indoto emango euno. Ta'alu helila'a saromiu langkai kaa ikomiu minggi gagi ana-anaRo Ue Ala Henu Pinelangkai. Akono moiko aroaRo Ue Ala ndi mia henu lano to'orio montarima kase kaa mbo'u ndi mia henu mosa'a gauro.

<sup>36</sup> Poko'enahoto aroa pompehohawamu menggena Umamu mbo'u nopoko'enahoto aroa pompehohawamu!"

### *Mongkono modosa mia*

<sup>37</sup> "Indoto dosango mia mesue, kano ikomiu mbo'u lano dosango Ue Ala. Indoto podenda mia mesue, kano ikomiu mbo'u lano dendako Ue Ala. Oninio halano mia mesue, kano Ue Ala mbo'u umoninio halamiu.

<sup>38</sup> Pompoweeto ndi mia mesue kano Ue Ala mbo'u mowee'akomiu, ikomiu minggi pinowea me'alu menggena sina'u henu inih buke ngako ka dinatopi hawe kano sawiko."

<sup>39</sup> Kano'amba i Yesu mompau'akero aso sirime, "Bano mia morawu mowawo mia morawu, manasa oruo irono modonta ai wolo.

<sup>40</sup> Lalau anaguru lumaloo pandeno guruno. Kanggo anaguru henuto umari mepaguru, minggi gagi menggena guruno.

<sup>41</sup> Akombio kai sue'o subingkau mopulino petiamu, sekonopo lau sue'o polengkau ai matamu?

<sup>42</sup> Helinde ikomiu pau'akeo petiamu, 'Mai petia, iaku umoniniakomu subingkau mopulimbu umbu ai matamu,' sekonopo lau sue'o polengkau henu ai matamu? O mia mompemiamoko! Luarakeo se'elu polengkau henu ai laro matamu. Kano'amba ikomiu mosue takau kaa bisa lumuarakeo subingkau henu ai laro matano petiamu."

### *Pu'uno kau kaa wuено*

<sup>43</sup> "Pu'uno kau henu moiko lanolei mewue henu mosa'a. Hila'aka mbo'u pu'uno kau henu tai moiko lanolei mewue henu moiko.

<sup>44</sup> Lowono pu'uno kau teto'ori umbu ai wuено. Umbu ai tolonus lanolei inopu wua ara, kaa umbu ai seko merui lanolei inopu wua anggoro.

<sup>45</sup> Mia henu moiko mepau henu moiko akono aroano buke ako moiko'a. Mia henu mosa'a gauno mepau henu mosa'a akono aroano buke ako aroa mosa'a. Akono mbio henu pinaundo ooto henu meluarako umbu ai aroando."

### *Oruo rupa pentoro'ano raha*

<sup>46</sup> "Mbiokakee kau kora'laku, 'Ue, Ue,' kanggo laila'a lumelu'o mbio henu Ku-pau'akomiu?

<sup>47</sup> Sombo mia henu mai ndi Iaku kaa rumongoio pauNggu kaa lumelu'o, Kupowe'akomiu sirime menggena mbio Kuponggenahiro.

<sup>48</sup> Umboro menggena mia henu mowangu raha kano kekeo wute hawe te'onalo kano'amba nowowauo pentoro'ano raha ai wawo wasu. Tempono hawe moowo merumpa, raha la'a lano terowa, akono moroso pentoro'ano.

<sup>49</sup> Kanggo mia henu rumongoio pauNggu kaa lano lumelu'o, umono menggena mia henu mowangu raha ai wawo wute kanggo lalau pentoro'ano rahano. Tempono hawe moowo merumpa, raha la'a ronga terowa, kaa mobea ngako masolano!"

## 7

### *I Yesu mompokotomba atano kapala sorodadu ai inie langkai Kapenau*

<sup>1</sup> Umarino i Yesu mompaguru lowono sie ndi mia orao, Umono lumeko ai inie langkai Kapenau.

<sup>2</sup> Lehea nio aso kapala sorodadu to Roma. Umono mompe'ue aso ata henu nopehohawa'o ngako, ata la'a mahaki mapari.

<sup>3</sup> Tempono kapala sorodadu la'a rumongoio motae i Yesu nio ai inie langkai Kapenau, notena'o ba'opio mia mosu'ono to Yahudi lumeko tepohawe'akeo i Yesu kaa mo'ema kano i Yesu mai mokotomba'o atano.

<sup>4</sup> Towono romentepotowo'akeo i Yesu, rompotae, "Kimpoe'ma takau, Kai tulungio kapala sorodadu la'a. Umono tekonoano bai tulungio,

<sup>5</sup> aka umono mehohawa'o tongkundo ka umonoto henu mobara'a kami powangua Raha Pesomba'a."

<sup>6</sup> Umari sie i Yesu lumeko merongangiro. Towono i Yesu umbeda ai rahano kapala sorodadu la'a, kapala sorodadu la'a montena wali-walino mompohawé oliwi ndi Yesu, "Indoto Ai peladeki mai ai rahanggu, akono iaku nie lano koono tumarima Komiu ai laro rahanggu,

<sup>7</sup> okaa mbo'u laku taha hawe ai aroMiu. Kanggo Ai pepautokaa 'Tombato', matantu atanggu la'a toomba.

<sup>8</sup> Ako iaku nie nio henu parenta akukaa iaku nio mbo'u sorodadu henu kuparenta'o, baku potae'akeo, 'Leko!' Olo lumeko, baku potae'akeo, 'Mai!' Olo mai. Helila'aka mbo'u baku potae'akeo atanggu, 'Wowauoto uniel!' Olo nowowaupo."

<sup>9</sup> I Yesu kohali-hali rumongoio pau la'a, kano'amba mewolili ndi mia orao henu tumonda'iro ka Nopotae, "Oponie Kupohawé pompe'alo-alo henu langkai, ambo huru Kuhawé'o maupo ai olono tongku Isarael!"

<sup>10</sup> Tempono umboro henu tinena hawe ai rahano kapala sorodadu, ata la'a oto toomba.

*I Yesu momule'o ana monguro ai Nai*

<sup>11</sup> Kano'amba i Yesu lumeko ai inie langkai Nai, mperonga-ronga saru anaguruNo kaa mia orao henu tumonda'iro.

<sup>12</sup> Towono i Yesu umbeda ai pangalomba inie langkai la'a, nio ba'opio'iro mia tekonai mompo'aha buleka ana monguro henuto maate mpeluarako umbu ai inie langkai. Ana monguro la'a ana henu aso-aso umbu ai mia waalu\*. Orao mia umbu ai inie langkai la'a tumonda'o ineno.

<sup>13</sup> Ka towono i Ue sumue'o ineno ana ntama la'a, telelu aroa pompehohawano ka Nopotae'akeo, "O ine, indoto pe'iwi!"

<sup>14</sup> Kano'amba i Yesu umumbedahio buleka mia maate la'a ka Nodanggiho. Gagi mia henu mpolembara buleka la'a mpenao-nao. Ka i Yesu motae, "Oo ana monguro, Kupotae'akomu, pewangutol!" <sup>15</sup> Ana monguro henu maate la'a muule oto kano pentoro ka mepau. Kano'amba i Yesu meweangakeo ndi ineno.

<sup>16</sup> Lowono mia mentengiri ka mpo'unde-unde ndi Ue Ala. Nio henu motae, "Ue Ala oto montena nabi henu langkai hawe ai olondo," ka nio mbo'u henu motae, "Hawe'iRoto Ue Ala kumaduduikitò bawaaRo."

<sup>17</sup> Tepalele oto kareba mongkono i Yesu ai lowono wute Yudea kaa petengi-tengi wute Yudea.

*I Yesu kaa i Yohane Puumpodolo*

<sup>18</sup> Towono i Yohane rumongoio umbu ndi anaguruno lele kumonoo mbio henu winowauno i Yesu, nopeboio oruo anaguruno,

<sup>19</sup> ka notena'iro lumeko mesikeno ndi Yesu, "Ikomiutokee Datu Pongkadudui ginantiRo Ue Ala isa'ama henu minggi hawe? Ba danio mbo'ukee mia henu minggi kime'e'emango?"

<sup>20</sup> Anaguruno i Yohane la'a lumeko ndi Yesu ka motae, "I Yohane Puumpodolo tumena kami mesikeno ndi Ikomiuto kee mia ginantiRo i Ue Ala henu minggi hawe ba dano mbo'ukee mia henu minggi kime'e'emango?"

<sup>21</sup> Tempo la'a i Yesu mompokotomba orao mia umbu ai manggerupa haki kaa marasai'a, kaa montambra orao penao mosa'a kaa mbo'u mompokotomba mia morawu karo mposue.

<sup>22</sup> Gagi i Yesu sumangki'o anaguruno i Yohane, "Aimpekuleto ndi Yohane ka pau'akeo mbio henu ai sue'o ka ai rongoio, mia henu morawu oto mosue, mia henu luuka oto koleko-leko, mia henu melowe oto toomba, mia henu mobongo oto morongoi, mia maate oto muule ka mia karampini olo mohawé pom pokomoroso aroa kaa Kareba Moiko.

<sup>23</sup> Memanga'uto mia henu mpihe mompe'alo-alo ndi Iaku kaa henu tumarima Aku."

<sup>24</sup> Towono mia tinenan i Yohane la'a mpekuile, i Yesu mepau ndi mia orao mongkono tinuwuno i Yohane kaa Nopotae, "Mbiokakee aileko mpoggito ai konde one? Monggito seko henu pinurino angikee? Lano'o.

<sup>25</sup> Ba ikomiu lumeko minggi monggito mbio? Mia henu meparewa moikokee? Lano'o mbo'u. Bano mia meparewa moiko ka tuwu manangai olo mo'ia ai rahano datu.

<sup>26</sup> Gagi mombio kai meleko? Minggi mpoggito nabikee? Mentee, i Yohane me'alu langkai kaa nabi.

<sup>27</sup> Kumonoo ai Yohane nio te'uki ai Sura Tutulu helinie, Nopotae Ue Ala, 'Tinieto tinenaNggú'

'Mese'elumiKo,  
umono mowungge sala tiaMu!'

\* <sup>7:12 waalu:</sup> Waalu, irowai ba tama henu somborino ooto maate.

<sup>28</sup> Pewowolo'o, ai olono mia henu pineana'ako lalau maupo te'aso mia henu lalolangkai kaseko ai Yohane Puumpodolo, kanggo henu dedeiki ngako ai laro Pomparenta'aRo Ue Ala lalolangkai kaseko ai Yohane."

<sup>29</sup> Lowono mia ka mbo'u toposima henu rumongoio pauno i Yesu, umboroto mia henu mompe'alo-alo ndi Ue Ala, ako umboro umarito nodolo'iro i Yohane.

<sup>30</sup> Kanggo to Parisi kaa Guru Agama laro mentarima'o po'eheRo Ue Ala ai laro tinuwuro, oto laro mebehe nodolo'iro i Yohane.

<sup>31</sup> Kano'amba i Yesu motae, "Menggena mbiokee Kuponggenahiyo mia tempo nie?"

<sup>32</sup> Umboro menggena ana-ana henu mpentoro ai pasa karo mpesangki-sangki, 'Ikami mpenani-nani manga'ua, kanggo ikomiu laila'a mpenari, ikami mpenani-nani mokokolaro, kanggo ikomiu laila'a mpe'iwi.'

<sup>33</sup> Menggena ula'a mbo'u ikomiu, akono tempono i Yohane Puumpodolo hawe, umono mepuasa kaa lano po'inu anggoro, kanggo ikomiu mpotae, 'Umono nopendamohio onisu!'

<sup>34</sup> Kano'amba Ana Manusia hawe, Umono monggaa kaa mo'inu anggoro, kanggo ikomiu mpotae, 'Kiteo mia la'a! Umono mesoko, molangu, ka mewali-wali'akeo toposima ka mia henu tehala.'

<sup>35</sup> Napono helila'a pande'a umbu ndi Ue Ala mehangga ai lowono mia henu tumarima'iro."

#### *Irowai tehala bokaio i Yesu*

<sup>36</sup> Nio aso to Parisi neeno i Simo. Meboio i Yesu mai monggaa ai rahano. I Yesu lumeko ai rahano kaa mentoro monggaa.

<sup>37</sup> Ai inie langkai la'a nio irowai henu tumuwu ntehala. Tempono rumongoio i Yesu tekoni monggaa ai rahano i Simo, lumekoto umono mowawo buli-buli henu winowau umbu ai wasu puala me'ihi boka mana mo'ahi.

<sup>38</sup> Irowai la'a menggoti ai bungkuno i Yesu umbeda ai kareNo, kano pe'iwi hawe kano mowaha kareno i Yesu aka uwori matano. Kano'amba nopsisio kareno i Yesu aka wuuno hawe mosu'i. Umari la'a no'iki'o kareno i Yesu kano bokaio aka boka mana mo'ahi.

<sup>39</sup> Towono nosue'o i Simo henu winowauno irowai la'a, nopotae ai laro aroano, "Ta'alu mentee su'u mia nie nabi konggonokaa Noto'orio irowai henu bokaio kareNo la'a ooto irowai henu tuwu ai laro hala."

<sup>40</sup> Nopotae i Yesu ndi Simo, "Nio minggi Kupau'akomu."

Sumangki i Simo, "Pau'oto Guru."

<sup>41</sup> I Yesu motae, "Nio oruo mia henu mepasua ndi mia henu mo'utangakero doi, aso mia mo'uta lima etu doi pera, kaa aso mia mbo'u mo'uta lima pulu doi pera.

<sup>42</sup> Akono laro pokobara'o pasuaro, gagi andono inema mbo'u. Bano pohawemu aineakero henu mehohawa'o mia henu mo'utangakero doi?"

<sup>43</sup> Sumangki i Simo, "Bano pohawenggu, mia henu orao pasuano."

Nopotae i Yesu ndi Simo, "Mente sangkimu sie."

<sup>44</sup> Kano'amba i Yesu menggito ndi irowai la'a kano potae'akeo i Simo, "Iaku hawe ai rahamu kanggo lau pasadiao' uwoi wohokino kareNggu. Kiteo irowai nie, nowohokio kareNggu aka uwori matano amba nopsisio aka wuuno.

<sup>45</sup> Iliko Simo lau towo'Aku ka umiki'Aku, kanggo irowai nie mompamula kuhawe lano huru menao-nao umiki'o kareNggu.

<sup>46</sup> Iliko Simo lau bokaio uluNggu, kanggo irowai nie noboakaio kareNggu aka boka mana mo'ahi.

<sup>47</sup> Gagi Kupau'akomu Simo, irowai nie oto orao nopo'ko'enaho pompehohawano akono halano irowai nie henu orao ooto tinolosi. Mia henu dei-dei halano tinolosi, dei-dei mbo'u nopo'ko'enaho pompehohawano."

<sup>48</sup> Kano'amba i Yesu mepau'akeo irowai la'a, "Halamu oto tinolosi."

<sup>49</sup> Mia mesue henu mpentoro monggaa saru i Yesu, kopau-pau ai laro aroaro, "Nokoara'araa Umonoto Ue Ala kano poli montolosi hala!"

<sup>50</sup> Kanggo i Yesu mepau'akeo irowai la'a, "Hangano pompe'alo-alomu ndi Iaku, ikoto kinadudui. Pekuleto ai laro manga'ua."

#### *Irowai-irowai henu parakai'iro i Yesu*

<sup>1</sup> Lano epie umari la'a i Yesu meronga hopulo ka oruo anaguruNo lumeko mompalele Kareba Moiko mongkono Pomparenta'aRo Ue Ala ai sombo inie kaa sombo inie langkai.

<sup>2</sup> Nio mbo'u ba'opio'iro irowai henu tumonda'o i Yesu. Umboro oto pinokolipa umbu ai penao mosa'a ka pinokotomba umbu ai hakiro. Umboro la'a ooto i Maria henu ninee Madalena henu pinokolipa umbu ai opitu penao mosa'a.

<sup>3</sup> Ai Yohana, somborino i Kusa, petewawo mia henu mpo'angga ai po'iangano datu Herode, ai Susana ka orao irowai mesuено. Ako nioro, rotulungio i Yesu kaa anaguruNo.

*Sirime mongkono mia morawo*

<sup>4</sup> Orao mia mengkohawe-hawe umbu ai orao inie langkai mai ndi Yesu. Tempono romerombu, i Yesu mompau'akero sirime menggena unie,

<sup>5</sup> "Nio aso mia henu melere leko morawo wuku pinaho, tekonaino morawo nio henu modonta ai wiwi sala. Wuku pinaho la'a lolola'ango mia kaa nokaango manu-manu hawe pinggo. <sup>6</sup> Kaa mbo'u nio henu modonta ai wute mewasu-wasu. Tempono mesabi wuku pinaho la'a molau akono wuteno mosu'i.

<sup>7</sup> Nio mbo'u henu modonta ai laro seko. Akono tuwu meronga seko, wuku pinaho la'a te'asisi hawe maate.

<sup>8</sup> Kanggo nio mbo'u wuku pinaho la'a henu modonta ai wute monuwo, kano tuwu kolangka-langkai ka mewue aso etu lukano."

Umarino mompau'akero sirime la'a, i Yesu motae, "Ainei mebiri, noporongoito!"

<sup>9</sup> Anaguruno i Yesu mpesikeno ndi Yesu mbio pengkonoano sirime la'a.

<sup>10</sup> I Yesu sumangki'iro, "Ikomiu oto pinowea pande'a kai mento'orio menggena mbio pomparentaRo Ue Ala, kaa ula'a lano pinau'ako ndi mia orao. Kanggo mia mesue pinaguru'ako sirime, karo mpe'i'indoongo, kanggo laro mento'orio mbio henu tegagi kaa romperorongoiakeo kanggo laro mento'orio."

<sup>11</sup> "Tinieto pengkonoano sirime la'a, wuku pinaho la'a ooto pauRo Ue Ala.

<sup>12</sup> Wuku pinaho henu modonta ai wiwi sala la'a menggena pauRo Ue Ala henu norongoio mia. Kanggo hawe Ueno Onisu rumontungo pauRo Ue Ala la'a umbu ai aroaro, hawe karo tai kinadudui akono laro pompe'alo-aloo ndi PauRo Ue Ala.

<sup>13</sup> Wuku pinaho henu modonta ai wute mewasu menggena PauRo Ue Ala henu tempono romerongoio mia, momoiko romentarima'o. Kanggo PauRo Ue Ala la'a lano mehaka ai laro aroaro. Butu saraikaa ropompe'alo-aloo kaa tempono hawe masusa'a, tetadi pompe'alo-aloro.

<sup>14</sup> Wuku pinaho henu modonta ai laro rui menggena PauRo Ue Ala henu romerongoio mia, kanggo umboro konanta-nanta aka tuwuar, sugi'ka manangaia. Gagi lowono sie mebisi'iro karo laro mewue henu moiko.

<sup>15</sup> Wuku pinaho henu modonta ai wute monuwo menggena PauRo Ue Ala henu romerongoio mia, karo menaa'o ai laro aroaro henu takau moiko. Umboro mewue mpihe akono moroso pompe'alo-aloro."

*Sirime mongkono palita*

<sup>16</sup> Kano'amba i Yesu tumangiakero mbo'u sirime nie, "Lalau mia henu mokomelea'o palita kano'amba pupungakeo aka gumba ba numaa'o ai totono poturia. Kanggo olo numaa'o ai wawono dalika, kano lowono mia henu mendamo ai laro raha la'a sumue'o mowineno. <sup>17</sup> Akono lowono henu hilinie lano teto'ori matantu amba teto'ori kaa lowono henu hilinie tewuni, amba minggi winungge kaa sinue su'u.

<sup>18</sup> Ooto usie, kai pesu'uo temomoiko ba helinde ikomiu merongoio PauRo Ue Ala. Akono sombo mia henu tumarima'o PauRo Ue Ala, Ue Ala minggi tumangiakero pande'a kano takau tumo'orio. Kanggo sombo mia henu lano tumarima'o pauRo Ue Ala, napono nopolowolo'o motae noto'orio tedei, usie mbo'u minggi Ro'aleo Ue Ala umbu ndi umono."

*IneNo ka lowono petiaNo i Yesu*

<sup>19</sup> IneNo kaa ba'opio'iro petiano i Yesu hawe minggi tepohawewe'akeo i Yesu kango laro tepohawewe'akeo oraono mia.

<sup>20</sup> Oto kano nio mia lehea motae'akeo ndi Yesu, "Guru, ineMiu kaa petiaMiu nio ai bungkuno. Umboro minggi tepohawewe'akeo."

<sup>21</sup> Kanggo i Yesu motae ndi umboro, "IneNggu kaa petiaNggu ooto umboro henu rumongeo kaa lumeluu'o pauRo Ue Ala."

*I Yesu mokompenao'o ang ma'o*

<sup>22</sup> Ai aso olo i Yesu saru anaguruNo mpe'ula ai bangka. I Yesu motae ndi umboro, "Maito kato mpebangka meleko ai sakino towa." Pewungguako irotu.

<sup>23</sup> Tekonairo mpebangka, i Yesu tekoturi. Bingkosako nio ang ma'o mepuuri ai towa ka uwwoi mendamo ai laro bangka, oto karo pohawewe'akeo abalaa kaa minggi saabu bangkaroo.

<sup>24</sup> AnaguruNo lumikeio i Yesu, karompotae, "Guru, guru, ikitoto minggi mesaabu!"

I Yesu mewangu kaa rumambasio io ang ma'o ai bangka. Io ang ma'o kaa pue la'a menao kano towa la'a gagi mondoto.

<sup>25</sup> Kano'amba i Yesu motae ndi umboro, "Mombio kai tai pompe'alo-aloo ndi Iaku?"

Gagi anaguruNo mentengiri ka memomee karo mpepau-pau aso mia ka aso mia, "Takau makuasa Mia nie, hawe-hawe io angi kaa pue tumonda'o parentaRo!"

*I Yesu tumamba'o penao mosa'a umbu ai mia Gerasa*

<sup>26</sup> Kano'amba i Yesu ka anaguruNo pebangka mpotilalo hawe ai wute Gerasa ai sakino towa Galilea.

<sup>27</sup> Tempono i Yesu metii umbu ai bangka, nio aso tama henu rompendamohio penao mosa'a hawe tumowokio i Yesu. Mia la'a umbu ai inie langkai. Oto epie lano peparewa ka lano behe mo'ia ai raha kanggo ineheno mo'ia ai puuwesu pona'anga mia maate.

<sup>28</sup> Towono tama la'a sumue'o i Yesu, umono kumora kaa menggolutu ai arono i Yesu kano pepau mekora, "Ikomiu minggi mbionganggukee o Yesu AnaRo Ue Ala Henu Pinelangkai? Kupo'ema ndi Ikomiu indo bobarasa aku!"

<sup>29</sup> Mia henu rompendamohio penao mosa'a la'a motae menggena ula'a akono i Yesu oto tumena'iro penao mosa'a mpeluarako umbu ai koroino. Menggoeto umono rompendamohio penao mosa'a, gagi maupo kaeno ka kareno inonggo ako rante ka umono ginagai takau, umono da poli mokobiteho ranteno kano waweo penao mosa'a ai konde molimbo.

<sup>30</sup> I Yesu mesikeno ndi tama la'a, "Aineikee neemu?" Nosangki'o, "Neenggu ai 'Legio'\*," pengkonoano "masowu-sowu." Nosangki'o menggena ula'a akono oto orao penao mosa'a mendamo ai koroino.

<sup>31</sup> Penao mosa'a la'ira mpo'ema ndi Yesu, kano indoro mentinamba leko ai wingke matea.

<sup>32</sup> Ai leeno tamungku umbeda umbu ai po'ianga la'a nio orao ngako boe tekonai mpowusu kaanga. Onisu mosa'a la'ira mpo'ema ndi Yesu karo mebineheako mpendamo ai boe la'ira kaa i Yesu tumarima'o.

<sup>33</sup> Gagi onisu mosa'a la'ira meluarako umbu ai tama la'a karo mpendamo ai boe la'ira. Kano'amba boe la'ira mpolao leki wiwi wingke karo mpetoa ai towa hawe karo memate mo'onu.

<sup>34</sup> Towono mia henu mpogagai boe la'ira sumue'o mbio henu tegagi, rompelulu lumeko ai inie langkai ka inie petengi-tengino mompau'akero mia mbio henu sinuero.

<sup>35</sup> Gagi mia la'ira meleko minggi mengkiteo mbio henu tegagi. Toworo mehawé ndi Yesu, lehea romeuhawé o tama henuto pinokolipa umbu ai penao mosa'a la'a oto mentoru umbeda ai kareno i Yesu. Tama la'a oto meparewa ka pompewowolono oto moiko. Masa memomee umboro ndi Yesu.

<sup>36</sup> Pompakambi boe la'ira henu sumue'o su'u mbio henu tegagi la'a mompau'akero helinde tama pinendamohiro penao mosa'a la'a pinokolipa.

<sup>37</sup> Akono romemomee, lowono mia henu mo'ia ai Gerasa motae ndi Yesu, "Lekoto kaa bintanggami." Gagi i Yesu me'ula ai bangka minggimekule ai Galilea.

<sup>38</sup> Tama henu oto pinokolipa umbu ai penao mosa'a la'a mo'ema kano petonda ndi Yesu. Kanggo i Yesu tumena'o mekule, Nopotae,

<sup>39</sup> "Pekuleto ka palele'o lowono henuto Rowowaau Ue Ala ndi iko."

Gagi tama la'a mekule kaa palele'o ndi mia ai lowono inie ai inie langkai la'a mbio henu nowowauo i Yesu ndi umono.

*I Yesu momule'o anano i Yairu kaa mokotomba'o irowai henu mahaki kerea'a*

<sup>40</sup> Pekuleno i Yesu umbu ai sakino towa Galilea, Umono oto rome'e'emango mia orao kaa umboro memanga'u mentowokio i Yesu.

<sup>41</sup> Hawe aso mia petewawo Raha Pesomba'a neeno i Yairu. Umono menggolutu ai arono i Yesu ka mo'ema kano i Yesu lumeko ai rahano.

<sup>42</sup> Akono anano henu aso-asono tekonai mahaki mapari. Ana la'a ana irowai, ka tinuwuno hopulo ka oruo nta'u. Tekonai i Yesu lumeko ai rahano i Yairu orao mia mpeburo-buroso ai horiNo.

<sup>43</sup> Ai oloro mia orao la'ira, nio aso irowai henu hopulo ka oruo nta'u mahaki kerea'a. Pinggo oto lowono agaagano nopake'o me'ole ai sando kanggo lalau baineitokaa mia henu poli pokotomba'o.

<sup>44</sup> Irowai la'a umumbedahio i Yesu umbu ai bungkuNo kano danggiho tapuno ndolendo hawuno. Umari la'a masa tomba hakino.

<sup>45</sup> I Yesu mesikeno, "Aineikee dumanggihaka?"

Lowono mia lalau mengaku. Nopotae i Peturu, "Guru, orao mia bolilingi Komiu, umboro peburo-buroso ai horiMiu!"

\* <sup>8:30 Legio:</sup> Legio umbu ai pau Yunani, pengkonoano aso batalio sorodadu Romawi henu doano nio opaa sowu ba ono sowu mia.

<sup>46</sup> Kanggo i Yesu motae, "Nio mia dumanggihaKu. Kuto'orio akono nio pabawa meluarako umbu ai koroiNggu."

<sup>47</sup> Irowai la'a oto noto'orio motae winowauno la'a oto teto'ori, oto kano wiihi hawe menggolutu ai arono i Yesu. Kano'amba nopepau ndi mia orao akombio kano danggihi i Yesu kaa motae hakino masa toomba.

<sup>48</sup> I Yesu motae ndi irowai la'a, "AnaNggu, ako pompe'alo-alomu ndi Iaku, hakimu toomba. Lekoto ai laro manga'ua."

<sup>49</sup> Tekonaino i Yesu mepau, hawe aso mia tinena umbu ai rahano i Yairu motae, "Anamuu oto maate, tobuku mbo'u pokomapari'o ai Guru lumeko ai rahamiu."

<sup>50</sup> Tempono i Yesu rumongoio pau la'a, Nopotae ndi Yairu, "Indo momee, masa pompe'alo-aloto ndi Iaku kaa anamu olo muule."

<sup>51</sup> Hawero ai rahano i Yairu, lalau mia henu nobeheakeo i Yesu mendamo ai bolongko butukaa ai Peturu, ai Yohane, ai Yakobu ka mia mosu'ono ana-ana la'a.

<sup>52</sup> Lowono mia lehea tekona mpe'iwi mokokolaro ako ana-ana la'a oto maate. Kanggo i Yesu mepau'akero, "Indoto mpe'iwi. Ana-ana la'a lano maate, butukaa moturi."

<sup>53</sup> Rompo'awa'akeo i Yesu, akono romento'orio ana-ana la'a oto maate.

<sup>54</sup> Kano'amba i Yesu umini'o kaeno ana-ana la'a ka motae, "Pewangguto ana!"

<sup>55</sup> Gagi masa mepenao mbo'u ana-ana la'a kaa masa menggoti. Umari la'a i Yesu tumena'iro pakango.

<sup>56</sup> Mia mosu'ono ana-ana la'a kohali-hali. Kanggo i Yesu lano behe'akero pau'o ndi baineitokaa mbio henu tegagi la'a.

## 9

### *I Yesu tumena'iro hopulo ka oruo anaguruNo*

<sup>1</sup> I Yesu meboi'iro hopulo ka oruo anaguruNo karo mpepokosi kaa i Yesu mowee'iro roso ka pabawa karo bisa montamba penao mosa'a kaa mompokotomba lowono haki.

<sup>2</sup> Kano'amba tumena'iro lumeko mompokotomba mia memahaki ka palele'o Kareba Moiko mongkono pomparentaRo Ue Ala.

<sup>3</sup> Amboro meleko i Yesu umoliwingiro. Nopotae, "Indo powawo mbio-mbio, tuko, pontongo, kaanga, doi, ba parewa pe'eumi.

<sup>4</sup> Bai tinarimato ai aso raha, po'iato lehea hawe tempono ai mebintango inie langkai la'a.

<sup>5</sup> Bano nio inie lano tarima komiu, mpeluarakoto umbu ai inie sie ka tandamio awu umbu ai karemiu, gagi tondonino Ue Ala minggi dumosa'iro."

<sup>6</sup> Umari la'a anaguruNo mpewunggoako meleko ai inie mesueno palele'o Kareba Moiko mongkono Pomparenta'aRo Ue Ala ka mompokotomba mia mahaki ai lowono po'ianga.

### *I Datu Herode kaa i Yesu*

<sup>7</sup> I Datu Herode henu momparenta ai wute Galilea, rumongoio lowono tandangkohali-hali henu winowauno i Yesu. Umono kohali-hali akono nio mia motae i Yesu ooto ai Yohane Puumpodolo henuto muule.

<sup>8</sup> Nio mbo'u mia henu motae, "Ai Elia hawe euno." Kaa nio mbo'u mia motae, "Ue Ala momule'o euno aso nabi henu isa'a."

<sup>9</sup> Kanggo i Datu Herode motae, "Oto kutena'o mia umimpahio uluno i Yohane. Gagi, aineikee mentee'anu mia sie? Oto orao kareba kurongoio mongkono mia sie." Oto kano ai Datu Herode merokuhi kano tepohawe saru i Yesu.

### *I Yesu mompaka olimo sowu mia*

<sup>10</sup> Mpekulero mia tinena la'ira, umboro pau'o ndi Yesu lowono henu umarito rowowauo. Kano'amba i Yesu umuluakero lumeko mpepahe umbu ai oraonganu mia, kaa lumeko umbeda umbu ai inie Besaida karo bisa pekoko'asoi.

<sup>11</sup> Kanggo towono romento'orio mia orao mbio henu tegagi, umboro mpetonda ndi Yesu. I Yesu tumarima'iro kaa mepau ndi umboro mongkono Pomparentaro Ue Ala, kaa Umono mbo'u mompokotomba mia mahaki ai oloro.

<sup>12</sup> Towono wundu olo, kohopulo ka oruo anaguruNo lumeko ndi Yesu ka rompotae, "Guru, tena'iroto mia niire karo meleko mpowusu kaanga ka raha perato'a ai inie petengi-tengino po'ianga nie, akono po'ianga nie tesimpi ka molimbo."

<sup>13</sup> Kanggo i Yesu sumangki'iro, "Ikomiuto henu mowe'akero kaanga."

Ka rompotae, "Butukaa olimo roti ka oruo bou henu nio ndi ikami. Ikamikee henu leko mpo'oli kaanga tiaro mia niire?"

<sup>14</sup> (Bara'ura nio olimo sowu tama lehea).

Kano potae i Yesu ndi anaguruNo, "Tena'iro mia niire mpentoro mperombu, bara'ura aso imperombunga lima pulu mia."

<sup>15</sup> AnaguruNo la'a mewowaau menggena pauno i Yesu ndi umboro ka tumena'iro mpentoro.

<sup>16</sup> Kano'amba i Yesu umaleo olimo roti ka oruo bou la'a kano pekakai mo'unde ndi Umboro Ue Ala. Umari la'a Nosebu-sebungo roti ka bou la'a kano'amba Nopeweangakeo ndi anaguruNo, kano umboroto henu montia ndi mia orao.

<sup>17</sup> Lowono mia mponggaa hawe mowoto. Umari la'a anaguruno i Yesu mokosi'o toreano roti kaa bou la'a, hopulopo ka oruo taru lowono.

#### *Pohaweno i Peturu mongkono i Yesu*

<sup>18</sup> Aso tempo i Yesu tekonaimekakai aso-asono ka anaguruNo mbo'u nio lehea. I Yesu mesikeno ndi umboro "Bano pohawero mia orao, aineikee Iaku nie?"

<sup>19</sup> Sumangki anaguruNo, "Nio mia henu motae Ikomi i Yohane Puumpodolo, nio mbo'u henu motae Ikomi nabi Elia, kaa nio mbo'u mia motae Ikomi nabi henu isa'a muule euno."

<sup>20</sup> Umari la'a i Yesu mesikeno ndi umboro, "Bano pohawemiu, ainei su'ukee Iaku nie?"

Sumangki i Peturu, "Ikomi Datu Pongkadudui umbu ndi umboro Ue Ala."

<sup>21</sup> Kano'amba i Yesu motae ndi anaguruNo, "Indo takau pau'akero mia mesue motae Iakuto Datu Pongkadudui."

#### *I Yesu pau'o mongkono marasai'a kaa mateaNo*

<sup>22</sup> I Yesu motae ndi anaguruNo, "Iaku nie Ana Manusia, matantu minggi marasai ngako ka laro tarima Aku io mia mosu'ono to Yahudi, lowono kapala Petewawo Pesomba, Guru Agama. Umboro minggi pepateaKu. Kanggo ko'otoluno olo Iaku minggi pinokomule euno."

<sup>23</sup> Kano'amba i Yesu motae ndi lowono mia lehea, "Ainei minggi tumonda Aku, indono tonda'o po'eheno kaa nopo'ahango kau pinotamba sombo-sombo olo ka tumonda Aku mpihe.

<sup>24</sup> Akono bainei meotuhakeo tinuwuno ai tolino nie, lano pohawe tuwua lalau tampula'ano. Kanggo bainei meweangakeo tinuwuno akono tonda'Aku minggi mohawte tuwua lalau tampula'ano.

<sup>25</sup> Lalau bua-buano mompe'u aso wawontolino ta'alukaa mokomarasaio tinuwuno.

<sup>26</sup> Bainei lano umakuio motae umono anaguruNggu ka mokokohenu ako pepauNggu, gagi Iaku, Ana Manusia, laKu behe mbo'u umakuio mia la'a gagi anaguruNggu, tempono Iaku hawe soongka buke ako maramba'a, maramba'a henu RoweAku umbu ndi Ue Ala, UmaNggu, merongga mala'eka-mala'eka mempori.

<sup>27</sup> Kai mento'orio, umbu ai olomiu endea nio henu lanolei maate bano taipo sumue'o PomparentaRo Ue Ala."

#### *I Yesu pinokomaramba ai wawo tamungku*

<sup>28</sup> Bara'ura oalu olo umariNo mepau menggena ula'a, i Yesu me'eka mekakai ai tamungku ka Umono umuluakero ai Peturu, ai Yohane ka ai Yakobu lumeko saru Umono.

<sup>29</sup> Tekonaino i Yesu mekakai, ra'iNo me'eua ka parewaNo gagi mopute mongkilo.

<sup>30</sup> Bingkosako nio oruo tama mebitara saru i Yesu ooto i Musa ka i Elia.

<sup>31</sup> Oruo irono la'a mewanta ka mebitara'akeo i Yesu mongkono mateaNo henu minggi pinokosangka ai Yerusale.

<sup>32</sup> Tempono i Yesu tekonai mekakai, i Peturu ka oruo walino tekoturi. Bingkosako umboro mpewangu kaa romesue'o i Yesu mewanta ka oruo nabi menggoti ai horiNo.

<sup>33</sup> Tempono ko'oruo mia la'a minggi bintango i Yesu, i Peturu motae, "Guru, moiko takau tempomami endea nie. Helindekee bakimpowangu otolu laika, aso tiaMiu, aso tiano i Musa, aso tiano i Elia." I Peturu mepau menggena usie akono lano to'orio mbio henu pinauno.

<sup>34</sup> Tekonaino i Peturu mepau, hawe seru tumabobongiro, karo memomee.

<sup>35</sup> Umbo ai laro seru romerongoio Ue Ala mepau, "Timieto AnaNggu henu Kubinikio. Aimperongoika ndi Umono!"

<sup>36</sup> Towono andono terongoi pau umbu ai laro seru, romesue'o bututokaa i Yesu lehea. AnaguruNo henu sumue'o mbio henu umari tegagi tempo la'a laro huru mepaukio ndi baineitokaa.

#### *I Yesu mompokolipa ana-ana henu nopen damohio pena o mosa'*

<sup>37</sup> Mo'oruno i Yesu ka anaguruNo mine'i umbu ai tamungku, orao mia mpeburo-buroso mentowo'Iro.

<sup>38</sup> Bingkosako aso mia ntama umbu ai olono mia orao la'a kumora, "Guru, mai kiteo ari ananggu ka tulungio, butu aso-asono nie ananggu!"

<sup>39</sup> Bano penao mosa'a oto mendamo, bingkosako umono kokora-kora ka mongkodi-kodi hawe kano mewure pinduno. Penao mosa'a la'a mpihe bobarasa'o ananggu ka lano behe meleurako umbu ai koroino.

<sup>40</sup> Umarito kupo'ema ndi anaguruMiu karo tamba'o penao mosa'a la'a kanggo laro poli'o."

<sup>41</sup> Kano'amba i Yesu mepau, "Oo ikomiu mia henu lano pompe'alo-alo ka ikomiu mia henu lano mentee tinuwumiu, minggi hawe te'epie'ako mbo'ukee ku pebawaa'akomiu ka minggi hawe te'epie'ako mbo'ukee Kusabara? Waweo ramai anamu sie!"

<sup>42</sup> Tempono ana-ana la'a lumeko umumbedahio i Yesu, penao mosa'a la'a mepopasi'akeo ana-ana la'a hawe kano mongkodi-kodi. Kanggo i Yesu rumambasio penao mosa'a la'a kano peluarako ka masa toomba ana-ana la'a. Kano'amba i Yesu mokule'o ana-ana la'a ndi umano.

<sup>43a</sup> Lowono mia henu lehea mentengiri kumiteo pabawaRo Ue Ala henu langkai.

#### *I Yesu pau'o mbo'u mongkono mateaNo*

<sup>43b</sup> Tempono mia da mentengiri mengkiteo lowono henu nowowauo i Yesu, Umono mepau ndi anaguruNo,

<sup>44</sup> "Aimperorongoi temomoiko kaa indo kolupeo pinauNggu nie, Ana Manusia minggi pineweangako ai pabawano mia tolino."

<sup>45</sup> Kanggo laro mento'orio anaguru mbio henu pinauno i Yesu, akono da tewuni ndi umboro. Gagi laro mento'orio, ka umboro memomee mpesikenno ndi Yesu mbio pengkonoano pinauNo la'a.

#### *Ainei lalolangkai ai olono anaguru*

<sup>46</sup> Aso tempo anaguruno i Yesu mpegalo mongkono ainei henu lalolangkai ai oloro.

<sup>47</sup> I Yesu tumo'orio pinewowoloro, gagi No'aleo aso ana-ana mai ai horiNo.

<sup>48</sup> Kano'amba i Yesu motae'akero ndi anaguruNo, "Mia henu tumarima'o ana-ana nie ai laro neeNggu, matantu notarima'Aku, ka mia henu tumarima'Aku tumarima'o Umboro Ue Ala henu tumena'Aku. Akono mia henu lalodedeiki ai olomiu, umonoto henu lalolangkai."

#### *Mia lano'o anaguruno i Yesu montamba onisu*

<sup>49</sup> Nopotae i Yohane, "Guru, kimesue'o mia montamba onisu ai laro neeMiu, ka kimpotae'akeo, 'Indo pake'o neeNo guru mami', akono umono lano'o miando."

<sup>50</sup> Nopotae I Yesu, "Indo me'ontongo mia mempake'o neeNggu, ako mia henu lano umewa komiu pengkonoano umboro me'ini ndi ikomiu."

#### *I Yesu lano tinarima ai Samaria*

<sup>51</sup> Towono umbeda tempono i Yesu te'engka ai suruga, Nopokomanoto'o aroaNo lumeko ai inie langkai Yerusal.

<sup>52</sup> Gagi i Yesu montena ba'opio mia mese'elumio minggi pasadia'o lowono henu nopalalu'o i Yesu. Gagi mia tinenaNo la'a meleko ka mpendamo ai aso inie ai Samaria.

<sup>53</sup> Kanggo to Samaria ai inie la'a laro behe tumarima'o i Yesu, akono mentee'ano i Yesu minggi lumeko ai Yerusal.

<sup>54</sup> Tempono oruo anaguruNo ooto ai Yakobu ka i Yohane rumongoio motae to Samaria la'a laro mentarima'o i Yesu, rompotae, "Ue, ineheMiukee ba kimpo'ema apui umbu ai suruga metii mokoropu'o mia niire?"

<sup>55</sup> I Yesu mewolili kano tekudahakero i Yakobu ka i Yohane.

<sup>56</sup> Umari sie karu meleko ai inie mesue.

#### *Mongkono metonda ndi Yesu*

<sup>57</sup> Tempono i Yesu ka anaguruNo motilalo ai Yerusal, nio aso mia motae ndi Yesu, "Minggi kutonda Komiu bainderiotokaa Aileko."

<sup>58</sup> Sumangki i Yesu, "Dahulampu nio aano ka manu-manu nio toruino, kanggo Ana Manusia lalau poturiaNo."

<sup>59</sup> Kano'amba i Yesu mepau'akeo mia mesue, "Tonda'Aku."

Kanggo nopotae mia la'a, "Uma, powee'aku tempo ari aku lumeko tumanungo umanggu."

<sup>60</sup> I Yesu motae, "Po'inengoto mia maate tumanungo mia maate. Kanggo iiko lekoto ka palele'o Kareba Moiko mongkono Pomparenta'aRo Ue Ala."

<sup>61</sup> Ka nio mbo'u mia mesue motae, "Guru, minggi kutonda Komiu kanggo indopo'ari iaku mekule ka metompa ndi mia mosu'onggu."

<sup>62</sup> Nopotae i Yesu ndi mia la'a, "Lowono mia henu motengko kanggo menggito ai bungku, lano koono ai laro Pompsonarenta'aRo Ue Ala."

## 10

### *I Yesu tumena'o pitupulu anaguru*

<sup>1</sup> Umari la'a i Yesu montiso mbo'u pitupulu anaguru mesueno, kano'amba Notena'iro meleko mpe'oru-oruo mese'elumio ai sombo inie langkai ka po'ianga henu minggi Noleko'ario.

<sup>2</sup> Nopotae ndi umboro, "Mia henu oto tekono tumarima'o Kareba Moiko menggena pae henu oto tempono sinowi. Orao henu minggi sinowi kanggo dei-dei mia henu minggi mesowi. Gagi, aimpo'emato ndi Ue Ala, ueNo sowi'a nie, kano pasadia'o mia henu minggi sumowi'o sowi'a sie.

<sup>3</sup> Aimelekoto! Kaa mpe'i'indoongo Iaku tumena komiu menggena bimba ai olono dahulampu.

<sup>4</sup> Indo powawo doi ba kandu-kandu tahine ba sandala mesueno. Indo petabea ndi baineitokaa ai laro koleko-lekoamiu.

<sup>5</sup> Baimpendamo ai aso raha, pau'o se'elu, 'Roodo tiamiu.'

<sup>6</sup> Bano lehea nio mia henu manga'uno moiko'a, petabeamiu la'a minggi mo'ia ndi umono, kanggo bano uuhu, petabeamu la'a minggi mepokule ndi iiko.

<sup>7</sup> Aimpo'iatu ai raha la'a, indo mpelima-limba. Tarima oto kaanga henu nopalena'akomiu, akono mia henu mo'angga konggonokaa mohawe sarono.

<sup>8</sup> Baimpendamo ai aso inie langkai kaa romentowokomiu momoiko, mengkaangoto mbio henu rompopalena'akomiu.

<sup>9</sup> Ka pokotomba'o mia memahaki henu lehea, ka palele'akero motae, 'Kanggo pewowolo'o unie, andono epie mbo'u Pompsonarenta'aRo Ue Ala tegagi ai olomiu.'

<sup>10</sup> Kanggo bai mpendamohio aso inie langkai ka laro mentarimakomiu, ai mpeluarakoto ai sala kai mengkumora,

<sup>11</sup> Napono popawu ai inie langkaimu nie henumekampi ai karemami, kimentandamio gagitondonino motae Ue Ala minggi dumosakomiu. Kanggo pewowolo'o unie, Oto hawe tempono Pompsonarenta'aRo Ue Ala tegagi ai olomiu!

<sup>12</sup> Kupau'akomiu, ai Tampula'ano Wawontolino, dosaro mia ai inie langkai la'a lalomobea kaseko dosaro mia ai inie langkai Sodomol!"

### *Ba'opio inie langkai to Yahudi henu laro pompe'alo-alo*

<sup>13</sup> Memasola komiuto mia Korasi! Memasola komiuto mia Besaida! Akono bano tuduano isa'a ai Tirusu ka ai Sidoni tegagi tandangkohali-hali menggena henu tegagi ai olomiu, matantu umboro oto mentesisi umbu ai halaro ka meparewa umbu ai karu ka monaa popawu ai uluro, gagi tondonino pompesosooro.

<sup>14</sup> Ai Tampula'ano Wawontolino, mia Tirusu ka Sidoni da moruana tinolosi kaseko ikomiu.

<sup>15</sup> Ka ikomiu mia Kapenau! Ikomiu mpewowolo'o, ikomiu minggi pinelangkai ka Rotarimakomiu ai suruga? Uuhu, kanggo Ue Ala minggi mokodedeiki komiu ka Rotadikomiu ai naraka!"

<sup>16</sup> Kano'amba i Yesu motae ndi anaguruNo, "Aineio rumongoi komiu, norongoiAku, ka aineio lano tumarima komiu, umono mbo'u lano tarima'Aku. Kaa aineio lano tarima'Aku, umono mbo'u lano tarima'o Umboro henu tumena'Aku."

### *Pekuleno kopitupulu anaguru*

<sup>17</sup> Karo'amba mpekule kopitupulu anaguru mesueno ndi Yesu. Saru memanga'u rompotae, "Ue, sekonopo onisu metuundu ndi ikami, tempono kimentamba'iro ai laro neeMi."

<sup>18</sup> Ka i Yesu motae ndi umboro, "Oto Kusue'o Ueno Onisu modonta umbu ai langi menggena koliki.

<sup>19</sup> Mentee'ano! Akuto mowee'akomiu roso ka pabawa. Gagi ikomiu minggi numangio lowono pabawano Ueno onisu ka bano ikomiu mola'a ule ka kasi-kasi, ikomiu lailei mpohawe masola'a.

<sup>20</sup> Napono menggena ula'a indolei memanga'u akono onisu metuundu ndi ikomiu, kanggo ai memanga'u akono neemiu oto te'uki ai suruga."

### *Po'unde kaa manga'u*

<sup>21</sup> Ai tempo la'a manga'u i Yesu akono buke ako Penao Mempori ka Nopotae, "Uma, Ueno langi kaa wawontolino! Iaku montarimakase ndi ikomiu, akono ikomiu mewuniakeo

lowono sie umbu ai mia henu pande ka mia pinaguru, kango Ikomiу tumiso'akeo ndi mia henu tai pinaguru. Ooto henu mokomanga'uo aroaMiu Uma

<sup>22</sup> Lowono oto Rowee'akune UmaNggu ndi Iaku. Lailei napono te'aso mia tumo'orio Iaku anaRo, butukaa UmaNggu. Ka lailei napono te'aso mia henu tumo'orio UmaNggu butukaa Iaku ka mia henu Kubinikio karo bisa mento'orio UmaNggu."

<sup>23</sup> Umari la'a i Yesu mewolili ndi anaguruNo ka Nopotae'akero, "Me'ura komiuto akono oto aimesue'o henuto tegagi hilinie.

<sup>24</sup> Pewowolo'o, orao nabi ka datu mokomposue mbio henu aimesue'o hilinie, kango laro mesue'o, kaa mokomporongoi mbio henu aimerongoio hilinie, kango laro meron-gioi."

### *Mia Samaria henu me'aroa moiko*

<sup>25</sup> Aso tempo nio aso Guru Agama hawe umara'arahakeo i Yesu, nopotae, "Guru, mbiroke kupowowau kakupohawe tuwua lalau tumpula'ano?"

<sup>26</sup> Sumangki i Yesu, "Mbio henu te'uki ai laro songkaro i Musa? Mbio henu bata'o lehea?"

<sup>27</sup> Sumangki Guru Agama, "Pehohawa'o Ue Alamu, aso bobokoono aroamu, aso bobokoono sumangamu, lowono morosomu, lowono pompewowolomu kaa pehohawa'o pe'aso miamu menggena au pehohawa'o koroimu."

<sup>28</sup> Nopotae i Yesu, "Mentee usie, lelu'oto kau pohawewe tuwua lalau tumpula'ano."

<sup>29</sup> Kango minggi mokomentee'o koroino, nopotae Guru Agama, "Aineiokee pe'aso miangu?"

<sup>30</sup> Sumangki i Yesu telalo ai aso sirime menggena unie, "Nio aso mia umbu ai inie Yerusal mine'i ai inie Yeriko, ai tonga sala umono tinowoki mia mosa'a gauro, rome'aleo lowono parewano, merodoho hawe minggi maate, karo'amba mebtintango.

<sup>31</sup> Ai tempo sie telalo aso mia Petewawo Pesomba lumaloo sala la'a, nosue'o mia kolero-lero minggi maate, lo'oka metalili lumeko.

<sup>32</sup> Umari la'a telalo mbo'u aso to Lewi henu mo'angga ai Raha Pesomba'a, towonosue'o mia la'a, metalili mbo'u lumeko.

<sup>33</sup> Kano'amba nio aso to Samaria, tekonai lumaloo sala la'a, towonosue'o mia la'a, telelu aroa pompehohawano.

<sup>34</sup> Noleko umumbedahio, nowohokio mobelano ako boka panimbulu kaa anggoro, kano wewesio mobelano. Kano'amba nowue'akeo ai kalide<sup>\*</sup> no, ka nowaweo hawe ai raha perato'a kano parakaio.

<sup>35</sup> Mo'oruno nopolwe'akeo doi oruo pera<sup>†</sup> ndi ueno raha perato'a, nopotae, 'Parakaio mia nie, bano nio tai sombono, amba ku eu'o baku pekule.'

<sup>36</sup> Nopotae i Yesu ndi Guru Agama, "Montonda pohawemu, ainei umbu otolu mia la'a henu gagi pe'aso miano mia binobarasa la'a?"

<sup>37</sup> Nopotae Guru Agama, "Mia henu mompehohawa." Nopotae i Yesu, "Pekuleto, kau lelu'o menggena ula'a!"

### *I Maria ka i Marita*

<sup>38</sup> Kano'amba i Yesu ka anaguruNo motilaloakeo koleko-lekoaro, karo mehawee ai aso inie. Lehea nio aso irowai meneengako i Marita tumarima'o i Yesu ai rahano.

<sup>39</sup> Nio petianoi ai Marita neeno ooto ai Maria. I Maria nie henu mpihe mentoro umbeda ai kareNo i Yesu merorongoiakeo pompaguruNo.

<sup>40</sup> Kango ai Marita mpihe maritu parakaio i Yesu. Gagi noleko ndi Yesu kano potae, "Ue, mombiokee Ikomiу po'inenganggu parakaiKomiu aso-asonggu? Lau pehohawa'akukee? Tena'oto petianggu sie mokowaliakui!"

<sup>41</sup> Kango nosangki'o Ue Yesu, "Marita, Marita! Iiko nanta-nanta ka mokoritu'o koroimu ako manggerupa angga'a,

<sup>42</sup> kaisa'a butukaa aso henu paralu. Ka i Maria oto mobiniki henu moiko, henu lano poli inalo umbu ndi umono."

## 11

### *Mongkono pekakai'a*

<sup>1</sup> Aso tempo i Yesu tekonaimekakai ai aso po'ianga. Towono umari mekakai aso anaguruNo motae, "Ue, paguru kami mekakai, menggena henu nopaguru'akeo i Yohane ndi anaguruno."

\* <sup>10:34</sup> *kalide*: Kalide, menggena ngara mekoroi dedeiki. Mompateke parewa. † <sup>10:35</sup> *pera*: Pera, ai laro basa Yunani oruo doi pera ninee oruo dinare. Aso dinare menggena angkano olino gadi mo'angga aso olo.

<sup>2</sup> I Yesu sumangki'iro Nopotae, "Tabulu ikomiu minggi mpekakai, potaeto menggena unie,

Uma mami, aroanoto lowono mia melangkai Komiu akono Ikomiu Ue Ala henu mempori.

Aroanoto Ikomiu hawe kaa momparenta ai wawontolino.

<sup>3</sup> Powee'akami sombo olo kaangamami henu sangka.

<sup>4</sup> Ka tolosi halamami,

Tulungikami ai tempono ikami me'inara'arahako, gagi indo kimpowowau hala.

Kaa pokolipakami umbu ai pompopandei."

<sup>5</sup> Umari la'a i Yesu mowe'akero sirime, "Bano nio umbu ai olomiu henu lumeko ai rahano petiano entonga wongi ka motae, 'Petia powee'akune ari te'otolu rotimu, ambapo ku eu'o,

<sup>6</sup> akono aso mia wali-walinggu ai koleko-lekoano telalo ai rahanggu. Kanggo ando lalau mbo'u kaanga henu minggi kupalena'akeo!"

<sup>7</sup> Kaa, bano petiamu la'a sumangki umbu ai laro rahano, 'Tulungi'aku ari, indo pokoritu'aku, ooto kupupungo ono ka iroto mpoturi ananggu, gagi laku teko'alo mewangu ka mowee'akomu inemamu.' "

<sup>8</sup> I Yesu motae mbo'u, "Kupau'akomu, napono iiko wali-walino, lano minggi behe mewangu kaa mowee'akomu mbio inemamu. Kanggo akono lalau mokokohenumu mo'ema mpihe, gagi nopewangu mowee'akomu mbio pinaralumu."

<sup>9</sup> Ooto usie Kupau'akomiu, "Aimp'oemato mpihe ndi Ue Ala, kai amba pinowea, aimpowusuto mpihe, kai amba mphawae, aimpekundu-kunduto, kano ono winunggehakomu.

<sup>10</sup> Akono baineitokaa mia henu mo'ema olo mosako ka baineitokaa mia henu mowusu olo mohawé kaa baineitokaa miamekundu-kundu olo winunggehako ono.

<sup>11</sup> Ai olomiu niokee uma henu mowee'akeo anano ule me'ipo bano po'ema bou?

<sup>12</sup> Ba mowee'akeo kasi-kasi, bano po'ema su'ului manu?

<sup>13</sup> Gagi, sekolopo mia henu mosa'a gauno lo'oka noto'orio mowee'akeo henu moiko ndi anano, otokaa Umamu henu ai suruga, Umboro mowee'akeo Penao Mempori ndi baineitokaa mia henu mpo'ema ndi Umboro!"

### *I Yesu kaa i Besebu*

<sup>14</sup> Aso tempo i Yesu montamba penao mosa'a umbu ai mia henu tailomompau ako pinogauno penao mosa'a. Peluarakono penao mosa'a, mia la'a masa mepau. Mengkahalihalito mia orao henu sumue'o kegagia la'a.

<sup>15</sup> Kanggo nio mia henu motae, "Umono montamba penao mosa'a ako pabawano Besebu, ponggawano penao mosa'a."

<sup>16</sup> Nio mbo'u mia minggi mowusu halano i Yesu, gagi karompo'ema kano Umono mowowau aso tandangkohali-hali pompoko'enaho motae Ue Ala henu tumena'O.

<sup>17</sup> Kanggo i Yesu tumo'orio mbio henu nio ai laro aroaro ka pompewowoloro, gagi Nopotae'akero "Bano aso pomparenta'a henu miano mpihe mpe'uweli, konggonokaa pomparenta'a la'a lano moroso, ka aso sombori henu mpihe mpe'ua, konggonokaa mentesia-sia.

<sup>18</sup> Hila'ato mbo'u ai laro pomparentano Ueno Onisu, bano iroka mpihe mpe'uweli, konggonokaa pomparenta'ano la'a lano moroso. Gagi lano mentee bano ikomiu mpotae laku montamba penao mosa'a umbu ai pabawano Besebu.

<sup>19</sup> Mia henu tumonda komiu mbo'u montamba penao mosa'a, lano'okee rompontamba penao mosa'a'ako pabawaRo Ue Ala? Gagi ako pabawano aineio umboro montamba penao mosa'a? Mbio henu rowowauo mia henu tumonda komiu la'a moko'enaho motae lano mentee paumiu la'a.

<sup>20</sup> Iaku montamba onisu ako pabawaRo Ue Ala, ooto la'a tondonino motae oto hawe tempono Pomparenta'aRo Ue Ala tegagi ai olomiu."

<sup>21</sup> "Ueno onisu menggena ueno raha henu moroso ka mpihe gumagaio rahano ako badili. Gagi lalau mia henu bisa rumontungo lowono agaagano.

<sup>22</sup> Kanggo bano nio mia henu takau moroso hawe sumapoio kaa nonangio ueno raha la'a, kano rontungo lowono badili pinerorohino, kano'amba tumiatia'o lowono rinontuno.

<sup>23</sup> Bainei lano tonda'Aku, umono umewa'Aku, kaa bainei lano tulungi'Aku, umono sumolangio angga'aNggu!"

<sup>24</sup> Kano'amba i Yesu motae, "Ta'aluu penao mosa'a meluarako umbu ai mia, umono mo'eko-ekoa ai konde molonda mowusu penao-nao'ano kango lano pohawe. Ooto kano potae, 'Laluombo kupekule ai rahanggu isa'a, ooto mia henu umari kubintango!'

<sup>25</sup> Towono nopekule, nohawe'o mia la'a oto gagii menggenna raha henu moroa kaa momoiko.

<sup>26</sup> Kano'amba noleko ka mowawo opitu onisu henu takau mosa'a kaseko umono. Karo impendamo ka mpo'ia ai larono mia la'a. Ka pok'o'ariano mia la'a tetiangi mosa'a tinuwuno umbu henu se'lunu."

#### *Aineio henu memanga'u*

<sup>27</sup> Tempono i Yesu da mepau, aso irowai umbu ai oloro mia orao motae ndi Umono, "Takau manga'u ineMiu henu me'ana'akoMiu ka mo'uokoMiu!"

<sup>28</sup> I Yesu motae, "Henu takau memanga'u ooto mia henu rumongoio pauRo Ue Ala ka lumelu'o!"

#### *Tondonino i Yunusu*

<sup>29</sup> Tekonaino i Yesu rompewuwuio mia orao, Nopotilalo'akeo pauNo ka Nopotae, "Mosa'angguto gauro mia ai tempo nie. Rompo'ema tandangkohali-hali karo pompe'alo-alo ndi Iaku, kango larolei pinowea saliwano tandangkohali-hali nabi Yunusu.

<sup>30</sup> Helinde nabi Yunusu gagii tandangkohali-hali tiaro mia ai Niniwe, helila'aka mbo'u Ana Manusa minggi gagii tandangkohali-hali tiaro mia tempo nie.

<sup>31</sup> Ai tempono Tampula'ano Wawontolino, datu irowai umbu ai Selata olo muule meronga'akero mia tempo nie, ka dumosa'iro. Isa'a ratu irowai la'a hawee umbu ai tapuno tolino rumorongoio pompaguruno i Solema henu lalompande. Kanggo endea ka tempo nie nio henu lalolangkai kaseko ai Solema.

<sup>32</sup> Ai Tampula'ano Wawontolino, to Niniwe olo muule meronga'akero mia tempo nie, ka dumosa'iro. Akono to Niniwe la'a oto mentesisi umbu ai halaro tempono i Yunusu montutulu'akero. Kanggo endea ka tempo nie nio henu lalolangkai kaseko ai Yunusu!"

#### *Palita koroi*

<sup>33</sup> Lalau mia henu mosunu palita kano leko wunio ba nopupungo ako baso. Kanggo olo nonaa'o ai wawono dalika gagii lowono mia henu mendamo ai raha la'a sumue'o wantano.

<sup>34</sup> Matamu oto palitanu koroiimu, bano matamu molino lowono koroiimu mowine, kango bano matamu morawu-rawu, lowono koroiimu wongi-wongi.

<sup>35</sup> Gagi aimpegagaikaa kano mowine henu ai koroiimu indono gagii wongi-wongi.

<sup>36</sup> Kanggo bano aso koroiimu mowine kaa lalau napo asontia henu wongi-wongi, aso koroiimu olo mowine menggenna mowineno palita."

#### *I Yesu mongkuahako to Parisi kaa Guru Agama*

<sup>37</sup> Umarino i Yesu mompaguru, nio aso to Parisi meboi'Iro lumeko monggaai rahano. Gagi Umono lumeko monggaai lehea.

<sup>38</sup> Mia Parisi la'a kohali-hali, kumiteo i Yesu monggaai lano wohokio se'elu kaeNo menggenna atora agama Yahudi.

<sup>39</sup> Kanggo Ue Yesu motae'akero, "Ikomiuka su'u to Parisi baimpolodui butukaa ai bungkuno kumba'a ka kangkiri aimewohokio. Kanggo ai laro aroamii buke ako aroa mosa'a ka meraaho.

<sup>40</sup> O ikomiu mia mebeebe, lano'okee Ue Ala henu mokogagi'o koroiimu ka henu mokogagi'o mbo'u mbio henu nio ai laro aroamii?

<sup>41</sup> Kanggo tia-tia'akero mbiotokaa henu nio ndi iiko ai laro moputeno aroamii ndi mia karampini, ako hil'a'aka ikomiu gagii moroa ai aroRo Ue Ala.

<sup>42</sup> Memasola ikomiuto to Parisi! Ako ikomiu mompowea pesomba tia hopulono ndi Umboro Ue Ala, hawee-hawee umbu ai wueno leremiu henu lalau olino menggenna bungantulasi kaa lemorumpa kaa manggerupa inehu mesueno, kango laimpehohawa'iRo Ue Alamu ka ikomiu memobea aso hile. Mentee'anu ula'akaa henu aimewowaou ka indo mengkulapeo henu mesueno.

<sup>43</sup> Memasola komiuto to Parisi! Manga'umi mentoro ai pentoro'a pinelangkai ai laro Raha Pesomba'a, kaa manga'umi pinelangkai ai pasa.

<sup>44</sup> Memasola komiuto, ikomiu menggenna kaburu henu nolola'ango mia akono tainio misano."

<sup>45</sup> Aso mia umbu ai oloro Guru Agama motae ndi Yesu, "Guru, Ikomiu mokodedeiki kami ako pauMiu sie!"

<sup>46</sup> Kanggo sumangki i Yesu, "Memasola komiuto mbo'u, Guru Agama! Ikomiu mokoritu'o mia orao ako atora agama henu mobea tinonda. Kanggo ikomiu laila'a tumonda'o atora sie.

<sup>47</sup> Memasola komiuto! Ikomiu mowowau kaburu tiaro nabi-nabi henu pinepatero ue mpu'umiu.

<sup>48</sup> Gagi ikomiu meindu'o motae ikomiu mokomentee'o gauro ue mpu'umiu henu mpepate'iro nabi-nabi kai mpowowau euno kabururo.

<sup>49</sup> Akono usieto isa'a ako pandeRo Ue Ala motae, 'Taku minggi tumena'o nabi-nabi ka mia tinenaNggu ndi umboro, asontia olo pinepate ka asontia olo binobarasa!

<sup>50</sup> Ula'a Rowowau Ue Ala kano lowono mia tempo nie dinosa akono rea pompepatea henu rowowauo ndi lowono nabi umbu pompamula'ano tolino,

<sup>51</sup> mompamula umbu ai Habeli pinepate hawe ai Sakaria henu pinepate ai olono posunua pesomba ka Raha Pesomba'a.' Kupau'akomiu, 'Lowono mia tempo nie olo dinosa akono lowono sie.'

<sup>52</sup> Memasola komiuto Guru Agama! Akono ai me'aleoto umbu'ano pande'a kanggo laila'a mpendamo ka mia henu merukuhi minggi mpendamo lai mebehe'iro mpendamo.'

<sup>53</sup> Towono i Yesu bintango po'ianga la'a, to Parisi ka Guru Agama takau umuwelio i Yesu, gagi umboro mpihе merukuhi mpesikeno manggerupa ndi Yesu.

<sup>54</sup> Ooto karo mpowusu sala umbu ai pauno i Yesu karo poli pasala'o i Yesu.

## 12

### *Pompaguru tiano anaguru*

<sup>1</sup> Tempo la'a masowu-sowu mia menterombu ka mpeburo-buroso umbeda ndi Yesu, hawe-hawe kano nio mia henu linola'a karen. Kano'amba i Yesu mompamula mompaguru, amba-ambano ndi anaguruNo, Nopotae'akero, 'Aimpegaga-gagaikaa umbu ndi mia mompemiamoiko ooto to Parisi.

<sup>2</sup> Lowono mbio henu lano tet'ori olo tet'ori.

<sup>3</sup> Henu pinau mewuni-wuni olo tet'ori mia orao ka henu pinau mehaho-haho ai laro bolongko minggi pinalele ndi mia orao.

<sup>4</sup> Kupau'akomiu, o wali-waliNggu indo momee'akero mia henu bisa mompepate koroi kanggo laro mempoli mpowowau me'alu ka usie.

<sup>5</sup> Mentee'ano olo Kutiso'akomiu ndi ainei ai memomee. Momeeto ndi Ue Ala! Akono papabawaRo Ue Ala lanola'a butu mompepate kanggo saru montadi mia ai laro naraka! Mperorongoioka henu Kupau'akomiu, momeeto ndi Umboro Ue Ala!

<sup>6</sup> Olimo dii-dii inasa oruo mata doi henu dedeiki. Kanggo lalau napo te'aso henu Rokulupeo Ue Ala.

<sup>7</sup> Maupo doano nanggeno wuumiu Roto'orio Ue Ala. Gagi indo momee! Akono olimiu takau masuli kaseko dii-dii.

<sup>8</sup> Kupau'akomiu, 'Lowono mia henu umakui'Aku ai arono mia orao, Ana Manusia mbo'u olo umakuo ai arono mala'eka-mala'ekaRo Ue Ala.

<sup>9</sup> Kanggo mia henu humapu'Aku ai arono mia orao, umono mbo'u olo Kuhapuio ai arono mala'eka-mala'ekaRo Ue Ala.

<sup>10</sup> Bano nio mia moluarako pau umewa'o Ana Manusia, umono olo tinolosi, kanggo mia henu me'uru-uru'o Penao Memperi, lanolei tinolosi halano.

<sup>11</sup> Bano ikomiu winawo minggi binitara ai Raha Pesomba'a ba ai aroro mia henu momparenta ba mia henu langkai potorono, indo momee helinde ikomiu minggi umaropi'iro ka mbio henu minggi sangki'o.

<sup>12</sup> Akono tempo la'a mbo'u Penao Memperi minggi paguru komiu helinde ikomiu minggi sumangki'iro.'

### *Sirime mongkono mia suugi henu bebe*

<sup>13</sup> Aso mia umbu ai olono mia orao mepau ndi Yesu, "Guru, pepau'akeo petianggu kano tia-tia'okaa agaaga henu binintano mia mosu'omami ndi iaku."

<sup>14</sup> Kanggo i Yesu motae, "Petia, ainei umengkahaKu gagи po'utuhi kara-kara tumia'o agaaga ai olomiu?"

<sup>15</sup> Kano'amba i Yesu mepau ndi mia orao henu nio lehea, "Aimpegaga-gagai pekokoongo, indo memesoko. Akono napono agaagando orao kanggo tuwuando nie lanola'a umbu ai sugil'a."

<sup>16</sup> Kano'amba Nopau'akero aso sirime, "Nio aso mia suugi, henu mompe'ue lere henu malua ka wueno lereno orao ngako.

<sup>17</sup> Mia suugi la'a kopau-pau ai laro aroano, 'Ando lalau mbo'u pona'anga wueno lerenggu. Mbio henu olo kuwowau'o?'

<sup>18</sup> Kano'amba mepau mbo'u ai laro aroano, 'Ooto unie henu minggi kuwowau'o, minggi kutena'o mia betaho tu'oranggu kaku amba mowangu mbo'u tu'ora henu langkai, leheato kunaa'o lowono wueno lere kaa lowono agaaganggu.'

<sup>19</sup> Kano'amba iaku motae ai laro aroanggu, 'Iaku mia suugi kaa agaaganggu sangka tiano mata'u-ta'u epieno. Hilinie iaku mo'ia'ia tokaa, monggaa, mo'inu ka mompemasana!'

<sup>20</sup> Kanggo Ue Ala mepau ndi mia suugi sie, 'Hei mia bebe, wongi nie penaomu minggi inalo umbu ai koroimu, gagi tiano aineiokee sugi'a pinokosimu sie?'

<sup>21</sup> Kano'amba i Yesu pau'o pengkonoano sirime la'a, 'Hila'ato gagino mia henu suugi butu tiano koroino, kanggo lano suugi ai aroRo Ue Ala.'

*Sirime mongkono nanta-nanta*

<sup>22</sup> Umari la'a i Yesu mepau ndi anaguruNo, "Gagi Kupau'akomiu, 'Indo nanta-nanta mongkono tuwuamiu, mbio henu minggi mengkaango bambio henu minggi pinakemiu.'

<sup>23</sup> Akono tuwua laloako mabua kaseko kaanga ka koroi laloako mabua kaseko parewa.

<sup>24</sup> Pekokoongo paa-paa, umboro laro mporawo, laro mpesowi, laro pompe'ue tu'ora kanggo Ue Ala motuwu'iro. Ikomiu takau masuli kaseko orao manu-manu!

<sup>25</sup> Lalau napo te'aso mia umbu ai olomiu henu ako nanta-nantano nopol'i'o mokomen-taa'tinuwuno napo aso olo tokaa.

<sup>26</sup> Gagi, mongkono henu dedeiki tokaa lai mempoli'o melelu'o, ikomiu indoto konanta-nanta mongkono henu mesue!

<sup>27</sup> Pekokoongo helinde tuwuno bunga baku, lano po'angga, lano pontanu bana. Kanggo Kupau'akomiu, Datu Solema henu takau suugi mbo'u lano meparewa henu moiko mengena bunga la'a!

<sup>28</sup> Seko ai konde olo nie tuwu ka mo'oru olo sinongko hawe pinggo, kanggo Ue Ala parakaio seko la'a moiko ngako. Me'alu takau Roparakai komiu Ue Ala, kanggo ikomiu lai pompe'alo-alo lahi!

<sup>29</sup> Gagi, indoto nanta-nanta kaa bulalingo mongkono mbio henu minggi kinaa ka minggi ininu.

<sup>30</sup> Akono lowono sie mpihe romewusu'o mia henu lano pompe'alo-alo ndi Ue Ala. Kanggo Umando henu ai suruga Roto'orio mbio henu pinaralumiu.

<sup>31</sup> Pokose'elu'o Pomparenta'aRo Ue Ala ai laro tinuwumi, gagi lowono sie olo Rotiangiakomiu.

<sup>32</sup> Indo momee! Bano butu dei-dei doamiu, ako manga'u Umamiu mondamokomiu ai laro PomparentaRo.

<sup>33</sup> Asa'o agaagamu, ka peweangakeo doino ndi mia karampini! Powowauto bangi-bangi henu tai huru mosu'o, ooto agaaga henu ninaa ai suruga. Agaaga la'a lano tetadi akono lano pokonakoo mia ka lano kaango ane.

<sup>34</sup> Naa'o agaagamu ai suruga akono ainderio agaagamu nopo'ia, lehea mbo'u aroamu nopo'ia!"

*Pegagai mpihe*

<sup>35</sup> "Aimpegagaikaa umaro'o lowono henu tegagi. Ikomiu olo meparewa mpihe ka palitamu olo melea mpihe.

<sup>36</sup> Menggena ata minggi mpetete'ema ponggawaromekule umbu ai posara'a pesombori'a. Gagi, bano pekule ka mekundu-kundu ai ono, mongkado rowunggeho ono la'a.

<sup>37</sup> Memanga'uto ata henu nohaw'e'pongawaro tekonai mpetete'ema. Kupau'akomiu, aimpe'ale-aleo, ponggawa la'a olo tumena'iro pentoro mpoggaa, ka umono meparewa mengena ata kano parakai'iro.

<sup>38</sup> Memanga'uto ata la'a ta'alu ponggawaro humawewe'iro tekonai mpetete'ema, napono nohaw'e entonga wongi ba umbeda meene!

<sup>39</sup> Pewowolo! Bano ueno raha tumo'orio tempono mia monako hawe, olo nogagaio mia monako la'a indono pendamo ai laro rahano.

<sup>40</sup> Moikono ikomiu mbo'u mpihe mpegagai akono laimento'orio tempono Ana Manusia minggi hawe."

<sup>41</sup> I Peturu mesikeno, "Ue, sirime nie pinokono'ako butu tihammi ba mbo'u saru tiaro lowono mia?"

<sup>42</sup> Sumangki i Ue, "Aineio ata henu metenunu ka paande? Umonoto mia henu no'engkaho ponggawano gagi petewawo tiaro ata mesuено ka powee'akero kaanga ai tempo mpoggaa.

<sup>43</sup> Memanga'uto ata la'a bano ponggawaromekule kano nohaw'e'tekonai po'angga!

<sup>44</sup> Kupau'akomiu, 'Ponggawa la'a olo nope'ale-ale'akeo lowono agaagano ndi mia momparakai la'a.'

<sup>45</sup> Kanggo bano ata la'a motae ai laro aroano, 'Da epie kano'amba mekule ponggawanggu,' ooto kano rodoho lowono ata la'a kano ponggaa, mo'inu hawe kano molangu,

<sup>46</sup> kanggo ponggawano mekule ai tempo olo lano teto'ori gagi ata la'a olo pinepate ka ginau menggena mia henu lano pompe'alo-alo ndi Ue Ala.

<sup>47</sup> Bano nio ata henu tumo'orio ineheno ponggawano kanggo lano lelu'o olo sinepi temekora.

<sup>48</sup> Kanggo sombo ata henu lano to'orio ineheno ponggawano kaa mowowau henu lano mentee olo sinepi me'o'arai. Akono mia henuto pinowea orao olo orao mbo'u inema umbu ndi umono, ka mia henuto pine'alo-aloakeo orao olo orao mbo'u inema umbu ndi umono."

### *I Yesu mowawo teponisala'a*

<sup>49</sup> I Yesu motae, "Iaku hawe mowawo apui teponisala'a ai wawontolino. IneheNggu ngako bano meleato apui teponisala'a la'a!"

<sup>50</sup> Danio marasaia henu olo Kuhoringo. Ka lano todo ngako aroaNggu bano taipo tegagi marasaia la'a!

<sup>51</sup> Indo mengko'ara'ara Iaku nie hawe mowawo roodo ai wawontolino. Kupotae'akomiu, lano'o roodo kanggo teponisala'a.

<sup>52</sup> Momparamula tempo nie ai laro sombori henu olimo mia olo teponisala, otolu umewa'o oruo mia, ba oruo umewa'o otolu mia.

<sup>53</sup> Uma olo umewa'o ana ntamano ka ana ntama olo umewa'o umano, ine olo umewa'o ana irowaino ka ana irowai umewa'o ineno, ineno tama umewa'o somborino ana ntamano ka somborino ana ntama umewa'o ineno tama."

### *Ponto'ori tondonino tempo nie*

<sup>54</sup> Kano'amba i Yesu mepau ndi mia orao, "Bano nio seru me'umbulako metotosooka, ikomiu mpotae, 'Minggi use' masa tii su'u use.

<sup>55</sup> Ta'alu ikomiu mesue'o ang iepuuri umbu ai selata, ikomiu mpotae, 'Minggi me'olo' kaa me'olo su'u.

<sup>56</sup> Ikomiu mia mompemiamoiko! Tondonino langi ka tolino aimento'orio, kanggo mombio kai laimento'orio henu minggi gagi tempo nie?

<sup>57</sup> Akombio kai lai mempoli'o bano butu ikomiu henu putuio mbio henu mentee?

<sup>58</sup> Ta'alu ikomiu merongga uwelimi lumeko me'aro ndi mia pomparenta, perukuhito tepomoiko saru uwelimi ai tonga sala, kano lano wawoko ndi mia po'utuhi kara-kara, ka mia po'utuhi kara-kara meweangakomu ndi petotoino ka petotoino mondamoko ai laro tarungku.

<sup>59</sup> Kupau'akomu, iiko laulei linuarako umbu ai tarungku bano lano leso bara'o posurumu."

## 13

### *Hala kaa marasaia*

<sup>1</sup> Ai tempo la'a ba'opio mia umumbedahio i Yesu pau'o lele mongkono mia Galilea henu pinepateno i Gubenuru Pilatu. Umboro la'a pinepate tekonai mogere pinotuwu henu minggi pinesomba'ako ndi Ue Ala.

<sup>2</sup> I Yesu mepau ndi umboro helinie, "Gagi ikomiu mengkararaa mia Galilea sie takau orao halano kaseko mia Galilea mesueno, kano pinepate menggena usie?"

<sup>3</sup> Kupau'akomiu, 'Matantu uuhu!' Kanggo bano ikomiu lai mentesisi, lowomiu mbo'u minggi maate menggena umboro.

<sup>4</sup> Usieto mbo'u menggena hopulo ka oalu mia henu maate ai Siloa tempono notumpai'iro manara la'a. Indo ko'ara'ara, takau orao halano kaseko lowono mia mesue henu mo'ia ai Yerusele.

<sup>5</sup> 'Matantu uuhu!' Kupotae ndi komiu pihepo mbo'u, bano ikomiu lai mentesisi umbu ai halamiu, lowomiu mbo'u minggi maate menggena umboro."

### *Sirime mongkono pu'unngkau ara henu lano mewue*

<sup>6</sup> Umari la'a i Yesu mompau'akero mbo'u sirime nie, "Nio aso mia ueno lere anggoro, mompe'ue aso ngkau pu'uno ara henu pinaho ai lereno. Aso olo umono lumeko mowusu wueno ara la'a, kanggo lalau nophohawé."

<sup>7</sup> Gagi, nopolata ndi mia henu parakaio lereno, 'Kiteo, ooto otolu nta'u kuhawé mowusu wue ara ai pu'uno nie, kanggo lano huru kupohawé napo te'aso. Tuehioto pu'u ngkau nie! Lalau buano notuwu ai wute nie!'

<sup>8</sup> Kanggo nosangki'o mia henu parakaio lereno la'a, 'Ponggawa, po'inengoto kano tuwu aso nta'upo mbo'u. Minggi kubingku'o wute mebolili ka morawohakeo pupu.'

<sup>9</sup> Kembuano ta'u ramai olo mewue. Bano taimewue, tuehioto! ”

*I Yesu mompokotomba irowai henu bongkohu ai olo penao-nao'a to Yahudi*

<sup>10</sup> Ai aso olo penao-nao'a to Yahudi, i Yesu tekonai mompaguru ai laro aso Raha Pesomba'a.

<sup>11</sup> Lehea nio aso irowai henuto hopulo ka oalu nta'u nopendamohio penao mosa'a ooto kano mahaki hawe kano bongkohu kaa lano bisa mbo'u menggoti momoli.

<sup>12</sup> Tempono i Yesu sumue'o irowai la'a, Nopeboio kaa Nopotae ndi umono “Ine, hakimiu oto toomba!”

<sup>13</sup> Kano'amba i Yesu dumanggiho uluno irowai la'a aka kaeNo, bingkosako irowai la'a momoli nopenggoti ka no'unde-unde'iRo Ue Ala.

<sup>14</sup> Kanggo petewaho Raha Pesomba'a tekuda, akono i Yesu mompokotomba mia ai olo penao-nao'a to Yahudi, kano potae ndi mia orao, “Nio onoo olo po'angga'a, aimemaito ai olo la'a kai pinokotomba, indono'o memai ai olo penao-nao'a to Yahudi!”

<sup>15</sup> Kanggo Nopotae i Ue Yesu, “Ikomiu nie mia mompemiamoiko! Ai olo penao-nao'a to Yahudi lowono mia mokolipaho sapi ba kalideno umbu ai lolano ka waweo ai po'inungaro.

<sup>16</sup> Endea nio aso irowai umbu ai inuleno i Burahima henuto hopulo ka oalu nta'u no'onggo'o Ueno Onisu, bano pohawerniu lano moikokee umono pinokolipa umbu ai onggonai olo penao-nao'a to Yahudi?”

<sup>17</sup> Tempono i Yesu motae menggena ula'a, lowono mia henu umewa'O gagi mokoko-henu, kango wali mia memanga'u akono lowono tandangkohali-hali henu winowauNo.

*Sirime mongkono wuku pinaho kaa tape*

<sup>18</sup> I Yesu motae, “Bano Iaku minggi mompake io sirime, menggena mbiokee Kupongge-naho Pomparenta'aRo Ue Ala?

<sup>19</sup> Usie menggena wuku pinaho henu dedeiki ngako henu rinawo mia ai lereno. Wuku la'a tuwu hawe gagi pu'u ngkau langkai ka manu-manu metorui ai sampa-sampano.”

<sup>20</sup> Ka Nopotae mbo'u, “Menggena mbiokee Kuponggenaho Pomparenta'aRo Ue Ala?

<sup>21</sup> Usie menggena tape henu nohola'o aso irowai ai laro tolupulu kilo tarigu hawe kano te'ilii lowo.”

*Ono henu masipa*

<sup>22</sup> Kano'amba i Yesu motilalo ai Yerusale, ai koleko-lekoaN No i Yesu mompaguru mongkono Pomparenta'aRo Ue Ala ai inie-inie ka inie-inie langkai.

<sup>23</sup> Ka nio aso mia mesikenoi ndi Yesu, “Ue, butu deideikee mia henu pinowea tuwua tainio tampula'ano?”

<sup>24</sup> Sumangki i Yesu ndi lowono mia henu nio lehea, “Aimperukuhito pendamo ai ono henu misipa. Kupau'akomiu, orao mia merukuhi minggi mendamo kanggo laro tepondamo.

<sup>25</sup> Tempono ueno raha menggoti ka modampo onono, ikomiu mpenggoti ai arono raha kamekundu-kundu ai onono ka mpotae, ‘Ponggawa, wunggehakami onomiu! Kanggo umono sumangki, ‘Laku to'orio umbu'a miu!’

<sup>26</sup> Ikomiu minggi mesumangki, ‘Ikami umari mpoggaa ka mpo'ini mperongan-gaKomiu, ka Ikomiu mbo'u umari mompaguru ai inie langkaimami!

<sup>27</sup> Kanggo Umono olo motae mbo'u ndi ikomiu, ‘Laku to'orio umbu'amiu. Polao umbu ai aroNggu, ikomiu henu pelelu mosa'a!

<sup>28</sup> Tempono ikomiu sumue'o ai Burahima, ai Isaki kaa ai Yako mperonga lowono nabi memanga'u ai laro Pomparenta'aRo Ue Ala, ikomiu olo mpe'iwi sesedu kaa marasai akono ikomiu pinetadiako ai bungkuno!

<sup>29</sup> Orao mia olo mehawe umbu ai lowono siuno po'ianga ai wawontolino ka olo memanga'u ai laro Pomparenta'aRo Ue Ala.

<sup>30</sup> Mia henu hilinie pine'uru-uru, ai tempo la'a olo pinelangkai. Mia henu hilinie pinelangkai, ai tempo la'a olo pine'uru-uru.”

*Utuli tiano Yerusale*

<sup>31</sup> Ai tempo la'a nio ba'opio mia Parisi hawe ndi Yesu ka rompotae, “Lekoto, polaoakeo po'ianga nie akono Datu Herode minggi mepateKo.”

<sup>32</sup> Nosangki'iro, “Lekoto ka pau'akeo ndi dahulampu sie, ‘Olo nie ka mo'oru Iaku montamba onisu ka mompokotomba mia mahaki, ka ko'otoluno olo Kupoko'umario angga'aNggu.’

<sup>33</sup> Kanggo olo nie, mo'oru ka te'epua Iaku matilaloakeo koleko-lekoaN Nggu, akono lano moiko bano aso nabi pinepate ai saliwano inie langkai Yerusale.

<sup>34</sup> O mia Yerusele! Ikomiuto henu pepateiro nabi-nabi! Ka meratu'iro ako wasu hawe maate lowono mia tinenaRo Ue Ala! Oto menggopio Iaku mo'osu rumombungo ana-anamiu menggena ineno manu kumasipapa'o ana-anano ai totono panino, kanggo lai mebehe!

<sup>35</sup> Matantuno rahamu nie bininta kano gagi molimbo. Kanggo Kupau'akomiu, andolei sue'Aku mbo'u hawe ai tempono ikomiu mpotae,

Rinosoto Umono henu hawe ai laro neeRo Ue Ala."

## 14

*I Yesu mompokotomba mbo'u mia mahaki ai olo penao-nao'a to Yahudi*

<sup>1</sup> Aso tempo ai olo penao-nao'a to Yahudi, i Yesu lumeko monggaa ai rahano aso petewawono to Parisi. Lowono to Parisi henu lehea takau rompekokoongo mbio henu minggi Nowowaau i Yesu.

<sup>2</sup> Bingkosako hawe aso tama henu mahaki lambangkare kaa lambangkae, mentoro ai arono i Yesu.

<sup>3</sup> Kano'amba i Yesu mesikeno ndi Guru Agama kaa to Parisi, "Moikokee mompokotomba ai olo penao-nao'a to Yahudi ba uuhukkee?"

<sup>4</sup> Kanggo umboro butu mengkomino. Kano'amba i Yesu uminio ka mokotomba'o mia mahaki la'a, ka Notena'o lumeko.

<sup>5</sup> Kano'amba i Yesu mepau ndi umboro, "Aineiokee ai olomiu henu lano ronga wue'akeo bano anano ba sapino tedonta ai laro bunto napono ai olo penao-nao'a to Yahudi?"

<sup>6</sup> Guru agama kaa to Parisi laro mentaha mesumangki.

*Pentoro'a henu pinelangkai ka henu tetotoako*

<sup>7</sup> I Yesu sumue'o orao totoka mobiniki pentoro'a henu pinelangkai, gagi i Yesu mompau'akero pompaguru nie.

<sup>8</sup> "Bano nio mia meboikomiu lumeko ai posara'a pesombori'a, indo pentoro ai po'iangga henu pinelangkai. Bara'ura mia la'a oto mompeboi mia mesueno henu lalo pinelangkai kaseko iiko,

<sup>9</sup> indono ueno posara'a leko ndi iiko kaa mepau'akomu, 'Wee'akeo pentoro'amu ndi mia nie. Gagi iiko mokokohenu melimba mentoro ai tetotoakoano.'

<sup>10</sup> Kanggo bano iiko pineboi ai posara'a, pentoroto ai tetotoakoano. Gagi bara'ura ueno posara'a mai kaa mepau'akomu, 'Petia, pelimbato ai pentoro'a pinelangkai ai arono. Gagi menggena usie iiko mohawe pompelangkai umbu penggitoro totoka mesue.'

<sup>11</sup> Akono bainei mompelangka-langkai olo pinokodedeiki, kanggo bainei me'urumako olo pinelangkai.' "

*Ainei henu olo pineboi*

<sup>12</sup> Umari la'a i Yesu mepau'akeo ueno posara'a, "Bano iiko mompeboi mia mai mponggaa tonga olo ba wongi ai rahamu, indo peboio wali-walimu ba petiamu ba petia umbedamu ba petengi-tengi rahamu henu mesugi, akono matantu umboro poli umowohio winowaumu ndi umboro.

<sup>13</sup> Kanggo bai minggi mowowau posara'a, peboi'iroto mia karampini, mia salantuwu, mia luuka kaa mia morawu.

<sup>14</sup> Iiko minggi binarakati, ako mia siire laro mempoli umuwohio winowaumu henu moiko. Kanggo Ue Ala henu minggi umuwohiko henu moiko ai tempono mia memoiko pinomule umbu ai matea."

*Sirime mongkono mia henu me'alasa*

<sup>15</sup> Rumongoio pauno i Yesu la'a, aso mia umbu ai totoka mepau ndi Yesu, "Meura'oto mia henu pineboi monggaa meronga'akeRo Ue Ala ai laro Pomparenta'aRo Ue Ala henu amba ramai."

<sup>16</sup> Kanggo i Yesu mepau ndi mia la'a, "Aso tempo nio aso mia mowowau posara'a langkai ka mompeboi orao mia.

<sup>17</sup> Towono oto hawe tempono posara'a la'a minggi pinamula, ueno pomposara tumena'o atanu lumeko ndi mia henu pineboi ka motae'akero, 'Memaito ako lowono oto tepalena.'

<sup>18</sup> Kanggo umboro sisigge mpo'ema karu mina'api. Mia henu ko'aso motae ndi ata la'a, 'Tabeamu, dapoku umari mo'oli wute pelere'a danie gagi minggi kuleko kumiteo ari.'

<sup>19</sup> Mia henu mesue motae, 'Tabeamu, dapoku umari mo'oli olimo timbano sapi kaa minggi ku'ara'arahakeo mo'angga'ako.'

<sup>20</sup> Mia henu mesue mbo'u motae, 'Tabeamiu, da sarai kuplesombori, gagi laku lei mai.'

<sup>21</sup> Ata la'a mekule ka pau'akeo ponggawano lowono henu tegagi. Tekuda ngako ponggawano kano potae ndi atanu, 'Temongkadoto leko ai sala langkai ka sala dedeiki ai

laru inie langkai. Umari la'a waweiro ramai mia karampini, mia salantuwu, mia morawu kaa mia luuka.'

<sup>22</sup> Umarino umangga'o mbio henu nopolinarenta'ako, ata la'a melapuru ndi ponggawano, 'Ponggawa, oto kulelu'o mbio henu oto aitena'aku kanggo da orao pentoro'a henu molie.'

<sup>23</sup> Umari la'a ponggawa la'a mepau mbo'u ndi atano, 'Lekoto ai sala langkai kaa sala dedeiki ai saliwano inie langkai. Dadasi'iro baineitokaa mia hinawemu karo memai kano bukekaa rahanggu.'

<sup>24</sup> Ka ai mpewowolo'o! Lalau napo te'aso mia henu umarito kupeboio la'a minggi lume'ole'ongo kaanga henu kupalena'akero!"

### *Bintango lowono bai minggi tumonda'iro i Yesu*

<sup>25</sup> Umari la'a orao mia henu tumonda'o i Yesu ai laro koleko-lekoaNo. Nopewolili ndi umboro ka Nopotae,

<sup>26</sup> "Bano sombo mia henu mai ndi Iaku ka lano mokokatongakeo umano, ineno, somborino, anano, petia tamano ba petia irowaino, otokaa koroino, umono lano bisa gagi anaguruNggu.

<sup>27</sup> Mia henu lano behe po'ahango kau pinotambano kaa tumonda'Aku, lano bisa gagi anaguruNggu.

<sup>28</sup> Pompotuimu minggi tumonda'Aku Kupokopenggenaho menggena sirime nie, Ta'aluno ai olomiu minggi mowangu aso manara, matantu se'eluno nominggi mentoro dumoa'o doi henu minggi pinake mowangu manara kano to'oriokaa oto sangkakee ba ambokee doino la'a hawe kano umari angga'a la'a.

<sup>29</sup> Indono'o te'ingga butu notu'aio mowangu pentoro'ano raha kaa lano tu'aio moko'umario. Akono bano romesue'o mia te'ingga olo rompo'awa'akeo

<sup>30</sup> ka rompotae, 'Umono mowangu manara kango lano tu'aio moko'umario.

<sup>31</sup> Ba sirime mesuено, ta'alu aso datu mompe'ue hopulo sowu sorodadu, kango datu mesue mompe'ue ruapulu sowu sorodadu minggi sumapoio, matantu datu henu mompe'ue hopulo sowu sorodadu olo mentoro ari tumimbatimba'o, pontuaikee me'ewa'ouweli la'a.

<sup>32</sup> Bano to'orio motae sorodaduno laro pokonango uwelino la'a, gagi tempono da olai uwelino, umono minggi montena ba'opio'iro mia lumeko mpo'ema karo mentepomoiko."

<sup>33</sup> Kano'amba i Yesu motae, "Hila'ato mbo'u ikomiu. Ta'alu lai mebintango lowono henumiu, lai mebisa gagi anaguruNggu.

<sup>34</sup> Ohio la'a moikoa, kango bano ohio andono mokara lalau buano,

<sup>35</sup> lano moikoa tiano lere maupo gagi pupu. Pokotomba'ano ohio la'a tinadi. Ainei mebiri, noporongoito!"

## 15

### *Sirime mongkono bimba henu tetadi*

<sup>1</sup> Ai aso olo, umboro toposima kaa mbo'u orao mia ntihala menggena mondeeno hawe mperorongoi pompaguruNo i Yesu.

<sup>2</sup> Masa mpo'amu-amu to Parisi kaa Guru Agama sumue'o kegagia la'a, rompotae, "Eii, Umono tumarima'iro mia ntihala kaa monggaa merongangiro!"

<sup>3</sup> Ooto kano i Yesu mompau'akero sirime nie,

<sup>4</sup> "Bano nio aso mia umbu ai olomiu nie mompe'ue aso etu bimba, kano'amba noto'orio tetadi aso bimbano la'a, mbirokee henu minggi nowowaau? Konggonokaa nobintango sio pulu kaa osio bimbano la'a ai konde meseko kano leko wusu'o bimba henu tetadi la'a hawe kano konao.

<sup>5</sup> Towono nohaweo'bimba henu tetadi la'a, umono mompemanga'u ka nosinggemala'o bimba la'a kano waweomekule ai lembarano. <sup>6</sup> Haweno ai raha, nopeboio walinalo kaa petengi-tengi rahano ka nopoatae, 'Maito kato memanga'u akono oto kuhaweo'bimbanggu henu tetadi!'

<sup>7</sup> Kupau'akomiu, 'Menggena ula'ato mbo'u Ue Ala kaa lowono mia henu mo'ia ai suruga memanga'u ngako tempono romesue'o aso mia tehala henu tesisi, kaseko sio pulu kaa osio mia henu mentee tinuwuro henu romengko'ara'ara laro memparalu mentesisi.' "

### *Sirime mongkono doi pera henu tetadi*

<sup>8</sup> Kano'amba i Yesu mompau'akero mbo'u aso sirime. Nopoatae, "Bano nio aso irowai henu mompe'ue hopulo doi pera kaa tetadi aso mata doi, konggonokaa mosunu palita kano roahio laro rahano kano'amba wusu'o takau aso doi perano henu tetadi la'a hawe kano haweo'o.

<sup>9</sup> Towono nohawe'o doi perano la'a, nopeboio wali-walino kaa lowono petengi-tengi rahano kano potae, 'Maito kato memanga'u akono oto kuhawe'o doi peranggu henu tetadi!'

<sup>10</sup> Iaku motae'akomiu, 'Menggena ula'ato mbo'u mala'eka-mala'ekaRo Ue Ala memanga'u akono aso mia tehala henu tesil!' "

*Sirime mongkono ana henu tetadi*

<sup>11</sup> I Yesu pau'akero mbo'u sirime nie, "Nio aso uma mompe'ue oruo ana ntama.

<sup>12</sup> Nopotae ana po'ohuo ndi umano, 'Uma, powee'akuto hilinie agaagando henu gagi tianggu.' Gagi umano tumia'o agaagaroo ndi ko'oruu anano.

<sup>13</sup> Bako'opiono olo, ana po'ohuo la'a umasa'o lowono agaaga tiano kano'amba lumeko ai po'ianga henu olai ngako. Lehea nosia-sia'o doino montonda manggerupa ineheno.

<sup>14</sup> Towono pinggoto doino, tegagi abalaa mokoninggo'a ai po'ianga la'a ooto kano marasai tinuwuno.

<sup>15</sup> Gagi umono lumeko mo'ema angga'a ndi aso ponggawa henu lehea. Mia la'a mowee'akeo angga'a ooto mogagai boe ai lere.

<sup>16</sup> Mokoninggo ngako ana po'ohuo la'a hawe-hawe nomokokumaango paka boe la'a kango lalau napo te'aso mia henu mowee'akeo kaanga.

<sup>17</sup> Kano'amba nopenonoho'o tinuwuno ka nopepau ai laro aroano, 'Lowono mia henu mo'angga ndi umanggu mentorea kangaaro, kanggo iaku endea minggi maate ako ninggo!

<sup>18</sup> Laluombo kupekule ndi umanggu ka motae'akeo, Uma, akuto tehala ndi Ue Ala kaa ndi ikomiu.

<sup>19</sup> Andono kono iaku nie ninee anamiu. Uma, po'inengangguto gagi mia sinaromiu.'

<sup>20</sup> Gagi umono mewungguako mekule ndi umano.

Da olai oto nosue'o umano ana po'ohuono la'a oto kano telelu aroa pompehohawano. Melulu umano tumowo'o ana po'ohuono la'a kano rako'o ka umiki'o.

<sup>21</sup> Nopotae ana po'ohuo la'a ndi umano, 'Uma, akuto tehala ndi Ue Ala kaa ndi ikomiu. Andono kono iaku nie ninee anamiu.'

<sup>22</sup> Kanggo umano motae'akero atano, 'Pongkado mai wawereo parewa henu moiko, kaa pokono'akeo sisi ai tongisono, kaa sapatu ai kareno.

<sup>23</sup> Kaa aleoto ana sapi henu monuwo, sampa'o ka nahuakito kato mpoggaa kaa memanga'u!

<sup>24</sup> Akono ananggu menggena oto maate, kanggo hilinie tuwu euno, umono menggena oto tetadi kanggo hilinie hinawe euno.' Gagi pompamula iroti pomposara.

<sup>25</sup> Tempono posara'a la'a tegagi, amba anano tekonai ai lere. Towono nopekule kaa oto umbeda ai rahano, norongoio maroa mia mpenani kaa mpenari.

<sup>26</sup> Kano peboio aso ata kaa mesikeno ndi umono, 'Pombio mia kano memaroa ai raha?'

<sup>27</sup> Sumangki ata la'a, 'Haemiu oto mekule gagi umamii mosampa'akeo ana sapi henu monuwo akono oto nohawe'o anano da tuwu moroso.'

<sup>28</sup> Gagi tekudato amba ana la'a ka lano behe mendamo ai raha. Oto kano peluarako umano umo'ahitio kano pendamo.

<sup>29</sup> Nopotae ndi umano, 'Oto mata'u-ta'u kupo'angga tiamiu ka laku huru umewa komiu, kanggo lai huru mowee'akune aso ana bembe kakupowowau posara'a saru wali-walinggu.

<sup>30</sup> Kanggo anamiu la'a oto nopinggo'o agaagamiu, noleko mebawaa saru bandara, kanggo dapono hawe ikomiu mosampa'akeo aso ana sapi henu monuwo!'

<sup>31</sup> Nopotae umano ndi anano henu amba-ambano, 'Ananggu, iikokaa mpihe meronga iaku, kaa lowono agaaganggu oto agaagamu mbo'u.

<sup>32</sup> Kanggo haemu la'a menggena oto maate, kanggo hilinie tuwu euno, umono menggena oto tetadi kanggo hilinie hinawe euno. Gagi paralu ikito mpowowau posara'a kaa memanga'u.'

## 16

*Sirime mongkono topo'urusu doi ka agaaga henu megaupi*

<sup>1</sup> I Yesu motae mbo'u ndi anaguruNo, "Nio aso mia suugi mompe'ue aso topo'urusu doi ka agaagano. Mia suugi la'a rumongoio lele motae topo'urusu doi ka agaagano la'a oto nosia-sia'o doi ka agaagano.

<sup>2</sup> Gagi mia suugi la'a meboio topo'urusu doi ka agaagano kano potae, 'Ooto kurongoio lele motae lano mentee inanggamu. Oto kaku peboiko ka minggi kupenaohakomu. Kanggo se'eluno kupo'ema kau uki'o lowono doi ka agaaganggu henu au urusu'o kau amba wee'akune.'

<sup>3</sup> Topo'urusu doi ka agaaga kopau-pau ai laro aroano, 'Gagi mbiokee henu kupowowau hilinié? Akono pongawanggu la'a matantu nopenaohakune. Mo'angga ai lere laku moroso, ka mo'ema-ema iakukaa mbo'u mokokohenu.

<sup>4</sup> Nio akalanggu baku pinenaohako umbu ai angga'anggu nie. Iaku minggi mowusu mia henu behe tumarima'Aku ai raharo.'

<sup>5</sup> Kano'amba topo'urusu doi ka agaaga la'a meboio te'o'aso mia henu mepasua ndi ponggawano. Umono mesikeno ndi mia henu amba-ambano, 'Opookee pasuamu ndi ponggawanggu?'

<sup>6</sup> Sumangki mia la'a, 'Aso etu kusi boka sait.' Kano potae mbo'u ndi mia la'a, 'Tinie sura pasuamu, pentoroto ka uki'o serio gagi lima pulu kusi tokaa.'

<sup>7</sup> Kano'amba nopotae ndi mia henu ko'oru, 'Opookee pasuamu?' Sumangki mia la'a, 'Aso sowu karu batari.' Nopotae mbo'u ndi mia la'a, 'Tinie sura pasuamu, uki'o serio gagi oalu etu karu tokaa.'

<sup>8</sup> Towono mia suugi la'a rumongoio mbio henu nowowauo topo'urusu doi ka agaaga henu megaupi la'a, nopotae, 'O petia, ikoka su'u lalompande.'

Kano'amba i Yesu motae ndi anaguruNo, "Mentee su'u mia ai tolino nie lalompande umurusu' tinuwuro mia tolino kaseko mia henu tuwu ai laro mowine'a ka tumonda'o parentaRo Ue Ala."

<sup>9</sup> Ooto kaKu pesu'uij motae ndi ikomiu, "Pakeoto sugi'a ai tolino nie mpowusu walwalimiu, gagi bano sugi'amiu ai tolino nie oto pinggo, ikomiu minggi tinarima ai raha henu lalau tampula'ano."

#### *Metenunu ai laro kara-kara henu dedeiki*

<sup>10</sup> "Sombo mia henu metenunu ai laro kara-kara henu dedeiki olaka metenunu mbo'u ai laro kara-kara henu langkai. Kanggo sombo mia henu megaupi ai laro kara-kara henu dedeiki, umono megaupi mbo'u ai laro kara-kara henu langkai."

<sup>11</sup> Gagi bano lau pine'alo-alo umurusu' o'agaaga ai tolino nie, matantu Ue Ala mbo'u laRolei me'alo-alo komiu agaagaRo henu ai suruga.

<sup>12</sup> Ka bano ikomiu lano metenunu mo'urusu agaagano mia tolino, aineikee henu behe mowee'akomiu tuwua lano huru tampula?

<sup>13</sup> Lalau ata henu poli momparakai oruo ponggawa. Akono bano menggena ula'a minggi nomokokat'akeo henu asono ka nopehohawa'o henu mesueno, ba umono minggi metenunu ndi henu asono kaa lano periongo henu mesueno. Lai mebisa mpesomba ndi umboro Ue Ala ka mpesombaio doi."

<sup>14</sup> Tempono to Parisi rumongoio pompaguruno i Yesu la'a, rompo'awa'akeO, akono manga'uro io doi.

<sup>15</sup> Kanggo i Yesu motae'akero, "Ikomiu mokomentee'o koroiimu ai arono mia mesue, kanggo Ue Ala tumo'orio mbio henu nio ai laro aroamiu. Akono mbio henu romenten-ri'akeo mia Romokokat'akeo Ue Ala.

<sup>16</sup> Songkaro i Musa kaa lowono surano nabi, mpihe pinake hawe ai tempono i Yohane Mpuupodolo. Momparamula tempo la'a Kareba Moiko mongkono Pomparenta'aRo Ue Ala mpihe pinalele kaa mia merokuhi karo tepondamo ai laro Pomparenta'aRo Ue Ala.

<sup>17</sup> Kanggo da moruana langi kaa wawontolino puuta kaseko aso titi umbu ai songkaro i Musa lano gagi.

<sup>18</sup> Bainei notepobinda'akeo somborino kaa mesombori mbo'u saru irowai mesueno, tama la'a mososabo. Kaa bainei mesombori saru irowai henu notepobinda'akeo somborino, tama la'a mososabo mbo'u."

#### *Mia suugi kaa i Lasaru henu karampini*

<sup>19</sup> Kano'amba i Yesu paguru'iro mbo'u ako sirime nie, "Nio aso mia suugi henu mpihe meparewa moiko kaa masuli. Manangai tinuwuno ka mowowau posara'a sombo olo."

<sup>20</sup> Nio mbo'u aso mia karampini henu mo'ema-ema neeno ai Lasaru henu mereke aso koroino, pinolero ai pangaso rahano mia suugi la'a.

<sup>21</sup> I Lasaru mokompingga toreano kaanga henu modonta umbu ai wawo megano mia suugi la'a. Kanggo henu takau mokoburu io dahu hawe sumila'eo rekeno.

<sup>22</sup> Kano'amba maate mia karampini la'a ka romewaweo mala'eka ai po'iangapinelangkai ai awino i Burahima ai suruga.

<sup>23</sup> Mia suugi la'a maate mbo'u kano kinaburu. Tekonai marasai ngako nohoringo ai laro naraka, umono mesonge kano sue'o umbu ai olaingano i Burahima mentoro ka nio i Lasaru ai horino.

<sup>24</sup> Kano petulura mia suugi la'a, 'O Uma Burahima, pehohawa'aku! Iakuto takau marasai ai laro apui naraka nie. Tena'oto i Lasaru sie dumalongo tongisono ai laro uwoi ka mai waha'o elonggu, kano morini-rini!'

<sup>25</sup> Kanggo nosangki'o i Burahima, 'O ana, pewowolo'o tempono au tuwu ai tolino. Ikoto tuwu manangai kanggo i Lasaru tuwu marasai. Hilinie endea umono mohawé manangai'a ka serio iiko marasai.

<sup>26</sup> Ka mbo'u ai olondo nie oto winowau wingke henu onalo, gagi lakibisa mesaki serio kaa iko lau bisa mai endea.'

<sup>27</sup> Mia suugi la'a motae mbo'u, 'Bano helila'a kupo'ema su'u ndi ikomiu uma, tena'oto umono lumeko ai raharo umanggu.'

<sup>28</sup> Akono danio olimo iropo pe'aso komponggu. Tena'o i Lasaru lumeko mompoto'ori'akero karo indoro mpendamo ai po'iangga henu marasai'a nie.'

<sup>29</sup> Kanggo i Burahima motae, 'Ndi umboro nio sura songkaro i Musa kaa suraro nabi. Po'inengiroto karo melelu'o mbio henu te'uki lehea.'

<sup>30</sup> Sumangki mia suugi la'a, 'Lano sangka bano butu ula'a. Kanggo bano nio aso mia henuto maate lumeko ndi umboro, iro minggi mentesisi.'

<sup>31</sup> Kanggo nopotae i Burahima ndi mia suugi la'a, 'Ta'alu umboro laro mentonda'o mbio henu te'uki ai laro songkaro i Musa ka suraro nabi, larolei pompe'alo-alo maupo nio mia henu muule lumeko mompau'akero.'

## 17

### *Ba'opio patudu*

<sup>1</sup> Nopotae i Yesu ndi anaguruNo, "Konggonoka nio mbio henu romewowaou mia karo mentehalo. Kanggo memasolato mia henu ako gauro, mia mesue mowowau hala.

<sup>2</sup> Dalo'o moiko bano umono pine'eno-eno'ako wasu henu langkai ai we'uno, kano'amba pinetadiako ai laro ntahi henu onalo, kaseko aka gauno aso mia umbu ai mia henu mompe'alo-alo henu lano moroso nie mowowau hala, umono olo dinosa mobea.

<sup>3</sup> Pekarie'o koroimiu! Bano petiamiu mowowau hala kai mpe'etahakeokaa, ka bano umono mompesosoo kai oninio halano.

<sup>4</sup> Maupo nopolowau mbo'u hala ndi iiko menggopitu aso olo kaa menggopitu mbo'u nohawé ndi iiko kaa motae, 'Iaku mompesosoo, pehohawa'aku ka oninio halanggu', gagi iiko olo umoninio halano."

<sup>5</sup> Kano'amba anaguruNo la'ira mpotae ndi Ue Yesu, "Ue, pokomoroso'o pompe'alo-alomami."

<sup>6</sup> Nopotae Ue Yesu, "Bano nio pompe'alo-alomiu henu langkaino menggena wuku rawoho tokaa, ikomiu poli mpotae ndi pu'uno ara nie, 'Tewekato iiko ka tepaho ai tahi,' matantu olo notonda'o parentamu."

### *Ponggawa kaa ata*

<sup>7</sup> Kano'amba i Yesu motilalo'akeo pompaguruNo, "Ta'alu ai olomiu nio henu mompe'ue aso ata henu motengko ai lere ba mompakambi bimbamiu, towono pekule ata la'a umbu ai lere, konggonokaa lailei mpotae ndi umono, 'Mai pendamo kato mponggaa.'

<sup>8</sup> Kanggo ikomiu olo mpotae ndi ata la'a, 'Ponahu'akune kaanga. Pake'o parewa po'angga ai laro raha kaa emanganggu hawe kaku umari monggaa. Umaripo la'a kau amba monggaa.'

<sup>9</sup> Matantu lailei montarimakase ndi ata la'a maupono umarito nopalakai komiu.

<sup>10</sup> Hila'ato mbo'u ikomiu. Bano ikomiu umarito umangga'o lowono henu Rotena'akomiu Ue Ala, potaeto, 'Ikami butukaa ata lalau tuduno, ikami butu me'angga'o mbio henu kimentinen'a'ako.'

### *I Yesu mompokotomba hopulo iro mia melowe*

<sup>11</sup> Ai laro koleko-lekoaro lumeko ai Yerusele, i Yesu ka anaguruNo lumaloo tidano wute Samaria ka Galilea.

<sup>12</sup> Temporo mpendamo ai aso inie, hopulo tama henu memelowe hawe tumowo'o i Yesu kanggo umboro mpenggoti umbu olai

<sup>13</sup> ka mengkumora, "Yesu, Guru, pehohawa kami!"

<sup>14</sup> Tempono i Yesu sumue'iro Nopotae, "Aimelekoto ndi Petewawo Pesomba tiso'akero koroimiu."

Tekonairo mengkoleko-leko, masa tomba lowero.\*

<sup>15</sup> Aso mia umbu ai oloro, tempono nosue'o koroino oto tomba, umono mekule ndi Yesu kano kokora-kora umunde'iRo Ue Ala.

\* <sup>17:14</sup> Montonda songkaro i Musa, Petewawo Pesomba patantu'o aso mia oto tomba umbu ai haki loweno (Imamat 14:2, 3, 11. Ulangan 24:8).

<sup>16</sup> Kano'amba umono menggolutu ai arono i Yesu kano po'unde kaa montarimakase. Mia la'a to Samaria.<sup>†</sup>

<sup>17</sup> Kano'amba i Yesu motae, "Lano'okee hieno nio hopulo mia henu toomba? Ainderioto henu osio'iro?

<sup>18</sup> Akombio kano butukaa mia henu lano'o to Yahudi nie henu mekule montarimakase ndi Ue Ala?"<sup>‡</sup>

<sup>19</sup> Kano'amba i Yesu motae ndi mia la'a, "Pewanguto, kau pekule. Akono pompe'alomu ndi Iaku, iko toomba."

### *Haweno Pomparenta'aRo Ue Ala*

<sup>20</sup> Ba'opio'iro to Parisi mpesikeno ndi Yesu, "Te'epiepo Pomparenta'aRo Ue Ala pina-mula?"

I Yesu sumangki, Nopotae, "Pompamula'ano Pomparenta'aRo Ue Ala lano penggena ako petondonino henu sinuено matando,

<sup>21</sup> ka mbo'u mia lano bisa motae, 'Pomparenta'aRo Ue Ala nio endea' ba 'nio lehea'. Akono mentee'ano Pomparenta'aRo Ue Ala ai wawontolino oto nio ai olomiu."

<sup>22</sup> Umari la'a i Yesu motae ndi anaguruNo, "Amber hawe tempono ikomiu mo'osungakeo tempono Ana Manusia hawe komenggoruono, henu buke ako maramba'a ka manangaia ai tempo henu amba ramai. Kanggo lailei mesue'o.

<sup>23</sup> Tempo la'a olo rompotae mia ndi ikomiu, 'Kiteo, i Yesu nio endea!' ba 'Umono nio lehea!' Kanggo indo aimpe'ale-aleo kaa indo meleko ai po'anga henu nineero.

<sup>24</sup> Akono ai olo haweno Ana Manusia menggena wanta koliki henu mokomowine'o langi umbu ai tapuno langi hawe ai tapuno langi mesueno.

<sup>25</sup> Kanggo se'eluno Iaku Ana Manusia olo humoringo orao marasaia ka mia henu tuwu ai tempo nie laro mentarima'Aku.

<sup>26</sup> Menggena tinuwuro mia tempono i Noho hila'ato mbo'u henu minggi tegagi ai tempo hawe'ano Ana Manusia.

<sup>27</sup> Mia mponggaa, mpo'inu, mpesombori ka pinokosombori, hila'ato mpihe hawe kano i Noho mendamo ai laro bangka, kano'amba hawe lolowi karo meropu lowo.

<sup>28</sup> Hila'ato mbo'u tempono i Lo'oti. Mia mponggaa mpo'inu, mpo'asa mpo'oli, mpom-paho kaa mpowangu raha.

<sup>29</sup> Kanggo temporno i Lo'oti meluarako umbu ai Sodomo, use apui ka balera metii umbu ai langi karo meropu lowo.

<sup>30</sup> Hila'ato notegagi soongka bano Ana Manusia moko'enaho koroiNo.

<sup>31</sup> Ai olo la'a mia henu tekonai ai wawono ato raha indono petii umaleo agaagano ai laro raha. Hila'a mbo'u mia henu tekonai ai lere, indono pekule ai rahano. <sup>32</sup> Ai mpewowolo'o mbio henu umarito tegagi ndi somborino ai Lo'oti!

<sup>33</sup> Akono bainei henu merokuhi kumaduduio tinuwuno olo tetadi tinuwuno. Kanggo bainei henu tetadi tinuwuno akono Iaku, umono olo kinadudui.

<sup>34</sup> Kupau'akomiu, ai wongi la'a oruo mia me'aso mpoturi, aso mia minggi nowaweo mala'eka kaa aso mia minggi bininta.

<sup>35</sup> Oruo irowai tekonai meronga-ronga mogili batari, henu aso minggi winawo kaa henu asono minggi bininta. [

<sup>36</sup> Kaa bano oruo mia tekonai mo'angga ai lere, aso minggi winawo kaa asono minggi bininta.]

<sup>37</sup> AnaguruNo mesikeno ndi Yesu, "Ainderiokee ula'a minggi tegagi, Ue?" Ka Nosangki'iro, "Ainderio nio bake mewoo, lehea paa-paa mpewuwui."

## 18

### *Sirime mongkono po'utuhi kara-kara henu lano mentee leluno*

<sup>1</sup> Umari la'a i Yesu paguru'iro anaguruNo aka sirime karo mpihe mpekakai ka lano tampula pomperorohiaro.

<sup>2</sup> Nopotae i Yesu, "Ai aso inie langkai nio aso po'utuhi kara-kara henu lano momee ndi Umboro Ue Ala ka lano pe'iindongo pe'asomiano.

<sup>3</sup> Ai inie langkai la'a nio mbo'u aso waalu henu mpihe lumeko mo'ema kano i po'utuhi kara-kara la'a tumulungio umaropio uwelino.

<sup>†</sup> **17:16** To Yahudi ka to Samaria menteposisala. Kanggo butu to Samaria henu mekule montarima kase ndi Yesu kanggo to Yahudi uuuuh. <sup>‡</sup> **17:18** To Yahudi ka to Samaria menteposisala. Kanggo butu to Samaria henu mekule montarima kase ndi Yesu kanggo to Yahudi uuuuh.

<sup>4</sup> Ba'opio epieno po'utuhi kara-kara la'a lano behe tumulungio waalu la'a. Kanggo amba nopotae ai laro aroano, 'Maupo laku momee ndi Umboro Ue Ala ka laku pe'i'indongo pe'aso mianggu,

<sup>5</sup> kanggo akono waalu la'a mpihe mokoritu'aku, moiko'ano kutulungio umaropio kara-karano. Kano indono mpihe mai mokoritu'aku.' "

<sup>6</sup> Kano'amba Ue Yesu motae, "Pekokoongo mbio henu nopau'o po'utuhi kara-kara henu lano mentee leluno la'a!"

<sup>7</sup> Bano behe tumulungio kara-karano waalu la'a, matantu Ue Ala olo tumulungi'iro umboro henu bininikiRo gagi miaRo henu mpihe mo'ema sombo olo. Umboro larolei telaa tumulungi'iro.

<sup>8</sup> Pe'ale-aleoto motae, Ue Ala ronga tumulungi'iro umaropio kara-kararo. Maupono menggena ula'a, tempono Iaku, Ana Manusia hawe euno, ambono matantu Kuhaw'e'o mia ai tolino nie henu da pompe'alo-alo ndi Iaku."

#### *Sirime mongkono to Parisi saru toposima*

<sup>9</sup> Kano'amba ndi ba'opio'iro henu me'ale-aleo motae laro ntehala ai aroro Ue Ala, ka metotoakero pe'asomiano, i Yesu mompau'akero sirime nie,

<sup>10</sup> "Nio oruo mia lumeko ai Raha Mempori ka mpekkakai, aso to Parisi ka asono mbo'u toposima.

<sup>11</sup> To Parisi la'a menggoti aso-asono kaamekakai, 'O Ue Ala, iaku mo'unde ndi Ikomiu, akono laku penggena mia mesue, laku ponako, laku pesetaki, ka laku pososabo. Ka iaku mbo'u mo'unde akono laku penggena saru toposima nie.

<sup>12</sup> Ai laro opitu olo iaku mepuasa oruo olo ka tia hopulo henu kupohawe umbu ai po'angga'anggu kunesomba'ako ndi Ikomiu Ue Ala.'

<sup>13</sup> Kanggo toposima la'a menggoti hala'olai umbu ai mia mesuено ka lano taha mesonge ai langi, nolori-loriho radano ka motae, 'Oo Ue Ala, pehohawa'aku mia tehala nie.'

<sup>14</sup> Kupau'akomiu, 'Toposima niemekule ai rahano oto tinolosi halano kanggo to Parisi la'a lano tinolosi. Akono bainei melangkai'o koroino olo pinetotoako ka bainei me'urumako koroino olo pinelangkai.' "

#### *I Yesu mbarakati ana-an*

<sup>15</sup> Ba'opio'iro mewaweo ana-anaro henu da dedeiki ndi Yesu, kano i Yesu umini'o uluro ka barakati'iro. Tempono anaguruNo sumue'o ula'a rome'ontongiro.

<sup>16</sup> Kanggo i Yesu meboio ana-ana la'ira ka Nopotae ndi anaguruNo, "Po'inengiroto mai ndi Iaku, kaa indo mebentengiro, akono mia henu menggena unieto henu minggi gagi miaRo Pomparenta'aRo Ue Ala.

<sup>17</sup> Pewowolo'o! Bainei lano tarima'o Pomparenta'aRo Ue Ala menggena ana-ana dedeiki nie, umono lano tinarima gagi miaRo Pomparenta'aRo Ue Ala."

#### *Mia suugi mapari gagi miaRo Pomparenta'aRo Ue Ala*

<sup>18</sup> Aso petewawo to Yahudi mesikeno ndi Yesu, "Guru henu moiko, mbio henu olo kuwowaau kakupohawe tuwu la'lalau tampula'ano?"

<sup>19</sup> Kanggo i Yesu lo'oka mesikeno, "Akombio kau potae Iaku moiko? Butukaa Ue Ala henu moiko la'lalau mbo'u mesueno.

<sup>20</sup> Oto kau to'orio songkaRo Ue Ala nie, 'Indo pososabo, indo pompepate, indo ponako, indo pesetaki mongkono pe'aso miamu kaa pelangkai'iro mia mosu'omu.' "

<sup>21</sup> Kano'amba petewawo to Yahudi la'a motae, "Lowono songkaRo Ue Ala la'a oto kuwowaau umbu da kumonguro."

<sup>22</sup> Rumongoio pauno petewawo to Yahudi la'a, i Yesu motae'akeo, "Danio asopo mbo'u henu olo au wowauo, pekueto ka asa'o lowono agaagamu kau amba tumiatia'o doino ndi mia karampini. Gagi ikomiu olo mohawe agaaga ai suruga. Umari la'a mai ndi Iaku kau tonda'Aku."

<sup>23</sup> Tempono norongoio mbio henu nopau'o i Yesu la'a, masusa ngako aroano, akono umono suugi ngako ka lano behe umasa'o agaagano.

<sup>24</sup> I Yesu tumo'orio motae masusa ngako aroano petewawo to Yahudi la'a. Ooto kano potae, "Mapari su'u mia suugi gagi miaRo Pomparenta'aRo Ue Ala!

<sup>25</sup> Akono da moruana aso unta mendamo ai aano supe kaseko mia suugi gagi miaRo Pomparenta'aRo Ue Ala."

<sup>26</sup> Toworo merongoio pauNo la'a, rompotae, "Bano helila'a mente'ano lalau mia henu olo kinadudui."

<sup>27</sup> Nopotae i Yesu, "Mbio henu lano poli nowowaauo mia, poli Rowowaauo Ue Ala."

#### *Saro tumonda'iro i Yesu*

<sup>28</sup> Kano'amba i Peturu motae, "Helinde menggena ikami? Oto kimebintango lowono henumami ka tumonda Komiu."

<sup>29</sup> I Yesu motae'akero, "Kupau'akomiu, sombo mia henu nobintango rahano, somborino, petiano, mia mosu'ono ba ana-anano ako Pomparenta'aRo Ue Ala,

<sup>30</sup> olo notarima'o saro umbu ndi Ue Ala henu maluka-luka ai laro tinuwuno hilinie ka ai tempo henu ramai Ue Ala olo meweangakeo tuwua lalau tumpula'anu."

*Komenggotoluno i Yesu pau'o mongkono mateaNo*

<sup>31</sup> I Yesu meboio hopulo ka oruo anaguruNo ka motae'akero, "Hilinie ikito mpe'eka ai Yerusale. Leheato lowono henu inukiro nabi mongkono Iaku, Ana Manusia, olo pinokosangka.

<sup>32</sup> Akono Iaku olo pineweangako ndi mia henu lano'o to Yahudi, Iaku olo pine'ewe-ewe, pinesantaliakiako ka inunui.

<sup>33</sup> Amba la'a umboro minggi sumepiaKu ka mepateaKu, kanggo ai ko'otoluno olo Iaku olo muule."

<sup>34</sup> Lowono pinauno i Yesu la'a lalau henu romento'orio anaguruNo. Pengkonoano da tewuni umbu ndi umboro gagi laro mento'orio mbio henu pinauNo la'a.

*I Yesu mokotomba'o mia morawu umbeda ai Yeriko*

<sup>35</sup> Tempono i Yesu ka anaguruNo oto umbeda ngako ai inie langkai Yeriko, nio aso mia morawu mentoro mo'ema-ema ai wiwi sala.

<sup>36</sup> Akono norongoio memaroa mia henu mentelalo, umono mesikeno, "Nio mbiokee?"

<sup>37</sup> Rompotae'akeo, "I Yesu mia Nasare la'a telalo."

<sup>38</sup> Oto kano kumora, "Oo Yesu, Anani Daudi, pehohawa'aku!"

<sup>39</sup> Kanggo umboro henu koleko-leko ai arono i Yesu tumena'o kano indono pogero. Kanggo lo'oka tetambai langkai nokumora, "Anani Daudi, pehohawa'aku!"

<sup>40</sup> I Yesu menao-nao ka tumena'iro waweo mia morawu la'a ndi Umono. Tempono oto ai horiNo, i Yesu sumikenoo,

<sup>41</sup> "Io mbio inehemu kaKu powowau'akomu?"

Mia morawu la'a sumangki, "Ue, kaku bisa mosue."

<sup>42</sup> Kano'amba i Yesu mepau, "Bano helila'a, penggitoto! Akono pompe'alo-alomu ndi Iaku, ikoto toomba!"

<sup>43</sup> Ka tempo la'a mbo'u mia la'a mosue, kano tonda'iro i Yesu ka umunde-unde'iRo Ue Ala. Lowono mia henu kumiteo kegagia la'a mbo'u umunde-unde'iRo Ue Ala.

## 19

*Sakeu*

<sup>1</sup> Towono i Yesu mendamo ai inie langkai Yeriko, Umono koleko-leko tumonda'o sala ai inie langkai la'a.

<sup>2</sup> Lehea nio aso ponggawano toposima henu suugi, neeno ai Sakeu.

<sup>3</sup> Umono mokosumue'o i Yesu, kanggo lano pokosue'o akono umono owu-owundu ka orao mia lehea.

<sup>4</sup> Gagi umono melulu messe'elumiyo, kano pomone ai pu'uno kau ara kano sue'okaa i Yesu henu minggi lumaloo sala la'a.

<sup>5</sup> Towono i Yesu hawe ai pu'uno kau ara la'a, Nopesonge kano potae, "Oo Sakeu, pongkadoto petii, akono inehelu Ro Ue Ala Iaku merato ai rahamu."

<sup>6</sup> Mongkado-kado ai Sakeu metii kaa manga'u ngako tumarima'iro i Yesu ai rahano.

<sup>7</sup> Lowono mia henu kumiteo kegagia la'a ko'ise-ise, rompotae, "Eii, umono leko merato ai rahano mia ntelahala."

<sup>8</sup> Kanggo ai Sakeu menggoti ka motae ndi Ue Yesu, "Ue, entonga umbu ai agaaganggu nie minggi kupeweeangakeo ndi mia karampini, ka bainei henu huru kusetakio mongkono simano minggi kupokule'o opaa lukano."

<sup>9</sup> Kano'amba i Yesu motae'akeo ai Sakeu, "Olo nie iiko ka lowono mia ai laro rahamu oto kinadudui, akono iiko mbo'u inuleno i Burahima.

<sup>10</sup> Akono Iaku, Ana Manusia, hawe mowusu ka kumaduduio mia henu tesampu."

*Sirime mongkono doi wulaa*

<sup>11</sup> Tekonairo da merorongoio ay Yesu mepau, Umono mompau'akero aso sirime. Akono tempo la'a Umono umbeda umbu ai Yerusale, ka romengko'ara'ara oto minggi pinamula Pomparenta'aRo Ue Ala.

<sup>12</sup> Nopotaie helinie, "Nio aso mia umbu ai inuleno datu lumeko olai ai inie langkaino datu kano inengka gagi datu. Umari la'a umono olo mekule momparenta ai inieno."

<sup>13</sup> Ambono pewungguako, nopeboio hopulo atano kano wee'akeo te'o'asoro doi wulaa. Nopotae'akero, 'Aimpebalu-baluto ako doi sie hawe kaku pekule.'

<sup>14</sup> Kanggo mia ai inieno la'a memokokatongakeo mia henu minggi inengka gagi datu la'a. Gagi towono nopewunggu'ako, umboro montena ba'opio'iro lumeko ndi datu langkai henu minggi umengkaho mia la'a gagi datu ai wutero, rompotae, 'Laki mebehe mia la'a gagi datu ai niemami.'

<sup>15</sup> Napono laro mebehe, mia umbu ai inuleno datu la'a lo'oka inengka gagi datu, kano'amba mukule ai inieno. Haweno lehea notena'o mia meboio kohopulo atano kano to'orio opio saro rompohawé umbu ai pebalu-baluro sombo mia.

<sup>16</sup> Ata henu ko'aso hawe ka motae, 'Oo datu, iakuto mobalu-balu ako aso doi wulaa henu ai wee'akune ka hilinie iakuto mohawé hopulo doi wulaa.'

<sup>17</sup> Datu la'a motae'akeo, 'Mentee winowaumu sie, iiko ata henu moiko. Akono iiko metenunu ai laro kara-kara henu dedeiki, iiko minggi momparenta ai hopulo inie langkai.'

<sup>18</sup> Kano'amba ata henu ko'oruo hawe ka motae, 'Oo datu, iakuto mobalu-balu ako aso doi wulaa henu ai wee'akune ka hilinie iakuto mohawé olimo doi wulaa.'

<sup>19</sup> Nopotae ndi ata la'a, 'Iiko minggi momparenta ai olimo inie langkai.'

<sup>20</sup> Kano'amba ata henu mesuено hawe ka motae, 'Oo datu tinie doi wulaamiu, lo'oka kutongoho ai laro lenso.

<sup>21</sup> Kumomee'akomiu datu, akono ikomiu mia mosia. Ikomiu umaleo mbio henu lano'o henniu ka mesowi henu lano huru ai merawoho.'

<sup>22</sup> Datu la'a motae ndi umono, 'Eii iiko ata henu moluwe, iaku minggi dumosako menggena paumu la'a. Ikoto tumo'orio motae iaku nie mosia, henu umaleo mbio henu lano'o henungku ka mesowi henu lano huru kurawoho.

<sup>23</sup> Bano menggena ula'a akombio lai peweangakeo doinggu ndi mia henu mo'utangakeo doi kakupohawé sarono?'

<sup>24</sup> Kano'amba datu la'a mepau ndi mia henu mpenggoti ai horino, 'Aleo doi henu nio ndi umono ka wee'akeo ndi atanggu henu mompe'ue hopulo doi wulaa la'a.'

<sup>25</sup> Kanggo umboro mptotae, 'O Datu, umono oto mompe'ue hopulo doi wulaa.'

<sup>26</sup> Nosangki'o datu la'a, 'Kupau'akomiu, sombo mia henu metenunu umangga'o mbio henu Rowee'akeo Ue Ala ndi umono minggi pinowea mbo'u. Kanggo bainei henu lano metenunu umangga'o mbio henu nopolowea, mbio henu danio ndi umono minggi inalo mbo'u.

<sup>27</sup> Hilinie waweo ramai umboro henu mokokatongakune ka henu tai mebeheaku gagi daturu ka pepateiroto ai aronggu! "

### *I Yesu pinokomaramba ai Yerusale*

<sup>28</sup> UmariNo mompau'akero sirime la'a, i Yesu mese'elungiro koleko-leko ai aroro me'eka ai Yerusale.

<sup>29</sup> Towono umbeda ai inie Bepage ka Betania ai Torukuno Saitu, i Yesu tumena'o oruo anaguruNo.

<sup>30</sup> Nopotae, "Lekoto ai inie ai aromiu la'a, baimpendamoto te'ingga, ikomiu minggi humawé' anano kalide ambono huru pinengarai henu inonggo umbeda rahano mia. Wowoho onggono ka waweo ramai. <sup>31</sup> Bano nio mia mesikeno ndi ikomiu, 'Akombio kai mewowoho onggono?' Sangki'o menggena unie, 'Ue Yesu paralu'o.' "

<sup>32</sup> Kano'amba meleko'iroto anaguruNo la'a, ka romeuhawé' lowono gagi menggena mbio henu nopalau'o i Yesu.

<sup>33</sup> Tekonairo mowowo onggono anano kalide la'a, ueno motae'akero, "Akombio kai mewowoho onggono kalide sie?"

<sup>34</sup> Rosangki'o, "Ue Yesu paralu'o."

<sup>35</sup> Kano'amba romewaweo anano kalide la'a ndi Yesu, karo empehio pentoro'ano ako kalambiro ka romentulungio i Yesu mewue'akeo ai kalide la'a.

<sup>36</sup> Tempono i Yesu mengaraio kalide la'a mia orao mewola'o kalambiro ai sala henu nolaloo i Yesu.

<sup>37</sup> Tempono i Yesu umbeda ai Yerusale, ai sala monturungako umbu ai Torukuno Saitu, anaguruNo ka lowono mia henu mpihe tumonda'iro mompamula memanga'u ka umunde-unde'iRo Ue Ala aka suara langkai akono lowono tandangkohali-hali henuto romesue'o.

<sup>38</sup> Rompotae,

"Rinosoto Datu henu tinenaRo Ue Ala, roodo ai suruga ka maramba ai po'ianga henu takau medongke!"

<sup>39</sup> Ba'opio'iro to Parisi umbu ai olono mia orao la'a mpotae ndi Yesu, "Guru, tena'iroto karo mengkomino."

<sup>40</sup> Nopotae i Yesu, "Pe'ale-aleoto! Baro mengkomino, wasu niire olo mengkumora."

<sup>41</sup> Tempono i Yesu oto umbeda ngako umbu ai Yerusal, Nokiteo inie langkai la'a, ka Nope'iwickio,

<sup>42</sup> Nopotae, "Wainto ngako ikomiu mia Yerusal! Moikono olo nie aimento'orio helinde kai tepomoiko mbo'u saru Ue Ala ka pe'aso miamu, kanggo hilinie ikomiu laimento'orio!

<sup>43</sup> Minggi hawe tempono uwelimi mebolilingo iniemiu aka wala ka sumapoi komiu ka mpihe umewa komiu umbu ai lowono po'ianga.

<sup>44</sup> Umboro minggi mokoropukomiu oo Yerusal saru lowono mia ai inie langkaimiu, ka lalau napo te'aso wasu henu ropo'ineengo tepo'api. Unie tegagi akono laimento'orio tempono Ue Ala hawe kumaduduikomiu."

### *I Yesu mokomempori'o Raha Mempori*

<sup>45</sup> Kano'amba i Yesu mendamo ai puu Raha Mempori kano mompamula tumamba'iro henu mpo'asa-asa lehea.

<sup>46</sup> Nopotae'akero, "Nio te'uki ai laro Sura Tutulu, 'RahaNggu minggi gagi po'ianga pekaka'a.' Kanggo oto ai mebal'i gagi pewuniaro mia henu mponako."

<sup>47</sup> Sombo olo i Yesu mompaguru ai Raha Mempori. Umboro kapala Petewawo Pesomba ka Guru Agama saru petewawo to Yahudi merokuhu karo bisa pasala'o ka mpepateo i Yesu.

<sup>48</sup> Kanggo laro mento'orio bambio henu minggi romewowaou, akono lowono mia mpihe mpo'ia ai horiNo ka inehero merorongoio pompaguruno i Yesu.

## 20

### *Pesikeno mongkono pabawano i Yesu*

<sup>1</sup> Aso olo tekonaino i Yesu mompaguru kaa palele'o Kareba Moiko ndi mia orao ai puu Raha Mempori, hawe'iroto lehea Kapala Petewawo Pesomba, Guru Agama ka mia mosu'ono to Yahudi

<sup>2</sup> ka rompotae ndi Yesu, "Kua pau'akami aka pabawa mbio Ikomiu wowau lowono nie? Aineiokee henu mowee'aKomiu pabawa la'a?"

<sup>3</sup> Sumangki i Yesu, "Iaku mbo'u minggi mesikeno, kua pau'aKune,

<sup>4</sup> <sup>4</sup> ai Yohane modolo aka pabawano aineio? Ako pabawaRo Ue Ala ba umbu ai pabawano mia tolino?"

<sup>5</sup> Kano'amba umboro mpebitara ai oloro, "Batompotae, 'Umbu ai pabawaRo Ue Ala,' Umono olo motae ndi ikito, 'Bano helila'a, ikomiu lano mentee akoro lano mpe'ale-aleo mbio henu pinauno ai Yohane.'

<sup>6</sup> Kanggo batompotae, Umbu ai pabawaro mia tolino, lowono mia niire olo meratukito aka wasu hawe kato memate, akoro mpe'ale-aleo ai Yohane io nabi."

<sup>7</sup> Gagi umboro mesumangki, "Laki mento'orio aka pabawano aineio ai Yohane modolo."

<sup>8</sup> Kano'amba i Yesu motae'akero, "Bano helila'a, Iaku mbo'u laKu lei pau'akomiu aka pabawano aineio Kuwowaou lowoakoano nie."

### *Sirime mongkono mia mo'angga ai lere anggoro*

<sup>9</sup> Kano'amba i Yesu mompau'akero mia orao sirime mesuено, "Nio aso mia mowungge lere anggoro, kano'amba nopesaro'akeo lereno ndi mia henu mo'angga lere kano'amba mewungguako lumeko ai inie mesuено ka epie nopo'ia lehea.

<sup>10</sup> Towono hawe tempono po'opua wue anggoro, ueno lere la'a montena atano lumeko ndi mia henu umangga'o lereno la'a karo powee'akeo asontia tiano umbu ai wueno lere la'a. Kanggo lo'oka romerodoho ata la'a ka rotena'o mekule ka lano powawo mbio-mbio.

<sup>11</sup> Umari la'a umono montena mbo'u ata henu mesuено, kanggo ata la'a mbo'u lo'oka rinodo ka pinokokohenu karo mentena'o mekule ka lano powawo mbio-mbio.

<sup>12</sup> Kano'amba ueno lere la'a montena mbo'u ata henu ko'otolu, kanggo ata la'a lo'oka rinodo mbo'u hawe kano mobela kano'amba pinetadiako ai saliwano lere la'a.

<sup>13</sup> Poko'ariano ueno lere la'a motae, 'Mbiotokaa mbo'u henu kupowowau? Iaku minggi tumena'o ananggu henu takau ku'o'oloio, matantu umono olo romemome'akeo ka ropelangkai'o.'

<sup>14</sup> Kanggo towono mia henu umangga'o lere la'a sumue'o anano ueno lere la'a, umboro mpepau-pau 'Umonoto nie henu minggi me'ue'o agaagano umano, maito kato mpepateo, kano agaagano la'a gagi henundo.'

<sup>15</sup> Karo membaerio anano ueno lere la'a hawe ai saliwano lere anggoro la'a karo pepateo."

Kano'amba i Yesu mesikeno, "Gagi bano pekule ueno lere anggoro la'a, mbiotokaa henu minggi nopolowau ndi mia henu umangga'o lere anggoro la'a?"

<sup>16</sup> Matantu umono olo hawe mepateiro mia henu umangga'o lere anggoro la'a kano'amba nope'ale-ale'akeo lereno ndi mia henu umangga'o lere anggoro henu mesuено." Rumongoio pau la'a mia la'ira sumangki ndi Yesu, "Indono tegagi menggena ula'a!"

<sup>17</sup> I Yesu menggito ndi umboro ka Nopotae, "Bano helila'a mbio pengkonoano PauRo Ue Ala henu te'uki ai laro Sura Tutulu nie,

Wasu henu tinadiro mia mperaha

oto gagi wasu pentoro'ano raha henu takau paralu.<sup>\*</sup>

<sup>18</sup> Bainei henu modonta ai wawono wasu la'a olo tewuro, ka bainei henu nodusingo wasu la'a olo telata."

<sup>19</sup> Guru Agama kaa Kapala Petewawo Pesomba mento'orio motae umboroto pengkonoano sirimeno ai Yesu la'a, ooto karo mperokuhi merako'o i Yesu ai tempo la'a kanggo umboro memomee ako mia orao.

#### *Mongkono mobara sima ndi Datu Langkai*

<sup>20</sup> Akono usie Guru Agama ka Kapala Petewawo Pesomba kumikiteo i Yesu. Umari la'a rompobara ba'opio'iro henu mompemiamoiko lumeko poporoo'o i Yesu. Umboro tumena'iro mpesikeno ndi Yesu karo hawe'okaa halano i Yesu umbu ai pesangkiNo, karo bisa mpeweageko ndi Gubenuru kano inutuhi.

<sup>21</sup> Mia henu mentionena poporo'o ai Yesu la'a mepau ndi Yesu, "Guru, kimento'orio lowono pau kaa pompaguruMiu la'a mentee kaa ikomiu mbo'u lai mompoponggito, mentee'ano ikomiu paguru kami ineheRo Ue Ala ai laro tinuwumami."

<sup>22</sup> Gagi ikami minggi mpesikeno, "Bano montonda songkaro i Musa lo'oka bisakee kimpobara sima ndi Datu Langkai?"

<sup>23</sup> Kanggo lo'oka noto'orio i Yesu io akalaro henu mosa'a oto kaNo potae'akero,

<sup>24</sup> "Kua popokiteo'Akune aso doi pera, ra'ino kaa neeno aineikee inuki lehea?"

Rosangki'Iro, "Ra'ino kaa neeno ai Datu Langkai."

<sup>25</sup> Nopotae i Yesu ndi umboro, "Bano helila'a wee'akeo ndi Datu Langkai mbio henu gagi tiano kaa wee'akeo ndi Ue Ala mbio henu gagi tiaRo!"

<sup>26</sup> Gagi mia tinena hieno laro mpohawe halano ai Yesu umbu ai pesangkiNo ai arono mia orao la'ira. Umboro mentengiri rumongoio sangkino i Yesu la'a ooto karomengkomino.

#### *Pesikenoro to Saduki mongkono mia muule*

<sup>27</sup> Ba'opio'iro to Saduki, mia henu lano mpe'ale-aleo mongkono mia maate olo muule, hawe ndi Yesu karo mpesikeno ndi Umono,

<sup>28</sup> "Guru, ai Musa mo'uki ai atora tiando kato mpetenunu, 'Bano aso tama maate ka nio somborino kanggo lalau anaro, gagi petiano tama la'a olo sumombori'o waaluno petiano la'a kano niokaa anano.'

<sup>29</sup> Nio opitu tama mpetia. Ana henu amba-ambano mesombori saru aso irowai, kano'amba maate ambono nio anaro.

<sup>30</sup> Kano'amba ana henu ko'oru sumombori'o waaluno petiano, kanggo ka mbo'u maate ambono nio anaro.

<sup>31</sup> Menggena mpihe ula'a notegagi ndi tama henu ko'otolu hawe ana henu ko'opitu.\*

<sup>32</sup> Pokoariano waalu la'a mate mbo'u.

<sup>33</sup> Gagi ko'opitu tama henu mpetia oto umari romesombori'o irowai la'a. Bano helila'a, tempono mia maate pinokomule te'ingga, aineikero henu gagi somborino waalu la'a?"

<sup>34</sup> I Yesu sumangki'Iro, "Mia tuwu ai wawontolino nie, mesombori kaa sinombori,

<sup>35</sup> kanggo sombo mia henu pinatantuRo Ue Ala tekonoako mohawe tuwuwa henu amba ramai ka pinokomule umbu ai matea, lano pesombori ba lano sinombori.

<sup>36</sup> Tinuwuro menggena mala'eka gagi larolei maate. Umboro ana-anaRo Ue Ala, akono umboro oto pinokomule umbu ai matea.

<sup>37</sup> Mongkono mule'ano mia maate, oto nopau'o ai Musa mbio henu tegagi ai laro seko merui henu tesongko. Tempo la'a Ue Ala mepau ndi Musa 'Iakuto Ue Alani Burahima, Ue Alani Isaki kaa Ue Alani Yako.'

\* 20:17 Mzm. 118:22    \* 20:31 Kej. 38    \* 20:31 Tiano to Yahudi, mompe'ue ana takau paralu, kano neeno sombori rolinimba ndi inule henu amba ramai. Ta'alu aso tama oto mesombori kanggo maate lano mompe'ue ana, petiano ba pesambopiheno olo takau sumombori'o waluno. Ana ntama henu ko'aso umbu sombori la'a wine ako nee petia henu maate la'a ka linaro menggena ana ka inuleno.

<sup>38</sup> Umboro lano'o Ue Alaro mia maate, kanggo Ue Alaro mia tuwu, akono ai aroRo lowono mia tuwu."

<sup>39</sup> Ba'opio'iro Guru Agama motae, "Guru, sangkiMiu la'a mentee su'u."

<sup>40</sup> Umari la'a, lalau mbo'u mia henu taha mpesikeno ndi Yesu.

### *Pesombuno i Yesu kaa ai Daudi*

<sup>41</sup> Kano'amba i Yesu motae ndi umboro, "Helindekee karo bisa mpepau motae ai Datu Pongkadudui oto inuleno ai Daudi?

<sup>42</sup> Akono ai Daudi, umonono motae ai laro sura Penani mpo'unde,

Ue Ala mepau ndi Uenggu<sup>†</sup>,

pentoroto ai aso hile kuananGgu ka momparenta gagi Datu,

<sup>43</sup> Hawe kaKu wowau lowono uweliMiu gagi metuundu ndi Ikomiu.\*

<sup>44</sup> Gagi bano ai Daudi numeengo Datu Pongkadudui io Ueno, helinde kano bisa nopotae Datu Pongkadudui inuleno ai Daudi?"

### *I Yesu patudu'iro aimpegagai umbu ai Guru Agama*

<sup>45</sup> Tekonai mia orao mperorongoi mbio nopompau i Yesu, Umono motae ndi anaguruNo,

<sup>46</sup> "Aimpegaga-gagai ndi Guru Agama. Manga'uro mengkoleko-leko saru mempake'o parewa mentaa henu moiko, manga'u kano pinelangkai ai pasa, manga'u mpentoro ai po'ianga pinelangkai ai laro Raha Pesomba'a kaa ai pesambora'a.

<sup>47</sup> Umboro megaupio mia waalu kaa me'aleo raharo. Akoro minggi mewunio halaro la'a, gagi baro mpekkakai epie ngako. Kanggo matantu Ue Ala dumosa'iro takau mobea."

## 21

### *Pesombano aso waalu henu karampini*

<sup>1</sup> Tempono i Yesu ai Raha Pesomba'a, Nopekoongo mia suugi pompondamo doi pesomba ai tabala pona'anga pesomba.

<sup>2</sup> Kano pekoongo mbo'u aso waalu henu karampini mompondamo oruo rumisi doi pera.

<sup>3</sup> Kano'amba i Yesu motae menggena unie, "Pekokoongo, mente'ano waalu henu karampini nie mompowee pesomba me'alu orao kaseko lowono mia niire.

<sup>4</sup> Akono mia suugi la'ira pompowea umbu ai toreano agaagaro kanggo waalu henu takau karampini nie meweangakeo lowono niono."

### *Raha Mempori olo rinesa*

<sup>5</sup> Ai tempo la'a nio ba'opio'iro mpepau-pau helinde moikono Raha Mempori la'a binungabunga ako wasu henu memongkilo ka ako manggerupa parewa henu pinesomba'ako ndi Ue Ala. Gagi i Yesu motae'akero,

<sup>6</sup> "Nio tempono soongka lowono henu aimesue'o nie olo rinesa hawe kano tainio aso wasu henu tepo'api ai wawono wasu henu mesueno."

### *Pamulano marasai'a*

<sup>7</sup> Umboro mpesikeno ndi Yesu, "Guru, te'epiekee no'amba tegagi? Mbiokee tondonino bano haweto tempono olo tegagi?"

<sup>8</sup> I Yesu sumangki'iro, "Ai mpetanganakaa, indono ikomiu sinetaki. Akono orao mia olo amba hawe ka mempake'o neeNggu, ka motae, 'Iakuto i Datu Pongkadudui ka tempono oto umbeda!' Kanggo ikomiu indoto mentonda'iro.

<sup>9</sup> Indoi ai memomee lahi tabulu ikomiu mporongoi kareba mongkono petea'a ka pe'uwelia. Lowono nie olo tegagi se'elu, kanggo usie mente'ano amboka tempono tampula'ano wawontolino."

<sup>10</sup> Kano'amba i Yesu motae mbo'u, "Olo tegagi pe'uwelia ai olono tongku ka ai olono nagara.

<sup>11</sup> Baineriotokaa olo tegagi leelu henu langkai, abalaa mokoninggo'a ka haki lele. Olo tegagi mbo'u kegagia henu mompokomomee ka tandangkohali-hali henu lalolangkai umbu ai langi.

<sup>12</sup> Kanggo ambono tegagi lowono sie, ikomiu minggi rinako ka binobarasa, ikomiu minggi binitara ai Raha Pesomba'a ka tinarungku ka ikomiu winawo ai aroro datu ka topomparenta akono neeNggu.

<sup>13</sup> Usieta tempomiu kai palele'o Kareba Moiko umbu ndi Ue Ala.

<sup>14</sup> Gagi pokomoroso'o aroamiu ka indo nanta-nanta bambio sangkimi mokomentee'o koroimiu.

<sup>15</sup> Iakuto nie henu mowee'akomiu pande'a mbio henu mentee minggi ai mempa'u'o hawe kano uwelimi lano poli umewa ba gumarokomiu.

<sup>16</sup> Helila'ato mbo'u mia mosu'omu, petiamu, sambompihemu ka wali-walimu olo tumudukomiu ka ba'opio'iro ai olomi minggi pinepate.

<sup>17</sup> Kaa lowono mia memokokatangokomiu akono neeNggu.

<sup>18</sup> Maupono helila'a, aso ngkau wuu tokaa ai ulumiu lanolei tetadi.

<sup>19</sup> Bano ikomiu konggo mpihe metenunu ndi Iaku, ikomiu amba mpohawé tuwua lalau tumpula'anó."

### *Mongkono teresano Yerusal*

<sup>20</sup> "Bano ikomiu mesue'o Yerusal rosapoio sorodadu, ai mento'orioto motae, teresano oto umbeda.

<sup>21</sup> Ai tempo la'a mia henu mo'ia ai Yudea iro mpolao lumeko ai torukuno. Mia ai laro inie langkai karo mpeluuarako umbu lehea, ka mia henu mo'ia ai bungkuno inie langkai indoro mpendamo ai laro inie langkai,

<sup>22</sup> akono usieto tempone Ue Ala olo modosa tongku nie, kano lowono henu inukiro nabi mongkono podosa'a olo pinokosangka.

<sup>23</sup> Masolato ine henu da tekonai momeni ba henu da mompo'uo rewu-rewu ai tempo la'a! Akono olo hawe marasai'a henu takau langkai ai lowono wute ka Ue Ala olo dumosango tongku niire.

<sup>24</sup> Nio henu olo pinepate ako ponai ka nio mbo'u henu olo winawo gagi mia tinarungku ai inie mesue, ka orao tongku henu tai me'ale-ale'iRo Ue Ala olo lumola'ango Yerusal hawe kano pinggo tempo henuto pinatantuRo Ue Ala tiaro."

### *Hawe'an Ana Manusia - Sirime mongkono pu'unara*

<sup>25</sup> "Mingga nio tandangkohali-hali henu sinue ai mata'olo, wule ka tonggimo. Ka ai tolino lowono tongku minggi memomee ka mebulalingo umaropio pue ka bombano tahi.

<sup>26</sup> Lowono mia olo mengkinggimo aka mbio henu olo tegagi ai tolino nie, akono lowono henu nio pabawaro ai langi olo baali.

<sup>27</sup> Ai tempo la'a olo romesue'o Ana Manusia hawe ai laro seru ako lowono pabawa ka marambaRo.

<sup>28</sup> Bano lowono la'a mompamula tegagi, penggotito temoroso ka mpesonge, akono Ue Ala ronga minggi kumaduduikomiu!"

<sup>29</sup> Kano'amba i Yesu pau'akero sirime nie, Nopotae, "Pe'i'indongo pu'u ngkau ara ka lowono pu'u ngkau mesueno.

<sup>30</sup> Bano aimesue'o ai pu'u ngkau la'a oto melewe monguro ai mento'orioto motae minggi hawe tempo me'olo.

<sup>31</sup> Hila'ato mbo'u bai mesue'o lowono henu umari Kupau'o la'a tegagi ai minggi mento'orio motae Pomparenta'aRo Ue Ala oto umbeda.

<sup>32</sup> Kupotae'akomiu, ambonopo romemate lowo mia tempo nie, olo tegagi lowono nie.

<sup>33</sup> Langi ka wute olo tumpula, kanggo pauNggu lanolei huru tumpala."

### *Oliwi kato mpegaga-gagai*

<sup>34</sup> "Pegaga-gagaito, indono ikomiu mpihe maritu ako posara'a ka mo'inu inunga henu mompokomolang ba mpihe nanta-nanta mongkono tuwuamiu. Indono ikomiu lano mesadia bano Ana Manusia bingkosako hawe melomohako.

<sup>35</sup> Akono olo tumpula'anó la'a olo hawe menggena oho ndi lowono mia ai wawontolino nie.

<sup>36</sup> Pegaga-gagaito ka pekakai sombo-sombo tempo kai memoroso umaropio lowono henu olo tegagi la'a, ka ikomiu pontu'ai mpenggoti ai arono Ana Manusia bano hawe mobitarita."

<sup>37</sup> Sombo meene i Yesu mompaguru ai Raha Mempori kanggo sombo wongi meluarako leko mewongi ai tamungku Saitu.

<sup>38</sup> Kano'amba eri-erio orao mia hawe ai laro Raha Mempori minggi rumongoio pompaguruno i Yesu.

### *Akala minggi mepateo i Yesu*

<sup>1</sup> Olo langkai Roti Lano Metape henu ninee Pasa oto umbeda.

<sup>2</sup> Ba'opio'iro kapala Petewawo Pesomba ka Guru Agama mpowusu sala ba helinde karo poli mepateo i Yesu laro mento'orio mia, akoro memomee ndi mia orao.

*Ai Yudasi umasa'o i Yesu*

<sup>3</sup> Kano'amba aso mia umbu ai kohopulo ka oruo anaguruno i Yesu oto i Yudasi henu ninee mbo'u Isikario, nopenadamohio Üeno Onisu.

<sup>4</sup> Gagi umono lumeko ndi Kapala Petewawo Pesomba ka kapala pogagai Raha Memori ka mpepatudu ba helinde kano poli meweangakeo i Yesu ndi umboro.

<sup>5</sup> Umboro memanga'u takau ka tepo'aso aroaro powee'akeo doi.

<sup>6</sup> I Yudasi me'indu ka mompamula tempo la'a umono mowusu tempo henu moiko henu laro ment'o ria orao minggi meweangakeo i Yesu ndi umboro.

*Pepatoka mponggaa Pasa*

<sup>7</sup> Haweto tempono Olo langkai Roti Lano Metape, ooto usie tempono bimba Pasa olo ginere.

<sup>8</sup> Gagi i Yesu tumena'o ai Peturu ka i Yohane, "Lekoto pasadia'akito kaanga Pasa."

<sup>9</sup> Rompotae ndi Umono, "Uma, ainderio inehemiu kipasadia'o?"

<sup>10</sup> Sumangki i Yesu, "Baimpendamo ai laro inie langkai Yerusele, ikomiu minggi tepotowo'akeo aso tama henu mowawo kusi me'ihi uwoi. Tonda'o hawe bainderio raha tetutuan,

<sup>11</sup> ka pau'akeo ndi ueno raha la'a, Guru mesikeno ndi ikomiu 'Ainderio bolongko po'iangaNggu meronga anaguruNggu minggi mpoggaa kaanga Pasa?'

<sup>12</sup> Ueno raha la'a olo tumiso'akomiu aso bolongko henu langkai ai wawono, henuto nio mega ka parewa mesueno. Leheato ai pasadia'o lowono."

<sup>13</sup> Gagi lumekoto ai Peturu ka i Yohane ai inie langkai Yerusele karo humaweo menggena henu pinauno i Yesu. Karo palena'o kaanga Pasa lehea.

*Pinokomatantu ponggaanga mempori*

<sup>14</sup> Towono haweto tempono, i Yesu mentoro monggaa Pasa meronga saru anaguruNo.

<sup>15</sup> Kano'amba Nopepau ndi umboro, "Mo'osu ngako Iaku monggaa Pasa nie meron-gakomiu, ambono Kumarasai.

<sup>16</sup> Otokaa Kupotae'akomiu, laKu lei monggaa kaanga Pasa nie mbo'u hawe kano pengkonoano ponggaanga Pasa nie pinokosangka ai laro Pomparenta'aRo Ue Ala."

<sup>17</sup> Umari la'a No'aleo aso kangkiri me'ihi anggoro kaNo pekakai mo'unde-unde ndi Ue Ala, kano potae, "Aleoto ka inungo umbu ai kangkiri nie ka wee'akeo ndi walimi."

<sup>18</sup> Iaku mepau ndi ikomiu, umari Pasa nie, andoKu lei mo'inu mbo'u anggoro hawe kano gagi Pomparenta'aRo Ue Ala ai wawontolino."

<sup>19</sup> Umari la'a i Yesu umaleo roti kaNo pekakai mo'unde-unde ndi Ue Ala, kano'amba Nosebu-sebungo roti la'a aka kaeNo kano wee'akero ka motae, "Tinieto koroiNggu henu pineweangako tiamiu, powowauto unie kai me'aroangaNggu."

<sup>20</sup> Hila'aka mbo'u umarino monggaa roti, Nowee'akero kangkiri me'ihi anggoro ndi anaguruNo ka motae, "Anggoro nie ooto pegantiRo Ue Ala henu wo'u henu pinokomentee aka reaNggu, rea henu tesolo tiamiu."

<sup>21</sup> "Kanggo pesu'ui, mia henu minggi meweangaKune nio endea meronga Iaku!"

<sup>22</sup> Ana Manusia mentee'ano olo maate menggena henu pinatantuRo Ue Ala kango masolato mia henu meweangaKune!"

<sup>23</sup> Karo pompamula kosike-sikeno aso mia ka aso mia, "Ainei umbu i olondo nie henu mowowau menggena usie?"

*Pegalo'a ainei henu lalolangkai potorono*

<sup>24</sup> Umari la'a anaguruno i Yesu mpegalo mongkono ainei henu lalolangkai potorono ai oloro.

<sup>25</sup> Oto usie kano potae i Yesu ndi umboro, "Lowono Datuno tongku henu lano to'orio Ue Ala mpowowau montonda po'ehero ndi paliliro ka lowono mia henu langkai pabawano inehero ninee 'pontulungi palili'.

<sup>26</sup> Kanggo ikomiu indo helila'a, moikono mia henu lalolangkai ai olomiu nogagito menggena mia henu lalodedeiki ka petewawo nogagito mia momparakai.

<sup>27</sup> Ainekee henu lalolangkai, mia henu mentoro monggaa ba mia henu momparakai? Matantu mia henu mentoro monggaa la'a. Kanggo Iaku nio ai olomiu menggena mia momparakai.

<sup>28</sup> Ikomiu mpihe meronga Iaku ai masusa'a henu Kuhaweo'.

<sup>29</sup> Okaa usie Iaku minggi mowee'akomiu pabawa kai bisa momparenta menggena UmaNggu moweAku pabawa kaKu momparenta.

<sup>30</sup> Gagi ikomiu minggi mpoggaa ka mpo'inu merongangiaKu ai laro pomparenta'aNggu, ka ikomiu lowo minggi mpentoro ai kadera pentoro'a henu pinelangkai kai pomparenta ai kohopulo ka oruo tongku Israeli."

<sup>31</sup> Kano'amba i Yesu motae ndi Peturu, "Simo, Simo, pekokoongo! Ueno Onisu oto mo'ema tempo ndi Ue Ala minggi umara'arahakomiu, menggena pae pinokosisingge umbu ai kulino.

<sup>32</sup> Kanggo Akuto mekakai'akomu, kano lano tebali pompe'alo-alomu ai tempo iiko inara'arahako ka ta'alu ikoto mentesisi kamekule euno ndi Iaku, pokomoroso'okaa pompe'alo-aloro petiamu."

<sup>33</sup> Nopotae i Peturu, "Ue, iaku mesadia mendamo ai tarungku ka maate meronga Ikomiu!"

<sup>34</sup> Kanggo Nopotae i Yesu, "Kupau'akomu Peturu, eri-erio ambono manu kekere'o, menggotoluto iiko humapuAku."

<sup>35</sup> Kano'amba i Yesu mepau ndi anaguruNo, "Da ai mpewowolo'okee tempono Kute-nakomiu lumeko mowawo Kareba Moiko ka laKu behekomiu mowawo doi, kandu-kandu ka sandala, niokee makuramiu?"

Romesangki'O, "Lalau."

<sup>36</sup> Nopotae i Yesu, "Kanggo hilinie, bainei mompe'ue doi ba kandu-kandu olo nowaweo ka bainei lano pompe'ue ponai olo no'asa'o kalambino kano po'oli ponai."

<sup>37</sup> Akono, Kupau'akomiu motae olo pinokosangka ndi Iaku mbio henu te'uki ai laro laino Sura Tutulu nie, 'Umono olo dinoa ai oloro mia ntihala.' Mente'ano, lowono mbio henu te'uki mongkono Iaku tekonai tegagi."

<sup>38</sup> Rompotae, "Ue, tinie nio oruo ponai."

Nosangki'iro, "Singka oto!"

#### *I Yesu mekakai ai Gesemani*

<sup>39</sup> Kano'amba i Yesu bintango inie langkai la'a ka menggena mondeeno lumeko ai torukuno Saitu, ka anaguruNo merongga'akeO.

<sup>40</sup> Tempono mehawe lehea, Nopotae'akero, "Aimpekakaikaa indono ikomiu mente-donta ai laro pompopandei."

<sup>41</sup> Kano'amba i Yesu lumeko olai tedei umbu ndi umboro, bara'ura aso peratu'a wasu, kano penggolotu ka mekakai.

<sup>42</sup> Nopotae i Yesu, "O Uma, bano Ikomiu behe, poko'olai'aKune marasaia nie, kanggo lano'o montonda po'eheNggu aroanoto nogagi montonda po'eheMiui."

<sup>43</sup> Aso mala'eka umbu ai suruga mesabahako ndi Umono ka mokomoroso'O.

<sup>44</sup> Ako mobeano marasaia henu Nohoringo, ooto kaNo mompesu'ui mekakai hawe te'iti moko'iwoNo menggena iti-itino rea ai wute.

<sup>45</sup> Umari mekakai, i Yesu mekule ndi anaguruNo kanggo Nohawee'iro tekonai mpoturi akoro memomaloi ka masusa aroaro.

<sup>46</sup> Nopotae'akero, "Mombiokee kai mpoturi? Mpewangu kai mpekakai kano indono ikomiu mentedonta ai laro pompopandei."

#### *I Yesu rinako*

<sup>47</sup> Tekonaino i Yesu da mepau, mehawe mia orao, ka i Yudasi aso mia umbu ai kohopulo ka oruo anaguruNo henu wawe'iro. Kano'amba i Yudasi lumeko tumowo'o i Yesu kano iki'O.

<sup>48</sup> Kanggo i Yesu mepau'akeo, "Yudasi, telalo umiki'Aukee kau peweangakeo Ana Manusia?"

<sup>49</sup> Tempono umboro henu merongga-ronga'akeo i Yesu lehea mengkiteo mbio henu minggi tegagi, rompotae, "Ue, paralukee ikami umewa'iro ako ponai?"

<sup>50</sup> Kano'amba, aso mia umbu ai oloro umimpahio atano Petewawo Pesomba Langkai ako ponai hawe kano tebite biri kuanano.

<sup>51</sup> Kanggo nopotae i Yesu, "Hila'ato!" Kano'amba No'in'i'o birino mia la'a ka Noposom-buo.

<sup>52</sup> Kano'amba i Yesu mepau ndi umboro Kapala Petewawo Pesomba ka kapala pogagai Raha Mempori saru mia mosu'ono to Yahudi henu mehawe lehea minggi merako'O, Nopotae, "Ai mengkaraakee Iaku nie mia henu mosa'a gauNggu kai mehawe mpowawo ponai ka tarasulu minggi merako'Aku?

<sup>53</sup> Kaisa'a sombo-sombo olo Iaku merongakomiu ai Raha Mempori, ka lai merako'Aku. Kanggo unieto tempono, ikomiu mpeleluako ka pabawano Ueno Onisu peleluako mbo'u."

#### *I Peturu humapu'o i Yesu*

<sup>54</sup> Umboro merako'o i Yesu karo mewaweO ai rahano Petewawo Pesomba Langkai. Ka ai Peturu metonda umbu olai.

<sup>55</sup> Ai tongano puu raha la'a mia pomposaki apui ka umboro mpentoro mebolilingo mpominu. I Peturu mbo'u mentoro ai oloro.

<sup>56</sup> Aso ata irowai sumue'o i Peturu mentoro umbeda apui, nopekokoongo kano potae, "Mia nie mbo'u meronga-ronga saru i Yesu."

<sup>57</sup> Kanggo i Peturu mehapan, nopoatae, "Uuhu, laku to'orio mia la'a."

<sup>58</sup> Lano epié umari la'a, nio mia mesue sumue'o i Peturu ka motae, "Iliko mbo'u mia henu tumonda'iRo!"

Kanggo i Peturu sumangki, "Uuhu, lano'o iaku!"

<sup>59</sup> Bar'a'ura aso langku umari la'a, aso mia mesue mbo'u mepau mompesu'ui, "Mentee mia nie tumonda'i Yesu aka umono mbo'u mia Galilea."

<sup>60</sup> Kanggo nopoatae i Peturu, "Mbío pinaumu sie, laku to'orio!" Tempo la'a mbo'u tekonaino i Peturu mepau, manu kekere'o.

<sup>61</sup> I Yesu mewolili ka menggito ndi Peturu. Kano tekewolo i Peturu henu umari nopa'o i Yesu ndi umono, "Ambono kekere'o manu olo nie, iiko oto menggotolu humapuAku."

<sup>62</sup> Kano peluarako i Peturu umbu lehea ka me'iwi sesedu.

*I Yesu ai arono Mpupobitara Agama*

<sup>63</sup> Mia orao henu tekonai gumagaio i Yesu, mpo'ihe-ihengo ka romerodohO.

<sup>64</sup> Romempupungo ra'iNo ka mesikeno, "Kua pau'o ainei henu rumodoKo."

<sup>65</sup> Da orao mbo'u pau pompo'ewe-ewe henu romempau'akeO.

<sup>66</sup> Ka towono meenee umboro umbu ai mia mosu'ono to Yahudi, Kapala Petewawo Pesomba ka Guru Agama mpepokosi minggi pebitara, kano'amba i Yesu winawo ai arono Mpupobitara Agamaro.

<sup>67</sup> Rompotae, "Ta'aluu ikoto Datu Pongkadudui, pau'akamito."

Nopoatae i Yesu, "Napono Kupau'akomiu, lailei pompe'alo-alo,

<sup>68</sup> ka napono Kupesikeno bambio ndi ikomiu, lailei mesumangki.

<sup>69</sup> Kanggo mompamula hilinie Ana Manusia olo mentoro ai kuanaRo Ue Ala Henu Lalopabawa."

<sup>70</sup> Rompotae lowo, "Ta'aluu helisie, menteekee Ikoto nie anaRo Ue Ala?"

Nosangki'iro i Yesu, "Ikomuikaa henu mempau'o motae Iaku anaRo Ue Ala."

<sup>71</sup> Ka rompotae, "Lano paralu mbo'u tompowusu sabi! Ikitoto umari merongoio umbu ai pinduNo."

## 23

*I Yesu ai arono i Gubenuru Pilatu*

<sup>1</sup> Kano'amba mpenggoti lowono mpupo'utuhi kara-kara la'a karo mewaweo i Yesu ai arono i Gubenuru Pilatu.

<sup>2</sup> Lehea umboro mompu'u pasala'o i Yesu, rompotae, "Kimehawe'o Mia nie mokote-sampu'o tongkumami, Umono mompo'usi mia karo indoro mpobara sima ndi Datu Langkai ka No'umakuio motae Umonoto i Kerisitu oto Datu."

<sup>3</sup> Kano'amba i Gubenuru Pilatu mesikeno ndi Yesu, "Ikotokee datuno to Yahudi?" Sumangki i Yesu, "Ikomuikaa henu pau'o."

<sup>4</sup> Gagi i Gubenuru Pilatu motae ndi ba'opio'iro Kapala Petewawo Pesomba ka mia orao la'ira, "Laku haw'e'o mapo te'aso halano Mia nie."

<sup>5</sup> Kanggo tetiangi mokora rodadario i Gubenuru Pilatu, rompotae, "Ako pompaguruNo, Nopo'usi'o palili ai lowono wute Yudea, te'umbu ai wute Galilea hawé endea."

<sup>6</sup> Rumongoio pauro la'a i Gubenuru Pilatu mesikeno, "To Galileakee Mia nie?"

<sup>7</sup> Tempono i Gubenuru Pilatu tumo'orio motae i Yesu umbu ai wute pomparenta'an Datu Herode, notena'iro karo mewaweo i Yesu ndi Datu Herode, henu tempo la'a tekonai ai Yerusele mbo'u.

*I Yesu ai arono i Datu Herode*

<sup>8</sup> Tempono ai Datu Herode sumue'o i Yesu, manga'u ngako aroano. Ako epieto nomokokumiteO ka oto menggoe norongoio mongkono i Yesu ka momperorohi olo kumiteO i Yesu mowowau aso tandangkohali-hali.

<sup>9</sup> Gagi orao henu nopesikeno'akeo ndi Yesu, kanggo lalau napo te'aso henu nosangki'o i Yesu.

<sup>10</sup> Tempo la'a ba'opio'iro Kapala Petewawo Pesomba ka Guru Agama lumeko ai arono karo pepau langkai mentulurio i Yesu.

<sup>11</sup> Gagi mompamulato i Datu Herode ka sorodadu-sorodaduno mpo'ewe-ewe'e'o i Yesu ka mpesantaliki'akeO. Ropokono'akeO parewa pompelangkai gagi pompo'ihe-ihero ndi Umono ka Datu Herode tumena'iro pokule'O ndi Gubenuru Pilatu.

<sup>12</sup> Mompamula olo la'a ai Datu Herode ka ai Gubenuru Pilatu mewali-wali kaisa'a se'eluno umboro tepochisala.

*I Yesu pinokule mbo'u ai arono i Gubenuru Pilatu*

<sup>13</sup> Kano'amba i Gubenuru Pilatu pokosi'iro Kapala Petewawo Pesomba, petewawo to Yahudi ka palili,

<sup>14</sup> ka potae'akero, "Ikomi u mewaweo Mia nie ndi iaku ako tuluri henu motae Umono mokotesampu'o tongkumi. Pekokoongo, ai mengkiteo temponggu paresa'o Mia nie ai aromiu, lalau napo te'aso halaNo menggena henu ai tuluri'akeO.

<sup>15</sup> Menggenakaa saru i Datu Herode, lalau nophohawe napo te'aso halaNo oto kano pokule'akami. Mentee'ano lalau napo te'aso hala henu Nowowauo hawe kano tekonoako pinotamba.

<sup>16</sup> Gagi minggi kutena'o sorodadunggu sumepi'O umari la'a kupokolipahO."

[

<sup>17</sup> Ai Gubenuru Pilatu motae menggena usie akono mondeeno umono olo mokolipaho aso mia tinarungku tiano mia orao ai sombo olo Pasa.]

<sup>18</sup> Kanggo lowono mia henu lehea mengkumora, "Pepateo Mia sie! Pokolipahakami ai Baraba!"

<sup>19</sup> Ai Baraba tinarungku akono morukai ai inie langkai la'a ka mompepate mia.

<sup>20</sup> Ai Gubenuru Pilatu minggi mokolipaho i Yesu, gagi nopepau mbo'u tetiangimekora ndi mia orao la'ira.

<sup>21</sup> Kanggo mia orao mengkokora-kora, "Potamba'o Mia sie! Potamba'o Mia sie!"

<sup>22</sup> Ka komenggotoluno ai Gubenuru Pilatu mepau ndi umboro, "Mbio su'ukee winowauNo henu mosa'a? Lalau kuahwe'o napo te'aso winowauNo henu mosa'a kaNo pinokonoako pinotamba, gagi minggi kutena'o sorodadunggu sumepi'O kaku amba mokolipaHo."

<sup>23</sup> Kanggo tetiangi langkai romengkumora dumadario ai Gubenuru Pilatu kano i Yesu pinotamba. Poko'ariano umboro ponangi ako kokora-koraro.

<sup>24</sup> Gagi i Gubenuru Pilatu putuio tumonda'o po'emaro mia orao.

<sup>25</sup> Ka nopolipaho i Baraba henu rome'emango, oto mia henu tinarungku akono morukai ka mompepate mia. Kanggo i Yesu nopeweangakeo ndi umboro karo mpowowau montonda po'ehero.

*I Yesu winawo kano pinotamba*

<sup>26</sup> Kano'amba sorodaduno to Roma la'ira mewaweo i Yesu meluarako umbu ai inie langkai Yerusale. Tempono koleko-leko, umboro tepotowo'akeo ai Simo umbu ai inie langkai Kirene, henu tekonai mendamo ai inie langkai Yerusale. Romentahango ka meddasadio kano po'ahango kau pinotambano i Yesu ka koleko-leko ai bungkuno i Yesu.

<sup>27</sup> Orao ngako mia henu tumonda bungku'O. Ai oloro nio oraor irowai henu mpe'iwi sesedu ka mokokolaro'akeo i Yesu.

<sup>28</sup> Kanggo i Yesu mewolili ka motae'akero, "Oo irowai-irowai Yerusale! Indoto mpe'iwickiaKu! Mpe'iwickioto koroiimi ka ana-anamui!

<sup>29</sup> Akono minggi hawe tempono mia mpotae, 'Meme'ura'iroto irowai henu biita, henu laro huru mpe'ana, ka laro huru mompo'uo!'

<sup>30</sup> Ai tempo la'a mia minggi mpotae, 'Aroanoto lowono tamungku dumusinggami ka lowono torukuno humuwuunggami!'

<sup>31</sup> Akono bano umboro mpowowau menggena unie ai pu'u ngkau henu da tuwu, mbioto henu minggi romewowaou ai pu'u ngkau henuto mosu'i?"

<sup>32</sup> Sorodaduno to Roma la'ira mowawo mbo'u oruo mia mesuueno henu mosa'a gauro henu minggi pinotamba meronga i Yesu.

*I Yesu pinotamba*

<sup>33</sup> Temporo mehawé ai po'ianga henu ninee Taku'ulu, lehea ba'opio'iro sorodaduno to Roma potamba'o i Yesu meronga oruo mia henu mosa'a gauro la'a, aso mia ai kuanaNo ka aso mia ai manggaliNo.

<sup>34</sup> Kano'amba i Yesu mepau, "Uma, oninioto halaro, akono laro mento'orio mbio henu winowauro."

Kano'amba sorodadu la'ira mpetia-tia'o parewaNo i Yesu telalo ai loterei.

<sup>35</sup> Orao mia menggoti lehea mesue'o lowono kegagia la'a. Umboro petewawo to Yahudi tekonai mpo'ihe-ihengo i Yesu, rompotae, "Mia mesue Nokaduduio, bano lo'oka su'u menteé Mia nie Datu Pongkadudui henu bininikiRo Ue Ala, po'inengoto kano Umonono kumaduduio koroiNo."

<sup>36</sup> Umboro sorodadu mbo'u mpo'ihe-ihengo i Yesu, rompopo'inaukeo anggoro mosilu ndi Yesu,

<sup>37</sup> ka rompotae, "Bano Ikoto datuno to Yahudi, kaduduio koroiMu!"

<sup>38</sup> Ai wawo uluno i Yesu ai kau pinotamba la'a pinotako inuki, "Tinieto datuno to Yahudi."

<sup>39</sup> Aso mia henu mosa'a gauno henu pinotamba ai aso hileno i Yesu mbo'u mo'ihehengo, nopotae, "Lano'okee Ikomi iku Pongkadudui? Bano menggena ula'a, kaduduio koroiMu ka ikam!"

<sup>40</sup> Kanggo mia henu mosa'a gauno henu asono me'ua'o, nopotae, "Laula'a momeeke iiko ndi Ue Ala? Akono iiko pinotamba menggena Umono!

<sup>41</sup> Mente'e'ano Mia nie lalau napo te'aso winowauNo henu mosa'a, kanggo ikito tekonoano bato dinosa akono powowaundo henu mosa'a."

<sup>42</sup> Kano'amba nopotae, "O Yesu pewowolo'o akukaa tempono Ikomi hawe gagi Datu."

<sup>43</sup> I Yesu motae ndi umono, "Kupau'akomu, mente'e'ano olo nie iiko minggi meronga Iaku ai suruga."

### *I Yesu maate*

<sup>44-45</sup> Bara'ura langku hopulo ka oruo tonga olo, mata'olo lano mewanta ka lowono po'ianga lehea gagi worikidi hawe langku otolu wundu olo. Bana po'losi henu mpihe nio ai Bolongko Mempori ai Raha Mempori teberi tepe'oruo. <sup>46</sup> Kano'amba i Yesu kumora, "O Uma, ai laro kaeMi Kupeweangakeo penaoNggul!" UmariNo mepau menggena ula'a, i Yesu maate<sup>\*</sup>.

<sup>47</sup> Tempono kapala sorodadu sumue'o kegagia la'a, no'unde'iRo Ue Ala, nopotae, "Mente'e su'u Mia nie lano tehala!"

<sup>48</sup> Lowono mia henu menterombu mpengginggit lehea, mengkiteo mbio henu tegagi. Rompekule memokokolaro ka pompesosoo.

<sup>49</sup> Tempo la'a wali-walino i Yesu ka ba'opio'iro irowai henu tumonda'o i Yesu umbu ai Galilea, umboro mpenggoti hala'olai ka mengkiteo kegagia la'a.

### *I Yesu kinaburu*

<sup>50-51</sup> Nio aso mia neeno i Yusupu, umbu ai inie langkai Arimatea ai wute Yudea. Umono me'arao moiko ka pinelangkai ka umono metete'ema tempono Ue Ala momparenta gagi datu. Maupono umono miano Mpupobitara Agama, kanggo lano tumarima'o mbio henu umari pinotuhi ka henu romewowaau.

<sup>52</sup> Gagi umono lumeko ndi Gubenuru Pilatu ka umemango bakeno i Yesu.

<sup>53</sup> Kano'amba nopoingko bakeno i Yesu kano tongoho aka bana mopute ka nopolero ai laro aso kaburu ai torukuno mewasu. Kaburu la'a ambono huru pinake. <sup>54</sup> Lowono la'a tegagi umbeda ai olo penao-nao'a to Yahudi.

<sup>55</sup> Ba'opio'iro irowai henu mehawe meronga i Yesu umbu ai Galilea, tumonda'o i Yusupu. Romengkiteo kaburu la'a ka ba helinde nopolero bakeno i Yesu ai larono.

<sup>56</sup> Umari la'a umboro mperekule ai Yerusal. Umboro umaturu'o rampa-rampa ka boka mana mo'ahi tiano bokaino bakeno i Yesu.

Ka ai olo penao-nao'a to Yahudi, umboro mpenao-nao montonda songkaro i Musa.

## 24

### *I Yesu muule*

<sup>1</sup> Da eri-erio ngako ai olo Minggu, ba'opio'iro irowai meleko ai kaburu mpowawo rampa-rampa henuto ropatoka'o.

<sup>2</sup> Romehawe'o wasu pupuno kaburu la'a oto tebanggule.

<sup>3</sup> Toworo mpendamo, andoro mehawe'o bakeno i Yesu lehea.

<sup>4</sup> Tekonairo mpenggoti kaa mengkokondoro aka kegagia la'a, bingkosako oruo mia mekalambi mongkikilo mpenggoti ai horiro.

<sup>5</sup> Umboro memomee ngako karo mpenggolutu. Kanggo oruo mia la'ira mepau ndi umboro, "Akombio kai mewusu'o Mia henu tuwu ai oloro mia maate?"

<sup>6</sup> Umono lalau endea, kanggo Umono oto muule. Pewowolo'o mbio henu huru Nopau'akomiu tempono Umono da merongakomiu ai Galilea,

<sup>7</sup> motae, 'Ana Manusia olo pineweangako ndi mia ntihala, kano'amba pinotamba, ka ko'otoluno olo Umono olo muule.'

<sup>8</sup> Gagi rompewowolo'o pauno i Yesu la'a.

<sup>9</sup> Ka toworo mperekule umbu ai kaburu, ropau'akero lowono kegagia la'a ndi hopulo ka aso anaguruNo ka mia mesue henu mpetonda ndi Yesu.

<sup>10</sup> Irowai-irowai henu mompau'akero kegagia la'a ooto i Maria Madalena, ai Yohana, ai Maria ineno i Yakobu ka irowai-irowai mesueno.

<sup>11</sup> Kanggo anaguruno i Yesu laro mpe'ale-ale'iro akono romengko'ara'ara irowai la'ira butu mpesambureki.

<sup>12</sup> Kanggo ai Peturu menggoti kano pelulu lumeko ai kaburu. Kano penggou/nggou mesisimi ka nosue'o bututokaa bana mopute henu nio lehea. Kano'amba i Peturu mekule ka kosike-sikeno ai laro aroano mbio henu umari tegagi.

*I Yesu mesabahako i sala leko ai inie Emau*

<sup>13</sup> Ai olo la'a mbo'u oruo mia henu metonda ndi Yesu tekonai koleko-leko lumeko ai inie henu ninee Emau, bara'ura hopulo ka aso kilo olaino umbu ai Yerusale.

<sup>14</sup> Tekonairo koleko-leko, umboro mepau-pau kumonoo lowono henu umari tegagi.

<sup>15</sup> Temporo mpebita-bitara ka moluarako pohawero, bingkosako i Yesu hawe ka koleko-leko meronga'akero.

<sup>16</sup> Kanggo nio henu lumingo'o mataro, oto karo tai bisa tumo'orio i Yesu.

<sup>17</sup> Kano'amba i Yesu sumikeniro, "Mbioti henu ai mebitara'o ai laro koleko-lekoamiu nie?"

Gagi umboro mpenao-nao ka ra'iro mehangga mokokolaro.

<sup>18</sup> Kanggo aso mia umbu ai oloro, henu meneengako Keleopa, mesikeno, "Butu Ikomukee mia umbu olai henu hawe ai Yerusale henu tai tumo'orio mongkono lowono kegagia henu umari tegagi sarai nie?"

<sup>19</sup> Kano'amba i Yesu mesikeno mbo'u, "Kegagia mbirokee?"

Rosangki'O, "Kegagia mongkono i Yesu mia Nasare. Umono nabi henu buke ako pabawa ai laro lowono pauNo ka winowauNo ai aroRo Ue Ala maupo ai aroro lowono tongkundo.

<sup>20</sup> Kanggo umboro Kapala Petewawo Pesomba ka petewawo agamando meweangakeo kano dinosa, umari la'a Umono pinotama.

<sup>21</sup> Kaisa'a ikami pomperorohi motae Umonoto henu minggi mokolipaho tongku Israeli umbu ai to Roma uweliro. Ka olo nie ko'otoluno olo umarino kegagia la'a.

<sup>22</sup> Kanggo nio ba'opio'iro irowai umbu ai miamami mokotekangga kami. Da eri-erio ngako iroti meleko ai kaburu,

<sup>23</sup> kanggo laro mehawee'o bakeno i Yesu lehea. Karo'amba mpekule ka mompau'akami motae umboro mposue malaa'eka. Malaa'eka la'ira motae'akero i Yesu muule.

<sup>24</sup> Gagi ba'opio'iro walimami lumeko mbo'u ai kaburu ka romehawee'o menggena henu pinauro irowai la'ira kanggo laro mesue'o i Yesu."

<sup>25</sup> Kano'amba i Yesu motae ndi umboro, "Ikomukaa su'u mebenge! Mapari ngako me'ale-aleo mbio henu umari pinauro nabi!"

<sup>26</sup> Lano'okee se'eluno Datu Pongkadudui olo humoringo lowono marasai la'a kano'amba tumarima'o maramba'aNo?"

<sup>27</sup> Kano'amba i Yesu nopau'akero lowono pengkonoano mbio henu te'uki ai laro Sura Tutulu mongkono koroiNo umbu ai surano nabi Musa hawe ai lowono suraro nabi.

<sup>28</sup> Temporo umbeda ai inie tinungkairo, i Yesu helau minggi motilalo'akeo koleko-lekoNa.

<sup>29</sup> Kanggo rodadasiO ka motae, "Po'iato meronga ikami, akono oto minggi wongi ka oto minggi soo olo." Gagi i Yesu mendamo ka mo'ia meronga'akero.

<sup>30</sup> Tempono rompentoro minggi mpoggaa, i Yesu umaleo roti,mekakai mo'unde ndi Ue Ala kano'amba Nosebu-sebungo roti la'a ka Nowee'akero.

<sup>31</sup> Tempo la'a masa lalau mbo'u mbio henu lumingo'o mataro, gagi roto'orio motae Umonoto i Yesu. Ka Umono oto molio umbu ai penggitao.

<sup>32</sup> Karo'amba mpepau aso mia ka aso mia, "Okaa tekonai aroando laloako manga'u tekonai Nopepau ndi ikito ai tonga sala ka tempono Nopau'akito pengkonoano ihino Sura Tutulu."

<sup>33</sup> Ai tempo la'a mbo'u, umboro mpenggoti ka mpekule ai Yerusale. Lehea romehawee'o kohopulo ka aso anaguruno i Yesu tekonai menterombu saru mia mesue henu metonda ndi Yesu.

<sup>34</sup> Kano'amba umboro henu ai Yerusale pau'akero oruo mia la'a, "Mentee'ano i Yesu oto muule ka mesabahako ndi Simo."

<sup>35</sup> Kaa oruo iro la'a pau'akero mbo'u mongkono mbio henu tegagi ai tonga sala ka helinde romento'orio i Yesu tekonaiNo mosebu-sebu roti.

*I Yesu mesabahako ndi lowono anaguru*

<sup>36</sup> Tekonairo da mpepau-pau mongkono kegagia la'a, bingkosako i Yesu menggoti ai oloro ka mepau'akero, "Roodo tiamuu!"

<sup>37</sup> Umboro tekangga ka memomee akoro mengko'ara'ara umboro mposue onisu.

<sup>38</sup> Kanggo i Yesu mepau'akero, "Mombio kai memomee? Mombio kai mendoondoo ai laro aroamiu?

<sup>39</sup> Kiteo kaeNggu ka kareNggu. Iakuto unie! Ini'o ka kiteoto, akono onisu lalau bauno ka wukuno, menggena henu ai mengkiteo ndi Iaku."

<sup>40</sup> Tekonaino mepau, i Yesu tumiso'akero kaeNo ka kareNo.

<sup>41</sup> Kanggo amboro mpe'ale-aleo su'u akono umboro manga'u ka da mengkohali-hali kumiteo i Yesu. Ooto kano i Yesu motae'akero, "Niokee kaangamiu endea?"

<sup>42</sup> Ka roweeakeO asontia bou sinunu.

<sup>43</sup> No'aleo kano kaango ai aroro.

<sup>44</sup> Kano'amba Nopotae'akero, "Unieto pauNggu henu Kupau'akomiu i tempo kaKu da merongakomiu motae lowono henu inuki mongkono laku ai laro songkano i Musa, suraro nabi ka sura Mpenani ka Mpo'unde olo pinokosangka."

<sup>45</sup> Kano'amba i Yesu wunggeho pompeowololo karo mento'orio ihino Sura Tutulu.

<sup>46</sup> Nopotae ndi umboro, "Nio te'uki ai laro Sura Tutulu motae, Datu Pongkadudui olo marasai ka ko'otoluno olo Umono muule."

<sup>47</sup> Ka mbo'u mongkono tesis'i ka pontolosia hala olo pinalele ai laro neeNo ndi lowono tongku, mompamula umbu ai Yerusale.

<sup>48</sup> Ikomuto sabiNggu henu minggi palele'o lowono kegagia nie.

<sup>49</sup> Ka Iaku olo mompokasu mbio henu oto ginantiRo UmaNggu. Aimpo'iato ai inie langkai nie hawe ikomiu pinokonoako pabawa umbu ai suruga."

*I Yesu te'engka ai suruga*

<sup>50</sup> Kano'amba i Yesu wawo'iro meluarako umbu ai Yerusale hawe umbeda ai inie Betania. Lehea No'engkaho kaeNo kaa Norosongiro.

<sup>51</sup> Tekonai Norosongiro, Umono teposuangako umbu ndi umboro ka te'engka ai suruga.

<sup>52</sup> Umboro mpenggolotu mesombaiO kano'amba rompekule ai Yerusale buke ako manga'ua.

<sup>53</sup> Poko'ariano sombo olo romehawe ai Raha Mempori ka umunde-unde'iRo Ue Ala.